

Uqalhich Aglaanji Matthew-ŋum

Sivullianji Jesus Christ-ŋum

¹ Uvva ukua aglañich sivullianjiñ Jesus Christ-ŋum, kinjviañupluni David-miñ Abraham-miñlu.

² Abraham aapagigaa Isaac-ŋum,

Isaac-li aapagigaa Jacob-ŋum,

Jacob-li aapagigaa Judah-ŋum aniqataiñlu.

³ Aasiiñ Judah aapagigaak Perez-ŋumlu Zerah-ŋumlu, taapkuak aakañak Tamar,

Perez aapagigaa Hezron-ŋum.

Hezron-li aapaña Ram-ŋum.

⁴ Ram-li aapagigaa Amminadab-ŋum,

Amminadab-li aapagigaa Nahshon-ŋum.

Nahshon-li aapagigaa Salmon-ŋum.

⁵ Salmon-li aapagigaa Boaz-ŋum, Rahab-mik aakaqaqtuam,

Boaz-li aapagigaa Obed-ŋum, aakaqaqtuam Ruth-mik,

Obed-li aapagigaa Jesse-m, ⁶ Jesse-aasiiñ aapagi-gaa umialgum David.

David-li aapagigaa Solomon-ŋum, aakaqaqtuam Uriah-m nuliağaluanjanik.

⁷ Aasiiñ Solomon aapagigaa Rehoboam-ŋum,

Rehoboam-li aapagigaa Abijah-ŋum,

Abijah-li aapagigaa Asa-ŋum.

⁸ Asa-li aapagigaa Jehoshaphat-ŋum,

Jehoshaphat-li aapagigaa Jehoram-ŋum,

Jehoram-li aapagigaa Uzziah-ŋum,

⁹ Uzziah-li aapagigaa Jotham-ŋum,

Jotham-li aapagigaa Ahaz-ηum,
Ahaz-li aapagigaa Hezekiah-ηum.

¹⁰ Hezekiah-li aapagigaa Manasseh-ηum,
Manasseh-li aapagigaa Amon-ηum,
Amon-li aapagigaa Josiah-ηum.

¹¹ Josiah-li aapagigaa Jeconiah-ηum
aniqataiñlu. (Ukua taimani Israel-
aägmiut aullautraupmata Babylon-mun.)

¹² Iñuich tikiutikkaunjanikmata Babylon-mun,
Jeconiah aapagigaa Shealtiel-ηum,
Shealtiel-aasiiñ aapagigaa Zerubbabel-ηum,

¹³ Zerubbabel-li aapagigaa Abiud-ηum,
Abiud-li aapagigaa Eliakim-ηum,
Eliakim-li aapagigaa Azor-ηum,

¹⁴ Azor-li aapagigaa Zadok-ηum,
Zadok-li aapagigaa Achim-ηum,
Achim-li aapagigaa Eliud-ηum,

¹⁵ Eliud-li aapagigaa Eleazar-ηum,
Eleazar-li aapagigaa Matthan-ηum,
Matthan-li aapagigaa Jacob-ηum,

¹⁶ Aasiiñ Jacob aapagigaa Joseph-ηum,
uijan Mary-m, taamna Mary Jesus
annivigikkaña taiguutiqaqtuam Christ-
mik.

¹⁷ Iluqatiñaasiiñ kinuviağıich aullağniiplutin
Abraham-miñ David-munaglaan
akimiağuutailauniqsut, suli aullağniiplutin David-
miñ iñuich aullautraułhatnunaglaan Babylon-
mun kinuviağıich akimiağuutailaupmiñiqsut.
Aasiili iñuich aullautraułhatniñaglaan
akimiağuutailaupmiut kinuviağıich
aniłhanunaglaan Christ-ηum.

Aniñiña Jesus Christ-ñum

18 Uvva Jesus Christ-ñum aniñha itnailipługu inniqsuq. Aakanja Mary nuliaksrausiuianikami Joseph-mun, aglaan katigaluaqatik ilitchuginiqsuq siñaiyautilaágmiñik Ipqitchuakun Irrutchikun.

19 Aasiñ uiksrautaa Joseph nalaunñaruañuniqsuq. Ilisimagaa katchuutiliksrani Mary-mik nalaunñaitkisilaanja, aglaan kanjusaagjuñiñigaa iñuñnun. Taatnamik sivunniğñiqsuq avitchukługu nalunautchipłuni.

20 Taavrumiña isumaaluktitługu Atanǵum isaǵulgan sagviutiniğaa siññaktukun nipliqhuni, “Joseph, kiñuviaǵigaatin David-ñum, sivuuǵanak Mary-mik tuvaaqatniñniaqnilutin atakkii siñaiyaupkaǵaa Ipqitchuam Irrutchim.

21 Igñiqaǵisiruq. Atchiǵisigiñ Jesus-mik. Atakkii anniqsuǵisigai iñuñni killuqsautinjñiñ.”

22 Tamatkua iluqatiń atuumarut tanjiqsaqługu Atanǵum uqauittutigikkańa tumigiplugu taimña sivuniksriqiri,

23 “Taamna aŋjutituqsimaitchuaq siñaiyauniaqhuni igñiqaǵisiruq.

Iñuich taiguutiqaǵisigaat Immanuel”
 (itnautauruaq, Agaayyutim iqatigigaatigut).

24 Joseph-ñum itiqami taimma ilaqtiksraqtaágigaa Mary isaǵulgan Atanǵum uqauittutaagun.

25 Iłaksianjñiñigaa igñiqałhanunaglaan; aasiñ Joseph-ñum atchiǵñigaa Jesus-mik.

2

Puqiksuat Aŋjutit Aggiqsut Kivaknamiñ

1 Jesus anianikman Bethlehem-mi Judeamiittuami, Herod umialgułhani, aŋjutit puqiksaat

tikiññiqsut Jerusalem-mun, apiqsruqtuqhutinj,
² “Sumiimma aniva umialgat Jew-ηjuruat? Tautukkikput uvlugiañ kivaknamiñ, taatnaqhuta aggiqsugut sitqugvigityaqtaqługu.” ³ Umialgum Herod tusaakamiuj taamna isumaalutchajniqsuq iluqatinju Jerusalem-miut. ⁴ Tavra katipkaqługich iluqaisa qaukliñich agaayuliqsit aglaliqirit, ilinjich apiqsruğniñgai sumi Christ, anniqsuqtı akiqsruutauruaq, aniñiaqmagaan. ⁵ Ilinisa kiuniqaat, “Bethlehem-mi Judea-miittuami, itna sivuniksriqiri aglanatigun ittuq,
⁶ ‘Iñuich iñuuruasii Bethlehem-mi, nunanjanittuami Judah-m,
 kamanaññiqsrauñjuruasii akunğatni iñuiñ Judah-m,
 ilipsitñiñ sivulliuqtı aggigisiruq
 anjalatchityaqtaağuni iñugikkamnik Israel-
 ñum.’” *Micah 5:2*

⁷ Herod atanğum nalunautchipļuni puqiksaat anjutit tikisinniñgai, ilitchugiviginiallapiaqługich napmun ilipman uvlugiaq sagviqma-gaan. ⁸ Ilitchugianikamiuj Bethlehem-muquniñgai nipliqhuni, “Aullağusi pakallapi-aqsiuj ililgauraq, aasiiñ paqitkupsiuñ ilitchugipkağumagipsitja. Uvanaptuuq utlakkumagiga sitqugvigityaqtaqługu.” ⁹ Taavrumiña umialgum uqautianikmatiñ aullağniqsut. Tautuñiñaat uvlugiaq qiniñkkaqtinj kivaknamiñ. Sivulliukkauniqsut uvlugiam nutqağniałhanunaglaan inimun ililgauram nayukkajanun. ¹⁰ Tautukamitruñ uvlugiaq quviatchallapiağniqsut. ¹¹ Isiqhutinj

tupiġmun tautuŋniġaat iłilgauraq aakanjalu Mary. Sitquġviginigaat sivuġaanun iłilgauraq. Anjmaġniġaich akisuruagikkatiñ qaitchipluguasiñ maniżñik kaviqsaanik tipraġiksautinigu, frankincense-nik suli myrrh-niglu. ¹² Aasiiñ kilikkauniqsut siññaktukun utiqunijitluginch Herod-mun. Tavra aiñiqsut atlakun apqutikun.

Pigruġniġat Egypt-mun

¹³ Taapkua aullaanikmata isaġulga atanġum sagviġñihsuq Joseph-mun siññaktukun nipliqlihuni, “Makillutin. Pigruutių ililgauraq aakanjalu Egypt-mun, aasiiñ taamaniüttchumausi uvamnun uqautiniaħħapsiknunagħlaan. Atakkii Herod pakajniägħaa ililgauraq tuqqutčugħugħu.” ¹⁴ Joseph makitluni aullautiniägħaa ililgauraq aakanjalu unnuami Egypt-mun. ¹⁵ Immiġñihsuq Atangum uqauttutigħikka ja tumiġiplugu sivuniksriqiri, “Egypt-miñ tuqloġġiha Igħniġa.” Taatnamik tavraniinhiqsut tuquniaħħanunagħlaan Herod-ηum.

Nukatpiäġruurat Tuquġaqtaurut

¹⁶ Herod iłitchuġikami saglutaqtalaġġiñik puqiksaanun aنجutinun qinnallapiäġniqsuq. Tilisiñihsuq tuqqutqupluginh nukat-piäġruurapayaat Bethlehem-miittuat suli iluqaisa avataaniittuat, tamatkua ukiuqaqtuat malġuġiñik nutautluktuatlu, atakkii iłitchuġiplugu puqiksaat aنجutit uqautigħikka jaqstat uvluġiām sagħiġħagħu. ¹⁷ Uqauttutauruaq tumiġiplugu sivuniksriqiri Jeremiah taimña immiġġu, ¹⁸ “Nipi tusaġnaġnihsuq Ramah-mi qiaruaq kiċċuvġupluni.

Rachel-ηum qianiġai qitunġaurani arayunaiqhuni-unniñ
atakkii qitunġanich iluqatinj tuquplutinj.”
Jeremiah 31:15

¹⁹ Herod tuquanikman isağulga Atanġum sagviġñihsuq Joseph-mun siññaktukun Egypt-mi uqaqhuni, ²⁰ “Makillutin aullautiñ ililgauraq aakanjalu nunañanun Israel-ηum. Taipkua tuqqutchiñiaqtuat ililgauramik tuqurut.” ²¹ Makitluni aullautiniġaa ililgauraq aakanjalu nunañanun Israel-ηum. ²² Aglaan tusaakamiñ Archelaus atanġuniplugu Judea-mi inaani aapami Herod sivuugatchañihsuq aullałiksraġmiñik. Kilikkaukami siññaktukun aullaġnihsut nunañanun Galilee-m. ²³ Aasiiñ iñuuniagaqsiplutiñ nunaaqqimi Nazareth-mi. Immuimanihsuq uqautaumaruaq tumigiplugich sivuniksriqirit, “Taiguutiqaġisiruq Nazareth-miumik.”

3

Quliaqtualha John Paptaaqtitchirim

¹ Taipkunani uvloni John Paptaaqtitchiri quliaqtuaġnihsuq iñuilaami Judea-mi, ² uqaqhuni, “Isummitqigitchi atakkii Agaayyutim añaayuqautaa qalliruq.” ³ Taamna John ilaañjuruq sivuniksriqirim Isaiah-m uqautigikkanja nipliqhuni,

“Inuk tuqliraqtuq iñuilaamiñ,
Itqanaiyautisiñ apqutiksraja Atanġum,
nalguġlugu tumiksraja.” *Isaiah 40:3*

⁴ John atnuġħaaqagħnihsuq pikukturuam amian nuyaiñik, qisijmik tapsiqaqhuni, niqiqaqhuni pigligjanik suli igutchaich siġġnaqtaallianj itñik

nanipayaaq paqitchumiuj. 5 Iñuich utlañnigaat John Jerusalem-miñlu, Judea-miñlu, nunaaqqiniñlu avataani kuunjan Jordan-ŋum ittuat. 6 Iñuich quliaġiniġaich killuqsautitij aasiiñ John-ŋum paptaaġniġai kuunjan Jordan-ŋum. 7 Aglaan tautukamigich iñiugiaktuat Pharisee-ŋuruat Sadducee-ŋuruatlu utlautiruat paptaaġvianun uqautiniġai, “Tuqunaliktun nimigiatun ittusi. Qimakkumiñaitchusiasu aggiġñiaqtuamiñ qinnautaaniñ? 8 Qiñiqtittitchi iñuuニアlapsigun isummitqillapliaqtilaapsitñik.

9 Suli isumaniaqasi, ‘Uvagut Abraham-mik aapaqaqtugut.’ Nipliutiniaġipsi uuminja, uyaġaġjniñ makunakħa Agaayyūn iñiċiżihiňauruq ililgaanik Abraham-mun. 10 Ipiġautaqaqtuaq kipriħiňaġuqtuq napaaqtunik kanjiñisigun. Napaaqtupayaaq asirritlaitchuaq kipikkaugisiruq aasiiñ igitauluni ikniġmun.

11 “Iłumun paptaaġipsi imiġmik isummitqiļiġmun, aglaan aqupkun aggiġisiruq kamanatluktuaq uvaġjniñ. Nakuuṇitchuha saagałiksramnik aluġutiknik. Paptaaġisigaasi Ipqitchuamik Irrutchimik suli ikniġmik. 12 Tigummiägigaa tiktittaun salummallapiaġukluginh mukkaaksrat sanikluuġjniñ. Katikisigai mukkaaksrat siġluāġmiñun, aglaan ikipkaġisigai sanikluuġh ikniġmun qamiyumiñaitchuamun.”

Jesus Paptaakkauruq

13 Aquagun Jesus tikiññiċiżuq Galilee-miñ Jordan-mun John-mun paptaaqupluni ilaanun. 14 Aglaan John-ŋum paptaaġuñitkaluagaqsiñiġaa uqautiplugu, “Ilvich paptaaqtaksraġigaluaġikma.

Suvaata utlautivich uvaŋnun paptaaquplutin?”
 15 Aglaan Jesus kiuniġaa, “Nakuuruq. Taamna taatnaġuptigu taŋiġñiagikpuk iluqaan Agaayyutim injaŋa.” John taatna piyumaligñihsuq. 16 Jesus paptaakkauŋjanikami mayuġnihsuq imiġmiñ. Aasiiñ qilak aŋmaqħuni tautuŋniġaa Irrusia Agaayyutim atqaqtuaq tiŋmiaġruuratun mitluni ilaanun. 17 Aasiiñ nipi qilaŋmiñ nipliġñihsuq, “Taamnatavra piqpagikkäga Iġñiga. Quyalisimaagaanja.”

4

Jesus-ġum Aŋiqusaqsiuħha

1 Taatnaanikman Ipqitchuam Irrutchim sivulliġñiġaa Jesus iñuilaamun uuktuaqsiutyaqtilugu tuunġaġmun. 2 Aasiiñ uisauraaqħuni malġukipiani uvluni unnuanilu niġisuliġñihsuq. 3 Uuktuaqtitchirim utlakamiuŋ uqautiniġaa, “Iġñigipiaqpatin Agaayyutim makua uyaġaich qaqqiaġuqtitkich.” 4 Aglaan Jesus kiuniġaa, “Aglausimaruq Agaayyutim uqaħħani, ‘Iñuk iñuunianjitchuq niqiħiħiñakun aglaan uqakipayaatigun aniruatigun qangħaniñ Agaayyutim.’” 5 Tavrani tuunġaum aullautiniġaa Jesus Jerusalem-mun, aasiiñ inillaklugu qutchiñiġihsra ġanun nuvukkajan agaayyuvikpaum, 6 uqautiplugu, “Iġñigipiaqpatin Agaayyutim nutigiagiñ. Aglausimaruq, ‘Tilgisigai isaġuligikkani munaġítqulutin.

Argagikkägmiknik akigaġisigaatin.
 Atniġitchumaittin isigaktin uyaġaŋnun.’” *Psalm 91:11, 12*
 7 Jesus-ġum uqautiniġaa, “Aglausimaruqsuli, Uuktuaġumiñaitchiñ Ataniq Agaayyutin.”

8 Tuunǵaum aullautitqilgiññigaa Jesus qutchillapiaqtuamun iiggimun, aasiñ qiniqtitlugu atanġuvipayaanjiñik nunam kamanautinjñigu.
 9 Uqautiniğaa, “Tamatkua supayaat qaitkisigitka ilipnun sitquġvigigupħja sivumnun.” 10 Jesus-ñum kiuniğaa, “Tuunǵaaq, piiġiñ! Atakkii aglausimaruq, ‘Ataniq Agaayyutigikkan kisan agaayyuvigiyumagiñ savautilugulu.’” 11 Tavra tuunǵaum uniññigaa, aasiñ isagulgich tikiññigaaq savautityaqługu Jesus.

Jesus-ñum Aullaġniigaa Savaani Galilee-mi

12 Jesus-ñum tusaakamiuñ John isiqtauniplugu aullaġniqsuq Galilee-mun. 13 Unitlugu Nazareth utlautiniqsuq Capernaum-mun itchaqtuaqhuni siñaani narvaqpaum nunaŋakni Zebulun-ñumlu Naphtali-mlu. 14 Taamna immiumatquplugu uqauttutauruaq tumigiplugu sivuniksriqiri Isaiah,

15 “Iñuich tamatkua nunaŋakni Zebulun-ñumlu Naphtali-mlu
 tuŋaani narvaqpaum, taaganitchiajanī Jordān-ñum,
 Galilee-mi nunaŋatni Jew-ñuŋitchuat,

16 tamatkua iñuuniaqtuat taaqtuami
 tautuŋniąaat kamanaqtuaq qauma,
 aasiñ qaumam qaggutiniğai iñuuniaqtuat taġġaŋani tuqułhum.” *Isaiah 9:1-2*

17 Tikiññjanikami Capernaum-mun Jesus-ñum aullaġniñigaa quliaqtualħi, “Isummitqigitchi atakkii Agaayyutim aŋaayuqautaa qalliruq.”

Jesus-ñum Tuqluġniğai Sisamat Aqaluŋniaqtit

18 Jesus pisukhuni siñaagun narvaqpañan Galilee-m tautuñiğik aniqatigiik, Simon taiguutiqaqtuaq Peter-mik suli Andrew aniqataa, kuvriqsuak narvaqpañmun aqalunjniaqtaplutik.

19 Uqautiniğik, “Maliksikňa, uvakňaniňaglaan piňňaňniagisirutik iňuňnik aqalunjniaqtitum.”

20 Tavrauvaa Simon-ňum suli Andrew-m uniňňigaik kuvratik malikluguasiiň. **21** Jesus igliqtuiňaqhuni apqusaaqługu narvaqpaňa Galilee-m. Tautukmiňigik aniqatigiik James-lu John-lu, iňnak Zebedee-m, ikimmiruak umiamı aapariňlu Zebedee ilaaqtuiruat kuvramiknik. Jesus-ňum tuqluňiğik maliqupluni. **22** Tavrauvaa uniňňigaak umiaqtik aapariňlu maliklugu Jesus.

*Jesus İlisaütriruğlu, Quliaqtuaqsırırıruğlu,
İlúaqsırırıruğlu*

23 Jesus kukiňuňniqsuq iluqaani Galilee-mi, ilisaütripüni Jew-ňuruat katragviňitňi suli quliaqtuağıplugu tusaayugaallautaç Agaayyutim añaayuqautaata, mavruuqlugillu iňuich atniğňautipayaňitňik. **24** Tusaayugaallautaç Jesus-kun siaminniňsuq iluqaanun Syria-ňum, aasiň iňuich tikiutruňiňaich atniğňapayaqtaut naňirritipayaqtautlu, ilanich irrusiqlüqaqhutinj qiiqsrugtaqhutinj suli avatinich tuquňaplutinj. Jesus-ňum mavruuqniňgai iluqaitňik. **25** Iňugiaktuat iňuich malinjiňaat, aggiqhutinj Galilee-miň, avataaniittuaniňlu nunamiň atiliňmiň Decapolis-mik, Jerusalem-miň, Judea-miňlu, suli nunamiň igluani ittuam Jordan-ňum kuuňan.

5*Jesus-ηум Quliaqtuałha Igğimi*

¹ Jesus-ηум qiniqamigich iñugiallapiaqtuat mayuġniqsuq qimiġaamun, aquvitluniasii. Maliguaqtai Jesus-muñniqsut.

Quviasuutipiağatat

- ² Ilaan ilisautiaqsiňigai nipliqhuni,
- ³ Quvianamiurut tamatkua ilitchuqsiruut inuqs-rakıgmiknik irrutchikun, atakkii Agaayyutim añaayuqautaa pigigaat.
- ⁴ Quvianamiurut tamatkua kiňuvğuruut, atakkii Agaayyutim arakkisigai.
- ⁵ Quvianamiurut tamatkua piisaanjitchuat, atakkii nunapayaaq pigigisigaat.
- ⁶ Quvianamiurut tamatkua kimmutiqaqtuat nalaunjaruałigmik, atakkii Agaayyutim pisuiqsimaaqtitkisigai.
- ⁷ Quvianamiurut tamatkua nagliktauruut, atakkii Agaayyutim nagliktuğisipmigai.
- ⁸ Quvianamiurut tamatkua uummatiqaqtuat ipqitchuamik, atakkii qinigisigaat Agaayyun.
- ⁹ Quvianamiurut tamatkua tutqiutiqaqtitchiruut akungatni iňuich, atakkii Agaayyutim taiguutiqağısigai qitungağmiňik.
- ¹⁰ Quvianamiurut tamatkua piyuqaqsiuruut piqutigiplugu nalaunjaruałiq, atakkii Agaayyutim añaayuqautaa pigigaat.
- ¹¹ Quvianamiurusi piňilaqsrutigikpasi suli piyuagusi suli niplialutin qanusipayaanik pigiitchuanik ilipsigun saglaturuağılusı

pisigilugu maliguaqtalıqsi uvamnun.
12 Quviatchapiaǵataǵitchi atakkii kamanaqtuq akiliusiaksraqsi ittuaq qilaŋmi. Taatnatuntuuq piyuaqsiupmińiqsut taipkua sivuniksriqirit sivupsitńi iñuuniaqtuat.

Iñuich Ittut Tagiutunlu Qaummaqtunlu

13 “Ilipsi tagiugigaasi nunam. Tagiuq tagiugniigumi qanuġuni tagiugniłitqikkisiva? Atuġumińaiqsuq aglaan igitaksraqułhińaqtuq tutmiǵaǵuqhuni iñuŋnun. **14** Naniǵigaasi nunam. Nunaaqeqiq nappakkauruaq qimiǵaamun iriqsimatlatchuq. **15** Kisupayaam ikitnamiuŋ naniq ilitlaikaa ataanun utkusium aglaan naniqaǵviňmun qaummatautlasiplugu tupqum iluani ittuapayaanun. **16** Taatnatun qaumapkaqsigik nannisi sivuǵaatni iñuich. Tautukkumagaat savaallautaqsi, aasiiń kamaksruaqsilugu aapari ittuaq qilaŋmi.

Jesus Iłisautriruq Maligutaksrakun

17 “Isumanasi aggigńiluŋa piyaqquǵiaǵlugich maliǵutaksranji Moses-ŋum naagaqaa ilisauktuttiŋich sivuniksriqirit. Aggińitchuŋa piyaqquǵiaǵlugich aglaan tanjiǵiaǵlugich. **18** Uqautigipsi, Qılagli nunalu piigumińaitchuk aglausimaruapayaaq maliǵutaksrani immiu-magaluaqnagu. **19** Kińapayaaq navguiruaq kamanaińńiqsrallapiąjatnik tillisit aasiiń ilisautripluni atlanik iñuŋnik taatnaquplugich, taamna iñuk kamanaińńiqsrauniaqtuq ukunakŋa iñuŋniń Agaayyutim ajaayuqautaani. Aglaan kińapayaaq kamaksriraq tillisińik ilisautripluniasiń atlanik taatnaquplugich, taamna

iñuk taiguutiqağisiruq kamanaqtuamik ukunakŋa iñuŋniñ Agaayyutim aŋaayuqautaani. ²⁰ Uvva uqautigipsi, Nalaunŋaruaļiqsi nakuutluŋitpan iñuuniağusiatniñ aglaliqirit suli Pharisee-ŋuruat suoramikunniiñ isığumiňaitchusi aŋaayuqautaanun Agaayyutim.

Jesus Iłisautriruq Qinnautiłikun

²¹ “Tusaamarusi uqautauruamik iñuŋnun injigaan, ‘Iñuağniaqnak’. Kiñapayaaq iñuaqtuaq tikiutraugisiruq atanniiviŋmun. ²² Aglaan uqautigipsi, Kiñapayaaq qinnautriruaq aniqatmiňik tikiutraugisiruq atanniiviŋmun, suli kiñapayaaq nipliraqtuaq aniqatmiňun suksrauŋiňniplugu tikiutraugisiruq uqaqsittaağviŋmun, suli kiñapayaaq nipliraqtuaq aniqatmiňun kinnauniplugu tikiutraugisiruq iknijanun anasiňjuqsağvium. ²³ Taatnamik, aatchuuityağniğuvich aatchuutiksraqnik Agaayyutmun tunillaqtuğviŋmi itqağluguasiiň aniqatvich sua-tasamma akikŋautaa ilipnun, ²⁴ unillugu aatchuutiksrautin sivuğaanun tunillaqtuğvium aasiiň iluaqsityaqqaglugu taimña akiŋautaa aniqatiupnun, aasiili utiğutin aatchuutigityağlugu aatchuutiksrautin. ²⁵ Akilliğikkaqpich uqaqsittaağviŋmuutiniaqpatin ilauraağiliutiyumagiň qılamik piqatigiňjaan apqutmi. Aatchuutigiviağaatin atanniqsuqtimun, aasiiň atanniqsuqtim qaiłlutin qaunaksrimun isiqtautqulutin. ²⁶ Uqautigikpiň, Aniyumiňaipiaqtutin kisianik akiliiguvich akiqsruutipnik ilaanun.

Jesus Iłisautriruq Atlatułikun

27 “Tusaamarusi itna uqaqsimaruamik, ‘Atlatuġniaqnak.’ **28** Aglaan uqautigipsi, Kiñapayaaq qiniqtuaq agnamik ikligiplugu atlatuaniktuq isumamiñi. **29** Taliqpium irivich killuqsaqtitpatin piiġlugu igirruŋ. Nakuutluġniaqtuq piyaqqugupku ilaviñga timivich uumakŋa iluqaan timivich igitaułiksrajanıñ anasiñjuqsaġvijmun. **30** Suli taliqpium argakpich killuqsaqtitpatin kipilugu igirruŋ. Nakuutluġniaqtuq piyaqqugupku argalhiñan uumakŋa iluqaan timivich aullałiksrajanıñ anasiñjuqsaġvijmun.

Jesus Iļisautiriuq Aviłikun

31 “Uqaqsimaruqsuli, Kisupayaam avitkumiuj nuliani qaitchiļiuj aglaamik nalupqinaigutinik avinnikun. **32** Aglaan uqautigipsi, Anutim nuliani tuniqsimagaluaŋjaan ilaanun avitkumiuj atlatuqtitkaa. Taamna avittuaq patchisauruq. Suli aŋun nuliaqtuaq avittuamik atlatuqmieuq.

Jesus Iļisautiriuq Akiqsruutigun

33 “Tusaasimagiksisiuli itna uqautaumaruaq iñugikkaptiknun iñilgaan, Akiqsruqtaġuvich navinjñaqngu aglaan atuumayumagiñ akiqsruutigikkan iñuŋnun Atangum sivuġaani. **34** Aglaan uqautigipsi, Sumiunniiñ akiqsruġumiñaitchusi qilakun atakkii qilak Agaayyutim aquppiutaġigaa, **35** naagalu nunakun atakkii iñiqtuiqsiaqvígigaa isigaŋmiñun, naagalu Jerusalem-kun atakkii nunaaqqiġigaa kamanaqtuam umialgum. **36** Naagaqaa akiqsruġumiñaitchutin niaqupkun, atakkii atausiq nuyaq qatiqsipkaġumiñaitkiñ unniñ taaqsipkaġlugu. **37** Taatnamik, anġġniaġuvich anillapiġumuutin suli naagaġġiaġuvich

naagaallapiagutin, atakkii supayaam uqałhum illatauruam tamatkuñnuja pigiitchuamitñaqtauruq.

Jesus Iłisautriuq Akisaqtulikun

38 “Tusaamagaksi uqautturaaq, ‘Iri akisautiqağlı irimik, kiguttuuq kigutmun.’ **39** Aglaan uqautigipsi, Akisaqtugniaqnu iñuum pimaqluktaqpatin. Kisupayaam isaksaqpatin taliqpiagun iqusraqpich alağumagiñ igluanik iqusraqpich. **40** Kisupayaam akiłiipkagniaqpatin atnuğaapnik uqaqsittaağvíñmi pipkağumagiñ quppiğaan. **41** Suli aŋuyaktim nunurilusi saagaqtipasi natmaŋmiknik atautchimik mile-lamik saagautiyumagiñ malǵuñnik mile-laaknik. **42** Iñuum injiqpatin sumik-tasamma qaitchumagiñ ilaanun. Suli iñuk atugaksragukpan itigautipkağniaqnu.

Piqpagiyumagisi Uumiksrigikkasi

43 “Tusaamagaksi itna uqaqsimaruqaq, ‘Piqpagiyumagisi iñuuniaqatiusi aasiñ uumigilugich uumiksrigikkasi.’ **44** Aglaan uqautigipsi, Piqpagiyumagisi uumiksrigikkasi suli agaayutilugich tamatkua piyuaqtigikkasi. **45** Taatnaağupsi qiniqtikksi iñuñun iluaqqun atriplugu aapari qilañmi ittuaq, atakkii siqiñini siqiññaağıksitkaa pigiitchuanunlu nakuuranunlu suli sialuktitlugu nalaunnaruanunlu nalaunñaitchuanunlu. **46** Piqpagigupsigik kisiitñik tamatkua piqpaksrigikkasi, suvaata akiññaktaaqağniaqpisi Agaayyutmiñ? Taatnatun tax-siliqirit pitlapmiut. **47** Suli paqlagupsigik kisiitñik aniqatiusi, savaaqağniqpisi pitłukhusi atlaniñ? Taatnatuntuq tax-siliqirit pitlapmiut.

48 Taatnamik nalaunñaruksraurusi atrilugu aapagikkaqsi qilañmi nalaunñallapiaqtuaq.”

6

Jesus Iłisautriruq Nagliktuutitigun

1 “Qaunagititchi savaaqniqasiusiñ nalaunñaruakun savaaqsi qiñiqqusaaqsiñagusi sivugaatni iñuich. Taatnağupsi aa-papsi qilañmiittuam akiliqumiñaitkaasi.

2 Taatnamik aatchuğuvich nagliktuutinik nipitusirağautiginiaq nagich atrilugich ukpiñjuaqtit Jew-ñuruat katragvinjitiñi suli tumitchiani kamásruqusaaqsiñaqhutin iñuñun. Uqautigipsi, akiliusiaqaaniktut. **3** Aglaan aatchuğuvich nagliktuutinik inuqsraqtuanun saumik argaiñ ilisimapkağniaq nagu taliqpium argakpich savaajanik. **4** Nagliktuusitchi nalunaqtuaqun. Aapavich qilañmi qiñitlaruam supayaanik akiliusiaksritkisigaatin.”

Jesus Iłisautriruq Agaayułikun

5 “Aasiisuli agaayugupsi piñiaqasi atrilugich ukpiñjuaqtit, atakkii agaayullaturut makitaplutinj katragvinjitiñi suli saqquvinjitiñi tumitchiat qiñillañniaqplutinj iñuñun. Uqautigipsi, akiliusiaqaaniktut. **6** Aglaan agaayutyağniağuvich isiğutin inipnun taluluquasiñ suli agaayuyumautin aapapnun qiñignaitchuamun. Aapavich qiñitlaruam nalunaqtuaqun akilligisigaatin.

7 Suli agaayuguvich niplirağniaqnak imailaanik uqautinik atrilugich ukpiqtuauñjitchuat, atakkii isumasuurut Agaayyutmun tusaagisiñiplutinj taklıługu agaayugumiñ. **8** Tuvrautinası,

atakkii Agaayyutim aapapsi ilişisimaga sumik inuqsraqtilaaqsi apiqsruğaluaqtitnasi ilaanun.

⁹ Itna agaayuyumuusi,

‘Aapapta qilañmiittuatiin!

Iñupayaaq nunami kamaksrili ilipnik ipqiqsitlugu taavrumuuna atqin.

¹⁰ Aullaġniili aŋalatchiħiñ iñupayaanik.

Iñupayaaq nunami tupiksrlili pisułiġikkapnik qilañmi itmatuntuuq.

¹¹ Aatchuqtigut uvluġaġikpan niqimik inuġikkaptiknik.

¹² Suli natqigutiluta killuqsautiptiknik natqigutrisimaaqmatun tamatkua savamaqķuutriruanik uvaptiknun.

¹³ Suli sivulliutiniaqasigut uuktuaqsiułigmun, aglaan annautiluta pigiitchuamiñ.

[Atakkii umialgurutin saññipayaqaqhutin kama-nautiqaqhutinlu isuitchuamun. Amen.]’

¹⁴ Atakkii natqigutigupsigik iñuich killuqsautrigikkasi, Aapapsi qilañmiittuam natqigutigisip-migaasi. ¹⁵ Aglaan natqigutijitkupsigik iñuich killuqsautrigikkasi, Aapapsi qilañmiittuam natqigutiyumiñaitmigaasi killuutipsitñik.”

Jesus Iłisautriruq Uisauraalikun

¹⁶ “Suli uisauraağupsi, qiniñaqaqnasi ipiqtunaqsilusi ukpiñjuaqtitun. Qiniñagħiiliraġaġniġaich kiiñatiż qiniqqusaaħħiñaqħutiż iñuñun ilinjietñik uisauraaligmikni. Uqautigipsi, akiliusiaqaaniktut.

¹⁷ Aglaan uisauraağupsi uqsruqtıglugich niaqusi, suli iġġuġlugini kiiñasi; ¹⁸ Qiniqtiħiñaqħiaqası iñuñun uisauraağusi aglaan Aapapsitñun

qiñigñaitchuamun, suli Aapapsi qiñiqtuam nalunaqtuakun akiliusiaksritkisigaasi.”

Jesus Iļisautriruq Umialgutitigun

19 “Tugvaiñasi umialgutinik marrumuña nunamun, qupilgullu qałhumlu piiñgiqsakkajanun, suli tiglinniaqtit siqumitchiplutij tigliktuğviatnun. **20** Aglaan tugvaisitchi anniğikkapsitñik qilañmun qupilgullu qałhumlu piiñgiqsagumiñaisajanun, suli tiglinniaqtit siqumitchumiñaisajatnun tiglinniağutij. **21** Atakkii anniğipayaakkavich irviatni uummatin tavraniitkisipmiuq.”

Jesus Iļisautriruq Qaummatigunlu Taaqtuakunlu

22 “Iri naniğigaa timim. Irrakkiñ qiñitlakpaknik qaunagilguniaqtutin aullapayaağuvich. **23** Aasiiñ irrakkiñ pigiitpaknik ilvich saptaaqsiñiaqtutin. Aglaan qiñilguitchupku Agaayyun [kanjıqsitlaillutin pisułhanik] qanutunaglaan taaqtuaq ilipni tatamnaqtiginiaqpa!”

Jesus Iļisautriruq Agaayutikunlu Isumaaluutitigunlu

24 “Kiñaliqaa savautriyumiñaitchuq malğuñnik anjaayuqaqağuni. Atakkii uumigigisigaa ilaqtataa aasiiñ piqpagilugu ilaqtataa, naagaqaa iluq-nauqsimaağisiruq ilaqtataanun aasiiñ suksraağlugu ilaqtataa. Savautriyumiñaitchutin iluqaaknik Agaayyutmiglu maniñmiglu. **25** Taatnamik uqautigipsi, isumaaluñniaqasi iñuułipsitñik, sumik niğigisipmagaapsi suli imiğusi, naagaqaa timigikkaqsi sumik atnuğaağisipmagaapsi. Uvva iñuułiq pitluktuşaňunjtpa niqimiñ suli timi atnuğaaniñ? **26** Qiñiqsigik tiñmiurat silami.

Nautchirriitlaitchut naagaqaa kipritlaitchut tugvailutinjuq siġluāġmiknun. Naagauvva Aapapsi qīlañmiittuam niġipkaqsimaġaġigai. Ilipsimi akisutluktuənjuññiçpisi tiñmiuraniñ? ²⁷ Nallipsi isumaaluguni iñuuniqtusilaagiśivauñ iñuułli? ²⁸ Suli suvaata isumaalugaġivisi atnuġaaksrapsitñik? Isummatigillaksigik qanuq nauriat nunami nauraġitilaajatnik. Savatlaitmiut naagaqaa ukiħarritolaitmiut. ²⁹ Aglaan uqautigipsisuli, Solomon-unniñ qanutun kamanaqtigigaluaqħuni atnuġaqaqnejññiçsuq atriplugich piññaqnaqtuat nauriat. ³⁰ Taatna Agaayyutim qaunagħitlanipqagħiċ īvgħiċ ittuat ugluvak aasiiñ uvlaakun igitauplutiñ iknigmun, qaitchigisigaasi atnuġaanik inuġikkapsitñik. Ukpinqsriżikiññiaqpat! ³¹ Isumaalukasi itnaġusi, Sumik niġiñiaqpsa imiġatalu atnuġaqaġatalu? ³² Atakkii ukpiñaitchuat isumaalukmiraqtut supayaanik tamatkuniña. Aasiiñ aapari qīlañmiittuaq ilisimaruq inuqsrashaqtaapsitñik iluqaitñik tamatkuniña. ³³ Pakaaqqaġilugu Agaayyun anjalatchiruaq nalaunjaġaruaġpluni umialiktun. Taatnaġupsi qaitchigisigipsi inuġikkapayaapsitñik. ³⁴ Taatnamik isumaalunjaqasi uvlaakuksramik atakkii uvlaakuksraq isumaaluutiqaqtuq iñmigun. Uvlulaat iluilliuġutiqaaniktut iñmigulaa.”

7

Jesus Iļisautriruq Atanniijlikun

¹ “Atanniijjaqasi atlanik, Agaayyutimli atanniijtchumagaasi. ² Atakkii atanniigupsi atlanik, taatnatantuq atanniikkaugisipmiusi.

Taatnatuntuuq qanuq irrutrigupsi atlanik irrutikkaugisipmiusi. ³ Suvaata tautukpiuñ irriutañuluuraq aniqatvich iraani aasiñ suliqutigijitługu tamanna qirugraitchiaq iripni? ⁴ Qanuğuvva uqautriñiägnipich aniqatiupnun, ‘Piğlagu irriutanjuluuraq irimiitan,’ qiniñisunjaqnagu qirugraitchiaq irimiitan? ⁵ Ukpiñjuaqtii, sivulliulugu piiqsirruñ qirugraitchiaq iripniñ. Qiñilgungiñli nalupqinaigługu irriutaiqsiłiksran aniqatvich iraaniñ. ⁶ Qaiññiaqasigin ipqitchuat sut qipmiñun, atakkii saatpiagaasi siqumitchugusi. Naagaqaa iginniaqasigin akisuruat suñaurat sivuğaatnun kuniat, atakkii tutmaluginiağıach isigañmiknik.”

Agaayusitchi, Pakakkitchi, Katchaktuqqitchi

⁷ “Injigupsi qaisaugisiruq ilipsitñun, pakaaqagupsi paqitkisigiksi; katchaktuğupsi talu anmakkauniaqtuq ilipsitñun. ⁸ Atakkii kiñapayaaq injiqsruqtuaq akuqtuigisiruq, suli pakaaqaqtuaq paqitchigisiruq, suli talu anmakkaugisiruq kisupayaamun katchaktuqtuanun. ⁹ Kia iğñiñi qaITCHIGISIVAUÑ UYAĞAMIK INIQPAN QAQQUQTUGUGUNI? ¹⁰ Naagaqaa qaITCHIGISIVAUÑ NIMİGİAMIK INIQPAN AQLUKTUĞUGUNI? ¹¹ Pigiitchaluaqhusi ilisimarağıgiksi qanuq qaITCHIŁIKSRAQSİ nakuuruanik sunik qitungaurapsitñun, maatnaasu aapasi qilañmiittuaq qaITCHIŃIAPIAQTUQ nakuuruamik tamatkunuña injiqsruqtuanun ilaanun. ¹² Qanusipayaatigun irrutitqusuugupsi atlanun iñuñnun taatnatuntuuq irrutriyumausi atlanik. Taavruma atunim iligai iluqaisa

ilisauttutinich sivuniksriqirit suli maligutaksrañi Moses-ñum.”

Amisuuraqtuaq Paa

13 “Isigitchi amisuurakun paakun. Atakkii paa sivuniqaqtuaq piyaqqugviksramun aŋiruq, suli tumi tasamuña qaǵanaqtuq aasiiñ iñugiaktuat igliǵvigiplugu. **14** Aglaan paa sivuniqaqtuaq iñuułigmun amisuuraqtuq suli apqun tasamuña qaǵanaitchuq. Aasiiñ iñugiakisuurat paqitkaat.”

Napaaqtuq Ilisaǵigaat Asianı̄gun

15 “Qaunagititchi sivuniksriqinjuaqtuanik utlautruqtuat ilipnun atnuǵaagutinj ipnaisun qaamiktigun, aglaan ilumiktigun amaqqutun ugiaǵnaqhutiñ. **16** Asianı̄sigun ilisaǵiniaǵisi. Iñuich asiaǵniaǵuvat asiavińnik kakitluñnaniñ, naagaqaa aqpińnik kakitlaǵnaligaaniñ? **17** Napaaqtuǵiksuaq nauriraqtuq asiaǵiksuanik, aglaan napaaqtuǵiilaq nauriraqtuq asiaǵiitchuanik. **18** Napaaqtuǵiksuaq nauritlaitchuq asiaǵiitchuanik, suli napaaqtuǵiitchuaq nauritlaitchuq asiaǵiksuanik. **19** Napaaqtupayaqaq asirritlaitchuaq asiaǵiksuanik kipikkauraqtuq igitaupluniasiñ iknigmun. **20** Taatnamik asianı̄sigun ilitchuǵiniáǵisi, ami iñuuniallaułhatigun.”

Qanauunniñ Naluniǵipsi

21 “Kiñapayaqaq uqaqtuaq uvajnun, ‘Ataniiq,’ isiǵumińaitchuq aŋaayuqautaanun Agaayyutim, aglaan kisiitńnik tamatkua tupiksriuat pisułhanik aapam qilaŋmiittuam. **22** Aqullığmi uvulumi iñugiaktuat iñuich uqaǵisirut uvajnun,

‘Ataniiq, sivuniksriqisuurugut atigikkap kun anitqataqlugich irrusiqħuich suli savaaqaqhuta iñugiaktuanik quviqnaqtuanik.’²³ Aasiiñ nalupqinaigħlu uqautigisigitka, ‘Piġitchi uvañniñ. Iļisimanjiñniġipsi, pigiiliqirisii!’ ”

Malġuk Tuppirk

²⁴ “Taatnamik kisupayaaq tusaaruaq tamatkunija nipliuttutigikkamnik aasiiñ atuġlugin, atriqaqtuq puqiksaamik iñuñmik tuppiruamik uyaġaum qaajanun.²⁵ Sialugruaġuqman kuugich ulitlutin, suli anuqkligruaġuqman makitalgupluni taamna tupiġ ulġuñiñniqsuq, atakkii turviqaqħuni uyaġajmik.²⁶ Aglaan kisupayaaq tusaagaluaqħuni nipliuttutimnik atuumanjitñamigich atriqaqtuq isumalguitchuamik iñuñmik tuppiruamik qaviam qaajanun.²⁷ Sialugruaġuqman kuugich ulitlutin, suli anuqkligruaġuqman makitalguitluni tupiġ ulġuniqsuq suksraungillapiaqħuni.”

²⁸ Jesus uqañaiqman taapkuni ja iñugiaktuat iñuich quviġusunjiq su il-lisauttutaiñik.²⁹ Atakkii Jesus-ηum il-lisautiniġai aنجalatchisizaqtuatun iñuktun, atrisuñaq nagħiġi agħaliqirit.

8

Jesus Mamitħiruq Auyugaqtualijmik

¹ Jesus atqaqman qimiġaamiñ, iñugayaqpaurat maliñniġaat.² Tavrani auyugaqtualgum utlakami sitquġviginigħha sivuġa anun uqaqħuni, “Ataniiq, pisuksiñaqħuich mamitħihiñ augikma.”³ Jesus-ηum isaklugin, argakni aksnejnigħha nipli qħalli, “Piyummatiqaqtu ja, mamittin!” Tavrauvaa

аңутим аuyugaqtuaña mamitikkauruq. ⁴ Jesus-ŋum uqautiniğaa, “Uqağniaqnak kisumununniñ iñuŋmun, aglaan tautuktitchaqtuağıñ agaayuliqsimun isivǵiuqtillutin. Aatchuiyumautin tunillautinik Agaayyutmun tuvrağlugu Moses-ŋum tillisaa. Taatnağuvich iñupayaam ilitchuğiniağaa mamitilaan.”

Jesus Mamititchiruq Añuyyiqtaiñ Qaukliata Savaktaanik

⁵ Jesus tikitman Capernaum-mun, añuyyiqtit qaukliata Rome-mağmium paagñigaa apiqsruqługu ikayuqupluni. ⁶ Tavra nipliğñiqsuq, “Ataniiq, savaktiga amma kinjunimni nalaruq aulatlaITCHUAQ ikuilliullapliaqhuni.” ⁷ Jesus-ŋum nipliutiniğaa, “Utlakkisigiga aasiñ iħuaqsilugu.” ⁸ Añuyyiqtit qaukliata kiuniğaa, “Ataniiq, utlaktaksrauñiļuqtuňaunniñ tupimnun, aglaan tillisiqalhiñağıñ savaktigali iħuaqsiyumuq. ⁹ Atakkii aŋalatiqaqmiuňa qaukligñik suli añuyyiqtinqaqluňa aŋalatamnik. Tilikapku una, ‘Aullağıñ!’ aullağaqtuq. Suli tilikapku taamna, ‘Qaġġaiñ!’ aggigaqtuq. Suli tilikapku savaktigikkaġa, ‘Taamna piuň!’ piraġigaa.” ¹⁰ Jesus-ŋum tusaakamiuň taamna quviġusunjiqsuq. Nipliutiniğai iñuich maliktuat iñmiñik, “Iłumun uqautigipsi, paqitchiňitchuňa Israel-unniñ kisumik ukpiqsrillapliaqtuamik uumatun. ¹¹ Suli nipliutigipsi, Iñugiaktuat Jew-ŋunjitchuat aggigisirut kivaknamiň suli kanaknamiň aquvillutiňaasiiň niġiqpaktuani Agaayyutim aŋaayuqautaani piqatigilugich Abraham-lu Isaac-lu Jacob-lu. ¹² Aglaan tamatkua

Agaayyutmun qitunġaginiruat igitaugisirut taġniqsrallapiamun. Tavrani qiagisirut tiriqulalutinjunniiñ kigutinjich.” ¹³ Jesus-ηum nipliutiniġaa aŋuyyuqtit aŋalataat, “Aŋilaagiñ. Ukpisriłłapkun iñiqtaugisiruq.” Taavrumataavra savaktaa mamitkaniktigħiġihsuq taavrumani sassaġniġmi.

Jesus Mamititchiruq Iñugiaktuanik Iñużjnik

¹⁴ Jesus isiqami Peter-m tupqanun tautuġnīgħaa Peter-m aakaru ja nalaruaq uunaqluktitluni. ¹⁵ Jesus-ηum aksinjñiġaa argaigun aasiiñ uunaqluħajnejhuni. Tavra makitiqhuni niqliuġutiaqsiñiġai. ¹⁶ Unnuksraaqman iñugiaktuat irrusiqluqaqtuat tikiutruġniġaich ilaanun, aasiiñ Jesus-ηum anittaqnīgħai irrusiqluich uqaliġmiñik, suli iluaqsiplugħiċċi iluqaisa atniġħnaqtuat. ¹⁷ Atuumakamiu ja taamna tanjīgħiġaa sivuniksriqim Isaiah-m uqautigikkha, “Ilaan piġġai sayairrutivut timikun suli akigaġiplugħiċċi atniġħnautivut.” *Isaiah 53:4*

Iluqnaunitchuat Maliguqaqtit

¹⁸ Jesus-ηum tautukamigħiċċi iñugayaat avatimiñi tiliñiġai maliġuqaqtini ikaaquplugin ħiġlu un narvaqpaum. ¹⁹ Aglaliqiri utlautiniqsuq ilaanun nipliħuni, “Ilisautrii, malikkisiikpiñ sumupayaġuvich.” ²⁰ Jesus-ηum kiunigħaa, “Kavyqtut sisijaqtut tiġi miuratlu silam u gluqqaqħutin, aglaan Iġnijen Iñnum iniksraitkaa napmun tullaħiksra ja niaquġikkaġmi.” ²¹ Atlamsuli maliġuqaqtim nipliutiniġaa, “Ataniiq, iluviġi allakti qqaġlu

aapaga malikkumaikpiñli.” ²² Aglaan Jesus-ŋum uqautiniğaa, “Malinŋja, tamatkua tuquŋaruat irrutchikun iluviqsillich tuquŋaruanik.”

Jesus-ŋum Quunniğuqtitkaa

²³ Aasiiñ ikiniqsuq umiamun malığuaqtaiļu malikhutin. ²⁴ Tavrakŋatchiaq anuqlıgruağrıqniqsuq narvaqpak qaiqpaich immautruğníaliqługu umiaq, aglaan Jesus siñiktuağniqsuq. ²⁵ Maliğuaqtaiñ utlakługu iqiiqsaqniğaat nipliħutinj, “Ataniiq, anniqsuqtigut piyaqquaqsirugut.” ²⁶ Aglaan nipliutiniğai, “Ükpiqsrilikiññiaqpat! Suvata iqsivisi?” Makitnami iñiqtignigik anuğilu qaiqpaillu, aasiiñ quunniğuğniqsuq. ²⁷ Maliğuaqtai quvigusukhutinj uqağniqsut, “Qanusiuniqpa una aŋun anuğimunniñ qailiqpauratlu kamagivatruñ?”

Jesus Mamititchiruq Malğuŋnik Aŋutik Irrusiqłuqaqtuak

²⁸ Jesus tikitman igłuanun narvaqpaum nunaŋanun Gadarenes, malğuk aŋutik irrusiqłullak nuyuagnallapiaqtuak aggıqhutik iluviğniñ paağniğaa, kia-unniñ iñuum qaaŋiłguisak apqutmi. ²⁹ Iğialaniqruk, “Suniaqpisiguk? Aggiqpich nagliksaaqtitchaqtuahunuk sivuanı piviksram?” ³⁰ Kuniaqağniqsuq iñugiallapiaqtuanik niğiruanik uŋasipianjitchuami. ³¹ Irrusiqłuich iñiqsruağniğaat Jesus, “Aninniağuptigut tuyugisigut tamatkunuŋa kunianun.” ³² Jesus-ŋum nipliutiniğai, “Aullağıtchi!” Aasiiñ anikamij malğuŋniñ aŋutiŋniñ isığniqsut munaqsranun kunianun. Iluqatiŋ kuniat paŋaliŋniqsut tuŋaanun narvaqpaum, naparaqhutinj qutailakun ipnakun

aasiiñ ipiplutiñ. ³³ Qaunaksriruat kunianik pigruğniqsut nunaaqqimun. Tarani uqautiginiġaat iluqaan qanuqtilaañak aŋutik irrusiqłullak. ³⁴ Iluqatin nunaaqqim iñuiñ paägnigaat Jesus. Tautukamitruñ iñiqtignigaat unitquplugu nunaqqiqtiñ.

9

Jesus Mamititchiruq Aŋutmik AulatlaITCHUAMIK

¹ Jesus ikipluni umiamun ikaağniqsuq aasii tikitluni nunaqqimiñun. ² Ilañich iñuiich tikiutriñiqsut aulatlaITCHUAMIK nalaruamik ikivgani. Jesus-ŋum tautukamiuñ ukpiqsriħhat nipligñiqsuq aulatlaITCHUAMUN, “Ilauraamaaŋ, quviatchaugigijñ. Killuqsautitin natqigutikkaurut.” ³ Ilañich aglaliqirit uqağniqsut iñmíknun, “Una iñuk uqağniqłuktägnisuuq.” ⁴ Jesus ilisimaplugich isummatiñich nipligñiqsuq, “Suvaata isumavisi pigiITCHUANIK? ⁵ Nalliaknik qağanatlukpa nipliqsuni, ‘Killuqsautitin natqigutikkaurut,’ naagaqaa nipliqsuni, ‘Makillutin pisugiñ?’ ⁶ Iltchuğitquqipsi Igñiñjanik Iñuum aŋalatchisraqtilaañjanik nunami natqigutritlaruamik killuqsautinik.” Tavraasiñ nipligñiqsuq aulallaitchuamun, “Makillutin tigulugich ikivgatin aggijñ.” ⁷ Aŋjun maktluni aiñiqliqsuq. ⁸ Iñugayaat qiñiqtuat taavruminja quviğutchañniqsut, aasiiñ kamaksruğniġaat Agaayyun qaitchiruaq taatnatchimik aŋalatchiħġmik iñuŋnun.

Jesus-ŋum Tuqluġaa Matthew

9 Jesus aullaqami tavrakŋa tautuŋniŋaa aŋun atilik Matthew-mik aquppiruaq tax-siliqivinŋmi nipliutipluguasii, “Malinŋja.” Matthew-m makitluni malinŋniŋaa. **10** Jesus niġiňiaqtitlugu Matthew-m tupqani iñugiaktuat tax-siliqirit suli killuliqirit isiqhutinj niġiqasiġniġaich Jesus-ŋum maliguaqtaiňlu. **11** Pharisee-ŋuruat tautukamitruŋ taamna apiqsruġniġaich maliguaqta, “Suvaata ilisautriksi niġiňiaqatauva tax-siliqirini suli killuliqirini?” **12** Jesus-ŋum tusaakamiuŋ Pharisee-ŋuruat apiqsruutaat nipliġniqſuq, “Tamatkua surruitchuat inuqsratlaitchut taaktimik, aglaan tamatkua atniġñaqtuat. **13** Ki, iłitchaqsiuŋjata taavruma uqałhan qanuutautilaajanik, ‘Kimmutigitlukkiga nagliktaq uumakŋa tunillaqtulığmiň.’ Agginjitchuŋa tuqluġiaġlugich nalaunŋaruat, aglaan killuliqirit.”

Apiqsruun Uisauraalikun

14 Maliguaqtaiň John-ŋum utlaŋniġaat Jesus aasii apiqsruqkügu, “Suvaata uvagut Pharisee-ŋuruatlu uisauraagħaġvisa aasiili maliġuaqtitin taatnatun piñġitmipkaqkluġich?” **15** Jesus-ŋum kiuniġai, “Iłauraanji iłaqatniŋniaqtuam alianniutlaitchut ilaan nayuqatauħħani ilinjietni. Aglaan katchuutiniaqtuam unitchiviksra ja tikiňňiaqtuq. Tavrali aullaanikpan iłauraanji alianniugħisirut uisauraagħutiż. **16** Iñuk iłaaqtuitlaitchuq nutaamik iliqniġmik atnuġaaloŋmun, atakkii iłaaġħutauruaq algutiniaqtuq utuqqaqtuamiň atnuġaamiň aasiiň allaq aglitlukħuni. **17** Naagaqaa iñu ich kuviritlaitchut nutaamik misuqqumik puuğruanun. Taatnaġaluaqmikpata puuğruat

qaag̊niaqtut aasiin misuuguq kuviluni suli puunjich suksraung̊igutin. Aglaan kuviragiata nutaaq misuuguq nutaamun puumun. Iluqatikli puuglu misuuguq piiñgiñitchumuuk.”

Jairus-ñum Pania suli Aġnaq Aksiñiktuaq Jesus-ñum Atnuġaajanik

18 Taatna uqaqtitlugu tamatkunuja sivulliuqtim Jew-ñuruat katragviata tikiññiqsuq sitquqhuni sivuġaanun Jesus nipliqhuni, “Paniga amma tuquqammiqsuq. Maligluja aksigiaġun argaknik iñuuluniasiñ.” **19** Jesus-ñum makitluni maliñniġaa piqatigiplugich maliguaqtini. **20** Maliktitlugu aġnam aunaaqsruguitlaiqsuam qulit malguñni ukiuni tikiññiġaa tunuanun Jesus-ñum, aksikluguasiiñ atruġaajan akuagun **21** isumapluni iñmiñun, “Aksillagukkaluaġiga quppiġaa ja mamilluñaasiñ.” **22** Jesus-ñum kiñiaqami qinġigniġaa aġnaq nipliutipluguasiiñ, “Aġnaaq, quvitatħauġiñ. Ukpiqsriħiqpich iluaqsipkaġaatin.” Tavraknejatchiaq aġnaq iluaqsikkauniqsuq. **23** Jesus-ñum tikitñami sivulliuqtim tupqanun tautuñniġai supluaqtuġnanik atuqturaqtit iñugayaatlu kiñuvġuruat. **24** Nipliġñiqsuq, “Annisitchi. Niviaqsiagruck tuqunjaħitchuq. Siñiktuaqsiñaqtuq.” Aglaan iñuich mitautiginigaat Jesus. **25** Iñugayaat anianikmata, Jesus isiġniqsuq niviaqsiagrūum inaanun. Tigupmaniasiiñ argajmigun niviaqsiagruck makinniqsuq. **26** Iñuich siaminniġaat tusaayugaallautaq taavrumuuna nunaaqqipayaanun.

*Jesus Mamititchiruq Malġuñnik Iññuñnik
Ayaujanuarajanik*

²⁷ Jesus aullaqman tavrakŋa malġuk ayaunjaruak aŋutik maliŋniġaak kappainaplutik, “Nagligillanġniaqtiguk, iġñiġikkajatiin David-ħum.” ²⁸ Jesus isiqman tupiġmum ayaunjaruak utlaŋniġaak. Aasiiñ Jesus-ħum apiqsruġniġik, “Ukpiġivitku uvamnun taamna savaaġitlatilaanja?” Taapkuak kiuniġaak, “Aa, Ataniiq.” ²⁹ Jesus-ħum aksinjñiġik iriñikkun nipliutiplugin, “Ukpiġiplu ja taatnaqħutik qiñitlasitqiksutik.” ³⁰ Taapkuak aŋutik qiñitlasitqiñiġisuk. Jesus-ħum algaqsrullapiagħniġik uqaqużiñlugin kisumununniñ taavrumiña, ³¹ aglaan aullaqamik siaminniġaak tusaayugaallautaq Jesus-kun nunaaqqipayaanun.

Jesus Mamititchiruq Aŋutmik Uqatlaitchuamik

³² Taapkuak aniaqsipmiuglu. Aħju irrusiqħulik uqatlaħħaaq Jesus-muutikkäuniqsuq. ³³ Irrusiqħuk anitmagu uqatlaħħaaq aħju uqaaqsiñiġis, iñugħayaat quviġusukħutiñ nipliġñiġis, “Qaħaunniñ tautuksimaiñniġisugut atriħanik uuma Israel-mi.” ³⁴ Aglaan Pharisee-ħuruat nipliġñiġis, “Anitchiraqtut irrusiqħuňnik atuqħlu għalli sajnja aŋjalataata irrusiqħuich.”

Jesus-ħum Iłunħuksriħha

³⁵ Aasiiñ Jesus kukiluġniġis nunaqqipayaani nunaqqiuranilu, ilisautripluni Jew-ħuruat kat-traġviñitni quliaqtuagiplugin tusaayugaallautaq Agaayyutim aħħaayuqautaagun suli mamititlugin qanuspipayaanik atniġħi autilgħillu naħżejjurtilgħillu. ³⁶ Tautukamigħich iñugħayaat il-ħunħu tħchaġnejniġis, atakkii il-ħu illiuqħutiñ qanuqsausiuqħutiñ lu

atriplugu ipnaiq qaunaksraiłaaq. ³⁷ Jesus-ŋum uqautiniğai malığuaqtini, “Katittaksraq ilumun iñugiakkaluaqtuq, aglaan savaktit ikittut. ³⁸ Iñiqsruqsiuŋ añaayuqaña katitchivium tuyuqaqulugu savaktinik katitchiviŋmun.”

10

Jesus Piksraqtuq Qulit Malǵuŋnik Uqqiraqtinik

¹ Jesus-ŋum iñmiňuquniğai qulit malǵuk malığuaqtini, aasiiň saŋŋiksriňňiğai anitchitłasipługich irrusiqluŋnik suli iluaqsipkaitłasipługich qanusipayaanik nańirrutiliňnik. ² Uvva ukua qulit malǵuk uqqiraqtaiň atiňich: Sivulliq Simon taiguutiqaqtuaq Peter-mik, aniqataalu Andrew, James-lu John-lu iğňak Zebedee-m, ³ Philip-lu, Bartholomew-lu, Thomas-lu, Matthew-lu tax-siliqiri, James-lu iğniňa Alphaeus-ŋum, suli Thaddaeus, ⁴ Simon-lu ilaqata Zealot-kuaqtuat, suli Judas Iscariot aatchuutigitniktuaq Jesus-mik aquvatigun.

Jesus-ŋum Aullaqtitkai Qulit Malǵuich Malığuaqtini

⁵ Taapkua qulit malǵuk Jesus-ŋum tuyuğiniğai alǵaqsrugħugich itnaqhuni, “Aullaqtiaqası Jew-ŋunjitchuanun naagaqaa isığniaqası nunaaqqipayaanitňun Samaria-ǵmiut. ⁶ Aglaan aullaħiňaġitchi iñuiňun Israel-ŋum ittuanun tammaummiruatitun ipnaisun. ⁷ Aasiiň iglauħlapsitňi quliaqtuaġiyumagiksi, ‘Agaayyun aŋalatchiħiňaġuqtuq iñuŋnik nutaakun.’ ⁸ Iluaqsipkailusi atniġñaqtuanik, aŋipkaqtillugich tuqruuat, mamititchiľusi auyugaqtualgitňik,

anittağlugich irrusiqļuich, suli aatchuutigiyumagiksi akuqtuaġikkaqsi akiilaagliugu.

9 Maniligaġniaqasi kaviqsaamiglu qatiqtaamiglu unniñ kannejuyamiglu. **10** Puukataiļaağusi aullağupsi, quppiġaatqiutaiļaağusilu, suli aluġutitqiutaiļaağusi, naagaqaa ayauppianjilaağusi, atakkii savakti piqaqtitaksrauruq inuġikkanjanik.

11 Nunaaqqimupayaağupsi naagaqaa nunaaqqiu ramun pakakkumausi iñuñmik tukkiyumar uamik, aasiiñ tukkuummilusi tupqani aullağniałlapsitñunaglaan. **12** Tukkuummigupsi taavrumani tupiġmi nipliġumuusi, ‘Agaayyutim iħuaqqutillażżiaġumagaasi.’ **13** Iñuich taapkua paġlakpasi tutqiutiqaġniaqtut. Aglaan paġlañitpasi tutqiutiqaġumiñaitchut. **14** Kisupayaamakuqtun itpasi naagaqaa naalaġnisuñit patigik uqauttutisi, ipsuktuqsiuñ apyuq isigapsitñiñ anīniagaraġupsi tupiġmiñ naagaqaa nunaqqimiñ.

15 Iłumun uqautiġipsi, qaġanatlużżiaqtuq iñuiñi Sodom-ħejum Gomorrah-ħejumlu Atanniivium uvluani taapkunakja iñuiñiñ tukkuliżżejtchuamiñ ilip sitñik nunaqqiatni.

Nagliksaaqtirrutiksrautit

16 “Tuyuġiniaġipsi ipnaisun akunġatnun amaqqu. Taatnamik puqikkumausi nimigiatun suli suqlukkatlatlitchuatun tiġi mięgruraturun. **17** Qaunagilugich iñuich, atakkii uqaqsitta aġvien muutigisigaasi ipiġaqtuġlusi Jew-ħejruuat katraqviñitni. **18** Suli pisigilu ja tikiutrauniaqtusi sivuġaatenun kavau rauat umialgillu. Piviksraqaġisiru iżi simaraulusi ilinjietñun suli Jew-ħejriżitchuanun. **19** Aglaan

tiguraugupsi isumaalunjaqasi qanuq naagaqaa sumik uqaġniaqtilaapsitñik, atakkii tavraquqpan qaitchikkauniaqtusi uqaksrapsitñik. ²⁰ Atakkii ilipsi uqaġumiňaitchusi, aglaan Irrusija Aapapsi uqaġisiruq ilipsigun. ²¹ Aniqatim aatchuutigigisigaa aniqatni tuqqutautqulugu, suli aapam pigisipmigaa taatnatun qitungaurani; ililgaat akikħaqtuipmiňihsut aŋayuqaġmiknik aasiiň aŋayuqaatiň tuqqutillugich. ²² Iñupayaam uumigiliutigisigaasi piqutigiluňa, aglaan maktaruaq payaŋaiġuni isuanun anniqṣukkaugisiruq. ²³ Piyuaqsiugupsi uumani nunaaqqimi, qimakkumuusi atlamuń nunaaqqimun. Ilumun uqautigipsi naatchitħlasigaluqasi savaapsitñik nunaaqqipayaanitñi Israel-ŋum Igñija Iñuum aggigisiruq. ²⁴ Maliguaqti kamanatlulitchuq ilisautrimiňiň, naagaqaa savakti aŋayuqaġmiňiň. ²⁵ Iñuich uumigigisigaat maliguaqti atunim ililugu uumigipmatun ilisautrigikkaňa, suli taatnatuntuq savakti aŋayuqaġatun. Iñuich tuqliraġniqpatruň aŋayuqaġa tupqum Beelzebub-mik tupiqatauruat maatnaasu tuqliraġniqpačhačha taavrumiňa atiġmik.

Sivuuġaginasigik Iñuich

²⁶ “Iqsiginiaqnasigik iñuich. Supayaaq matuqaqtuaq sagvikkaugisiruq, suli nalunaqtuapayaaq ilitchuġipkakkaugisiruq. ²⁷ Uqautigikkaġa ilipsitñun taağmi uqautigiyumagiksi qaumami. Suli iñuich isivruutigikkanjat siuttapsitñun quliaqtuaġiyumagiksi tupqich qaaŋatniň. ²⁸ Suli iqsiginiaqnagich iñuich tuqqutchiraġaqtuat timimik, aglaan tuqqutchu-miňaitkaat iñuusiq; sivuuġagiħħiňaqsiuň taamna

piyaqquitlарuaq iluqaaknik iñuutchimiglu timimiglu anasiñjuqsağvíjmi. ²⁹ Uvva malguk tijmiurak tunitlaipak atautchimun nalliglugik maniuramik? Naagauvva nalliakunniñ katakkumiñaitchuq nunamun aapagikkaqsi nalujjaan. ³⁰ Agaayyutim iñisimagai iluqaisa nutchasi niaqupsitñi suli qanutun iñugiaktilañat. ³¹ Taatnağusi sivuuğanasi, akisuruançutluktusi tamatkunakña tijmiurağayaaniñ.

Uqağıłhalu Piilaagliħalu Christ-mik

³² “Taatnamik kisupayaaq nalupqinaiqhuni uqaqpan sivuğaatiñi iñuich piginiluni uvamnun, ilaa nalupqinaiglugu uqaġigisipmigiga sivuğaani Aapaa qilañmiittuam. ³³ Aglaan kisupayaam piilaağikpaña iñuñun piilaağigisipmigiga Aapaanun qilañmiittuamun.

Jesus Aggiutriruq Aviktuilığmik

³⁴ “Isumaniaqası aggigñiluña tikiuttyağlugu tutqiun nunamun aglaan savikpak. Aggiżitchuña iñuich piqatigiiksityağlugich aglaan atingiqupluginch.

³⁵ Atakkii piqutigeluña iğñiğuruat akikħaqtauitħasiplugich aapamiknik, paniuruat aakamikniglu, ukuañjuruat aakaruamikniglu.

³⁶ Iñuum tupiqatiñi uumigirigigisigai. *Micah 7:6*

³⁷ “Iñuum piqpagitlukkumiñ aapani naagaqaa aakani uvamniñ maliġuaqtaulguyumiñaitchuq uvamni, suli iñuum piqpagitlukkumiñ iğñiğikkani naagaqaa panigikkani uvamniñ maliġuaqtigħejt kiga. ³⁸ Suli iñuum

akiggiutinjatkumiuj sannigutani maligluja maliqqaqtigijitkiga. ³⁹ Iñuum tigummiñiaqtuam iñuułigmiñik tammaigisigaa ilumutuuruaq iñuułiq; aasiiñ iñuum tammaigumiuj iñuułli piqutigiluña piññaktaaqgisigaa.

Akilisiaksiratsrat

⁴⁰ “Iñuum akuqtuqpasi akuqtullapiaqmigaanja, suli kisupayaaq akuqtuiruaq uvamnik akuqtullapiaqmigaa tuyugiriga. ⁴¹ Kiña iñuk akuqtuiruaq sivuniksriqirimik pisigiplugu sivuniksriqiraupluni akuqtuigisiruq sivuniksriqirit akiññaktaaksrajanatitun, suli iñuk akuqtuiruaq nalaunjaruamik iñuñmik pisigiplugu nalaunjaruañjuha iñuum akuqtuigisiruq nalaunjaruañjuha iñuum akilisiaksiatun. ⁴² Suli kisupayaaq aatchuiruaq atautchimununniñ makua kamanaiññiqsrauruat maliqqaqtima nigliñaqtuamik imiğmik qallutmun pisigilugu maliguaqttauļha, ilumun uqautigipsi, tammaiymiñaiļapiągaa akilisiaksirsrani.”

11

¹ Jesus naatchianikami ilisautriļigmiñik qulit malġuk maliqqaqtimiñik aullaġniqsuq tavrankja ilisautrityaqhuni suli quliaqtuaġiaqhuni nunaaqqinjiten Galilee-m.

John Paptaaqtitchiri Tuyuqaqtuq Malġuñnik Maliguaqtijnik

² John tusaakami isiqtauļigmiñi qanuq Christ, anniqsuqtı akiqsrutaauruaq, savaaqaqtillajanik, tuyuginiğik malġuk maliqqaqtijni

³ apiqsruġiaquplugu Jesus, “Taimñauvich John-ñum uqautigikkanja aggiġñiaġniplugu? Naaga niġiunjaqpisa atlamic?” ⁴ Jesus-ñum kiuniġik, “Utiġusik uqautigityakku John-mun tusaakkaqsik suli qiñikkaqsik. ⁵ Ayaunjaruat qiñitlasiplutinj, pisutlaITCHUATLU pisutlasiplutinj, auyugaqtu-algilu mamitikkauplutiñ, tusaatlaITCHUAT tusaatlasiplutinj, tuquñjaruat anipkaqlugich, suli tusaayugaallautaq quliaqtuañupluni ilaippañnun. ⁶ Quvianamiuruq iñuk qapiqtañitchuaq pisigluña.”

⁷ John-ñum maliguaqtok aullaaqsiplmaknik Jesus uqaaqsiñiqsuq iñugayaanun John-kun, “Sumik qiñigiaqpisi iñuiñaami nunami, ivigaamik aŋalataakkajanik anuġim? ⁸ Sumikmi qiñigiaġniqpisi? Iñuñmik atnuġaaqaqtuaq akisuruanik? Naagga, tamatkua atuqtuat akisuruanik atnuġaanik iñuuniaqtuañjurut umialgum tupiċpanjan. ⁹ Taitñiñitpan sumikmi qiñigiaqpisi? Sivuniksriqirimik? Aa, John qiñikkaqsi pitluktuq sivuniksriqiriñ. ¹⁰ Uvvauna aglausimaruaq John-kun, ‘Atanji, tuyuġigisigiga uqqiraqtiga sivupni.’

Itqanaiyagisigaa apqutiksran sivunnapni.’

Malachi 3:1

¹¹ Ilumutuuruamik uqaqtuña ilipsitñun, John Paptaaqtitchiri kamanatluktuq iñuñniñ aniruaniñ nunami uvuñanunaglaan. Aglaan iñupayaaq kamanaiññiqsrauruaq ukunakja Agaayyutim aŋalatajiniñ kamanatluktuq John-miñ. ¹² John Paptaaqtitchiri sagviqman Agaayyun aullaġniiñiqsuq aŋalataġmiñik iñuñnik, aglaan iñuich saqlaktuat aippaavak akilliliq suiñiqsut

uvunjanunaglaan. ¹³ Atakkii sivuniksriqiripayaat suli Moses-ŋum maliğutaksraňiň uqağıgaat John-ŋum aggigňiałhanunaglaan. ¹⁴ Ukpıgısukkupsiuň sivuniksriqirit uqağıkkajanat ukpiġiniağıksi John Elijah-ŋutilaanjanik aggiqsağumaruamik. ¹⁵ Kiňa iňuk siutiqaqtuaq tusaali.

¹⁶ “Sumik atriqaqpat makua iňuuruat pakma? Ittut ilılgaatun aquppiplutin tuniriňiaqtuatun katim-mavinjňi suli tuqlırautiplutin avatmun,

¹⁷ ‘Atuqtuurautigaluagpsi aglaan aǵǵinjitelusi.’

‘Atuqhutali kiňuvguutinik aglaan qianjitchusi.’

¹⁸ John aggiqami niğitlaiňňıqsuq imiğluniň, naagasuli iňuich uqaqtut irrusiqluqaǵniplugu.

¹⁹ Iğníja İňuum aggiqami niğitlapluni imitlapluniň atlatitun, aglaan uqautiginigaat itna, ‘Marra niğgiqsuruaq imiqtuqtilu, ilauraaginigaat tax-siliqirit killuliqiritlu.’ Agaayyutim puqiutaa ilitchugipkautauruq ilumutuuplugu savaaňagun.”

Ukpıjitchuat Nunaaqqich Ilaňatni

²⁰ Aasiiň Jesus-ŋum iňiqtiaqsiňiǵai iňuich nunaaqqiňi savaaqaǵvigitlukkani quviqnaqtuanik atakkii isummitqinjitmata. ²¹ “Naklıuň Chorazin-naǵmisi! Naklıuň Bethsaida-ǵmisi! Savaaqaǵaluaqtuňa iňugiaktuanik quviqnaqtuanik akunnapsitňi. Makua quviqnaqtuat qiňikkasi savaaňuniqpata inilǵaanimma Tyre-miňu Sidon-miňu iňuich taimani isummitqianikkayaqtut miissuňnik atnuǵaǵutin suli ağramun aquvillutin qiňiqtitlugu taavrumuuna mumilıqtiň killuqsautmikniň.

²² Aglaan uqautigipsi, Uvluanı atanniivium iglutuyunaitlukkisiruq ukuňnakňa Tyre-miňu

Sidon-miñlu ilipsitñi. ²³ Aasiñ Capernaum-miusii! Kamanagasugivisi? Iktaugisirusi anasiñjuqsagvíjmun. Atakkii quviqnaqtuat savaanjuruat ilipsitñi savaanjuniqpata Sodom-mi, ittuiñağayağaluaqtuq uvuñjanunaglaan. ²⁴ Aglaan uqautigipsi, Sodom-miut atanniusiaksranaqtat qağanatlujniaqtuq atanniusiaksrapsitñiñ.”

Aggiqhusi Uvamnun Minguiqsiagítchi

²⁵ Tavraasiñ Jesus nipligñiqsuq, “Aapaan, atanğuruatiin qilañmi nunamílu, quyagikpiñ! Sagvígitin puqiitchuanun sut iriqsimaruat puqisksuaniñ ilisimaruaniñlu. ²⁶ Aa, Aapaan, taamna sivunniutigikkan quviagigiñ. ²⁷ Aapaa sañnjipayaat qaitkai uvamnun. Kia-unniñ iñuum ilisimanitkaa iğñiguruuaq aglaan kisimi aapam. Suli kia-unniñ ilisimanitmigaa aapa aglaan kisimi iğñiguruam iñupayaamlu iğñiguruam ilitchugípkakkaña aapamik. ²⁸ Minguqtuasii uqumailliuqtuasiñlu! Uvuñagítchi, minguiqsiaptitchumagipsili. ²⁹ Akiyaqasiutititchi uvamnun ilisağvigiluňjaasiñ. Taatnağupsi iñuutchisi minguiqsiagniaqtut atakkii piisaanjitchuňa atchikluňalu. ³⁰ Akiyatiga naammaktuq atuqtuni, suli savaaksrirrutiga ilipsitñun qağanaqtuq.”

12

Apiqsruun Minguiqsiagvíkun

¹ Akuniisunjaqatiñ Jesus-lu maliquaqtaiñlu apqusaagñiqsut mukkaaksrat nautchiiviatigun minguiqsiagvíum uvluani. Jesus-ñum maliquaqtai niğisulihutin nutchuigaqsiñiqsut

mukkaaksranik aasiin nīgiplutin. ² Phariseenjuruat tautukamisigik upyañnīgaat Jesus, “Qiñillakkich maliguaqtitin. Navgillapiaqtut maligutaksrapnik minguiqsiagvium uvluagun.” ³ Jesus-n̄um kiunīgai, “Agliqisimasuknaqiksi sumik David-n̄umlu piqataiñlu pisilaarajat nīgisuliqamiñ. ⁴ David isiqhuni tupqanun Agaayyutim, ilaalu piqataiñlu, nīgirut ipqiqsakkauruamik qaqqiamik nīgiraksiutauruamik kisiitñun agaayuliqsinun. Maliqutaksrakuagnangitchuq nīgipmatruñ taamna qaqqiaq. ⁵ Suli agliqisimasuknaqiksi maligutaksrani, qanuq agaayuliqsit agaayyuvikpañmi qaayugnaqsiiliugniałhat minguiqsiagvium uvluani, tavraami patchisaiłhat navguikamin maligutaksranik. ⁶ Aglaan uqautigipsi, iñuk maanitkaluaqtuq kamanatluktuaq agaayyuvikpañmiñ. ⁷ Ilisimanayağniğupsi qanuutautilaajanik uuma uqałhum, ‘Kimmutigitlukkiga nagliktaq uumakja tunillaqtułigmiñ,’ suksraungiğayaITCHisi iñuich killukuanjitchuat. ⁸ Atakkii Iğñiña Iñuum ataniğigaa minguiqsiagvium uvluan.”

Ajñun Argalik Pannaqluktanik

⁹ Jesus tavrankja aullaqami isığniqsuq Jew-n̄juruat katraqviatnun. ¹⁰ Añutiqağniqsuq tavrani pannaqluktanik argalik. Atlanik iñuqağmiñiqsuq tavrani agvisiksrailiqiruanik Jesus-mik. Apiqsruğnīgaat maligutaksrakuagnaqmagaan iluaqsipkairuni minguiqsiagvium uvluani. ¹¹ Jesus nipliutinīgai, “Nalliqsi piqağniğumi atautchimik ipnaimik aasiin ipnaiq kata-guni ilunaamun minguiqsiagvium uvluani, taavruma amunayaiññiqpauñ taavrumakja?

12 Nalupqinaitchuq, Iñuk piqpaknatluktuq ipnaimiñ. Taatnaqhuni maliġutaksrakuağnaqtuq ikiyuiruni minguiqsiağvium uvluani.” **13** Aasiiñ nipliutiplugu taamna aŋun, “Isakkich argaktin!” Taavruma isaŋniġai argaŋni aasiiñ iluaqsiplutin iġluŋisitun argaiñ iłiplutin. **14** Tavraknja Phariseenruuat anikaminj katiplutin sivunniugniqsut qanuğlugu Jesus tuqqutchuklugu.

Agaayyutim Piksraqtaajuruaq Savaktaa

15 Jesus iļisimapluni sumik sivunniqtilaanjañtnik, aullaġniqsuq tavraknja. Iñugiaktuat iñuich malinjiġaat. Jesus-ŋum iluaqsiraġaġniġai iluqaisa atniġħnaqtuat. **16** Jesus-ŋum iñiqtigniġai iñuich uqaġitquňiġħi. **17** Taamna immiqsaqlugu uqautaumaruaq tumigiplugu sivuniksriqiri Isaiah, itnaqhuni,

18 “Uvvauna savaktiga piksraqtaaġikkaġa!
Ilaanjuruq piqpagikkaġa suli ilaagun quyalikaupluna.

Iligisigiga irrusillautaġa ilaanun,
suli quliaqtuaġigisigaa iñupayaanun
qanuq atanniiġiksraġa iñupayaanik atisilugich.

19 Uqaalatlaitchuq iġjalaluniż.
Kia-unniīñ tusaayumiñaitkaa nipaa tumitchian.

20 Piyaqquġnianjtakai sayaitchuat iñuich ittuat piġittuatun ivikpaktun
naagaqaa qamiyasiuraqtuatuun nanipiam
ipiġaħatun
atanniiġiksraġmiñunaglaan iñupayaanik
nalaunjaluniż atisiluniż.

21 Suli ilaan atqagun nunaaqqipayaat niđugaqağisirut.” *Isaiah 42:1-4*

Jesus-lu Beelzebul-lu

22 Iñuich Jesus-muutinigaat aŋun irrusiqlulik ayaŋjaruağlu uqatlaitchuağlu. Jesus-ŋum iňuaqsiňigaa. Tavrali taamna aŋun uqatlasiruq qiniitlasipluniļu. 23 Iluqatin iñuich quviğutchajniqsut uqaqhutin, “Kiňuviagiňitkaluagniqpauŋ una David-ŋum?” 24 Aglaan Pharisee-ŋuruat tusaakamitruŋ uqaġniqsut, “Jesus anitchiraġaiňiqsųq irrusiqluŋnik iňuŋniň atuqļugu saŋŋia Beelzebul-ŋum aŋalataata irrusiqluich.” 25 Jesus-ŋum iňisimaplugh sumik isummatilaŋatnik uqautiniğai, “Iñuich atanġuvıňmiguq akikŋautirut avatmun; atanğıliasiiň taavrumanı suksraunġiňiaqtuq iňugikkaŋi avgumakpata. Nunaaqqipayaat naagaqaa tupiqatigiich avikamin makitatlaitchut. 26 Taatnatuntuuq tuunġaq irrusiqluŋi avgumagumiň akikŋautilutiň avatmun atanġuvia isukkliňňiaqtuq. 27 Aasiiň anittaġupkich irrusiqluich Beelzebul-kun, kisukunli iňugikkapsi anittaġuuvatigik irrusiqluich? Taatnamik atanniqsuqtiginiağisi. 28 Aglaan Irrutchiagun Agaayyutim anittaiguma irrusiqluŋnik, nalupqinaitchuq Agaayyutim aŋalatchianiktilaŋa iňuŋnik akunnapsitňi. 29 Kiňapayaaq isiġuktuaq saŋŋiruam iňuum tupqanun tigliguguni, qiliqsrueqqaağlugu saŋŋiruaq iňuk tiglikkisiruq suuraŋiňik. 30 Iňuk piqatauňitchuaq uvamni akikŋautiruq uvamnun, suli iňuk katitchiqatauňitchuaq siamitchiļhiňaqtuq. 31 Taatnaqhusi uqautigipsi, Agaayyutim natqigutitlagai iñuich killuqsautiipayaanich

itqaqitqikkumiñaiğlugich uqağniqłuktapayaanich. Aglaan uqağniqłuktuaq akikjaqlugu Ipeqitchuaq Irrusiq natqigutikkauyumiñaitchuq sumiunniñ. ³² Kiñapayaaq uqaqtuaq pigiitchuamik akikjaqlugu Igñiña Iñuum natqigutikkaugisiruq, aglaan kiñapayaaq uqaqtuaq pigiitchuamik akikjaqlugu Ipeqitchuaq Irrusiq natqigutikkauyumiñaitchuq pakmapak suli taimuña.

Napaaqtuq Asianjılı

³³ “Napaaqtuq ilitchuginaqtuq asianjigu. Napaaqtugiksuaq asirilliautaǵaqtuq aasiñ napaaqtugiitchuaq asirripluni asiaǵiitchuanik. ³⁴ Ilipsi tuqunalgich nimigiat! UqatlaITCHUSI nakuuruanik atakkii pigiitchuaŋuplusı. Qanǵaum uqaǵiraǵigaa taatnasiq ittuaq uummatmi. ³⁵ Iñullautaq piqaǵaqtuq nakuuruamik uummatmiñi aasiñ uqallautat aniraǵaqhutin uummatmiñiñ, aasiili pigiitchuaq iñuk uummatiǵmiutaǵaqtuq killuǵmik uqaqhuniasiiñ nakuunjitchuanik. ³⁶ Uqautigipsi, uvluani atanniivium iñuich pasirauniaqtut uqaǵiillapayaǵmiktigun uqautigikkaǵmikkun. ³⁷ Atakkii uqaǵikkapsigun nalaunjasripkakkauniaqtusi, suli uqaǵikkapsigun suksraunǵiqaugisirusi.”

Iñuich Jesus Savaqugaat Quviqnaqtuamik Savaamik

³⁸ Tavrani ilanisa Pharisee-ñuruat suli ilanich aglaliqirit uqağniqsut Jesus-mun, “Ilisautrii, qiniǵuktugut quviqnaqtuamik savaamik nalupqinaigutauplugu kisuutilaaqnik.” ³⁹ Jesus-ñum kiuniǵai, “Makua iñuich pigiitchuatlu sayunjaruatlu qiniǵuktut quviqnaqtuanik savaanik

nalupqinaigutaulugich, aglaan qiniğumiñaitlutinj taatnatchimik. Qiñilhiñağisigaat quviqnaqtuaq savaaq atuupmatun Jonah-mun sivuniksriqimun. ⁴⁰ Jonah aqalukpaum narraajni inniqsuq piñasuni uvluniļu unnuaniļu. Taatnatuntuq Igñiňja Iñuum iluvigmiitkisipmiuq piñasuni uvluniļu unnuaniļu. ⁴¹ Atanniivium uvluan iñuñisa Nineveh-m patchisiginiağaasi iñuuruasi pakmapak, atakkii taimani isummitqikhutinj killuqsautmikniñ Jonah-m quliaqtuağutipmatij. Ataňii, iñuk maaniittuq kamanatluktuaq Jonah-miň. ⁴² Atanniivium uvluanı atanǵum aǵnam patchisiginiağaasi iñuuruasi pakmapak, atakkii aggıqhuni uŋallam tuňaaniň uŋasiksuumiň naalaǵnityaqługu Solomon-ηum puqıksilaanja. Ataňii, iñuk maaniittuq kamanatluktuaq Solomon-miň.

Irrusiqłuk Utıqtuq

⁴³ “Irrusiqłuk anipman iñuñmiň kukiługaqtuq paliqsaakun nunakun pakakhuni iñiqtuiqsiągviksraǵmiňik, aasiiň paqingitlugu. ⁴⁴ Iñmiňun uqaǵaqniqsuq, ‘Utıqlańa tupiǵmun annivigikkamniň.’ Aasiiň utıqami paqillaǵniǵaa imaiłaaq inigisimakkani salikuqtaatchiaq suli inillaktullautaqtqaq. ⁴⁵ Anipluni aggıutrıraqniqsuq tallimat malguňnik atlanik irrusiqłuňnik pigiitluktuanik iñmiňiň. Aasiiň isiqhutinj iñuuniagaqsıraǵniqsut tavrani. Aqullia taavruma iñuum pigiitlıksıraqtuq sivullıǵmiň iñuuniałyǵmiňiň. Taatnatuntuq itkisiruq killuliqirini iñuuniaqtuat pakmapak.”

Aakańalu Aniqataiļu Jesus-ηum

46 Jesus-ŋum uqaqtitlugu iñuŋnun aakanalu aniqatinili qikaġniqsut tatqaani uqaqatigisuklugu Jesus. **47** Iñuich ilanjata uqautiniġaa Jesus, “Aakanlu aniqatiutinlu qaani qikaqtut uqaqatigisukhutin.” **48** Jesus-ŋum kiuniġaa taamna iñuk uqautriñi, “Kisuuba aakaga? Suli kisuuvat aniqatiutka?” **49** Tikkuaqħugħich maliguqtini nipliġñiqsuq, “Qiñiqsigik, ukua aakagigitkalu aniqatiutkalu. **50** Atakkii kiñapayaaq savaaqaqtuaq pisuħhanik aapaa qilañmiittuam aniqatigigiga naagaqaa aakagiplugu.”

13

Atrikusaun Nautchiaksriqirikun

1 Taavrumani uvulumi Jesus anikami tupiġmiñ, utlautiniqsuq narvam siñaanun aquvitluniasii. **2** Iñugiallapiaqtuat iñuich katirviginigaat avatlugu. Kiisaimma ikiniqpuq umiamun aquvitluni, iñugayaaqpaurat makitaplutin narvam siñaani. **3** Aasiiñ Jesus-ŋum uqautiaqsiñiġai iñugiaktuanik atrikusautinik itnaqhuni, “Iñugguuq hunaliqiri nautchiityaġniqsuq. **4** Nautchirripkaqlugu nautchiaksrat ilanjich katagaġniqsut apqutmun, aasiiñ tinġiurat niġiplugħich. **5** Ilanjsuli katagaġniqsut uyaġauruamun nunamun nunaqapianitchuamun, aasiiñ nauplutin qilamik atakkii nunakitluni, **6** aasiiñ siqiñiġ nuipman pasiklugin pannaqluñiġai atakkii kañiliviksraitlutiñ. **7** Suli ilanjich nautchiaksrat katagaġniqsut akunġatnun kakitlaġnat, aasiiñ kakitlaġnat naukamin nagguviksra iñiġiach nautchiaġiksaat. **8** Aglaan ilanjich katagaġniqsut nunagiksuamun,

aasiiñ nauriñiqsut asianik iñugiaksiplugich, ilanich atautchimiñ tallimakipiañuttaaqhutin naaga piñasukipiañuttaaqhutin naaga iñuiññaq qulinjuttaaqhutin.”⁹ Aasiiñ Jesus nipligñiqsuq, “Kiña siutiqaqtuaq naalaagnili.”

Sivuniñat Atrikusautit

¹⁰ Maliguaqtaiñ utlakługu Jesus apiqsruğniğaat, “Suvaata uqaqpich iñuñun atrikusautitigun?”

¹¹ Jesus-ηum kiuniğai, “Ilipsitñułhiññaq Agaayyutim sagviğñigaa nalunaqtuajanik añaayuqautaan qılıam, aglaan makunuja iñuñun sagvikkaunjitchuq. ¹² Atakkii iñuk piqaqtuaq akuqtullaagisiruq, aglaan taavruma piqañitchuam anniagisigaa mikiruuraqunniiñ pigikkani. ¹³ Una pisigiplugin uqaqtuña iñuñun atrikusautitigun: Atakkii qiniğaluaqhutin ilisaqsritlaitchut

suli naalaagnigaluaqhutin tusaatlaitchut aasiiñ kanjqsitlaitlutinj.

¹⁴ Aasiiñ makunuuna iñuktigun immiumaniqsuq Isaiah-m sivuniksriqutaa itnaqhuni,

Tusaagaluagupsi kanjqsiyumiñaitchusi, suli qiniğumaağaluagupsi ilitchuqsriyumiñaitchusi.

¹⁵ Atakkii makua iñuich uummatiñich pitchigiiliginjqsut, tusaasunğitlutinj supayaamik, iritinļu siqu-plugich.

Utitqiñgitchut Agaayyutmun mamitiiksramiknun atakkii qiniłaitlutinļu tusaatlaitlutinļu kanjqsitlaitlutinļu.’ *Isaiah 6:9-10*

¹⁶ Aglaan quvianamiurusı, atakkii irigikkasi qiniłarut suli siutigikkasi tusaatlaplutinj.

¹⁷ Ilumun uqautigipsi, iñugiaktuat sivuniksriqirit

nalaunjaruatlu Agaayyutim iñuiñ qiñigukkaluağaat tamanna pakma qiñikkaqsi aglaan qiñinjitaat. Tusaasukkaluağaaattuuq pakma tusaakkaqsi, aglaan tusaanjitaat.

Jesus-ŋum Kanıqsipkağaa Atrikusaun Nautchiak-sriqirikun

18 “Naalağnillaksiun qanuutautilaanja atrikusautim nautchirriqirikun. **19** Tamatkua tusraaruat uqałigmik anjaayuqautaagun Agaayyutim kanıqsisunuqatinq atriqaqtut nautchiaksranik kataktuanik apqutmun. Aquagun pigiitchuam agiqhuni aattağıgai nautchirriutauruat uummataatniñ, suli piiguipkağai tusaakkaqatnik. **20** Aasiili akuqtuiruat uqałigmik quviasuutigiplugu tusaapqaraqamitruq atriqaqtut nautchiaksranik kataktuanik uyağaulamun nunamun. **21** Aglaan kanjiliviksraitman akuniutlaitchuq. Tavra iluilliuļiq piyuaqsiuļiglu tikitmata iñuich taapkua qilamik qapiqtığaqtut. **22** Suli nautchiaksrat kataktuat akungatnun kakitlağnat atrigigaat iñuk tusaaruuaq uqałigmik, aglaan isumaaluutit iñuuniałikun kinnitñiňniağutitlu umialgutitigun suqutigingiğigaat uqaļiq taimmaasiiñ naurisunuqanasiyanik. **23** Aglaan iñuk akuqtuiruaq nautchiaksranik nautchirriutauruanik katakhutinq nunagiksuumun atriqaqtuq iñuktun tusaaruatun uqałigmik kanıqsiplugu. Ilaa naurisuuruq asianik, ilanich tallimakipiatun, ilanich piňasukipiatun, suli atlat iñuiññaq qulitun.”

Atrikusaun Mukkaaksraigilatigun

24 Jesus uqağniqsuq atlamsik suli atrikusautmik, “Agaayyutim anjaayuqautaa sagviqpan itkisiruq

iñuktun nautchiiruatan mukkaaksraigksaanik nautchiivijmiñun. ²⁵ Aglaan iñuich siñiktitlugich umiksri aggiqhuni nautchiiñiqsuq mukkaaksraigiiłanik akunğatnun mukkaaksraigksaat aullaqhuniasiñ. ²⁶ Naugaqsipmata nautchiat mukkaaksraurat nuijuraqmata mukkaaksraigiiłattuuq sagviğmiñiqsut. ²⁷ Savaktit utlakamitruŋ añaayuqaqtij apiqsruğnígaat, ‘Ataniq, nautchiiñigiptigiñ mukkaaksraigksaanik. Nakiñ makua mukkaaksraigiiłat nuivat?’ ²⁸ Qaukliata kiuniğai, ‘Uumiksrim savaağigaa taamna.’ Savaktit apiqsruğnígaat, ‘Aullaquvisigut nutchugiağlugich mukkaaksraigiiłat?’ ²⁹ Tavra kiuniğai, ‘Naaga, nutchugupsi mukkaaksraigiiłanik taputrviaqtusi mukkaaksraigksaanik. ³⁰ Iluqatik naulik kipriviksramunaglaan, aasiñ kiprivik tikitpan uqautigisigitka kipririt sivulliulugu katitqulugich mukkaaksraigiiłat qiliqtaulaalugich ikipkaaqsriuğlugich, aglaan katillugich mukkaaksraigksaat siğluamun.’ ”

Atrikusaun Mikiniqsrakun Nautchiaksrakun

³¹ Jesus-ŋum uqautilgiññigai atlamic atrikusautmik itnaqhuni, “Agaayyutim añaayuqautaa ittuq mustard-ŋum nautchiaksrauranjatun iñuum nautchiikkajatun nunautmiñi. ³² Mikiniqsraugaluaññağmi nautchiaksrapayaaniñ naagatarra naukami aqiniqsrauraqtuq nautchiapayaaniñ napaaqtuğuhuni. Aasiñ tiñmiuraŋi silam aggiqaminj ugluliñiqsut qisiqsiutinjitñun.”

Atrikusaun Puvlaksautigun

33 Jesus-ηум uqautilgiññigai atlamic atrikusautmik, “Agaayyutim añaayuqautaa sagviçpan itkisiruq aǵnaq akutchipmatun puvlaksautmik mukkaaksramun iluturuamun puvlagataqtitlugu iluqaan qaqqiaksraq.”

Jesus-ηум Uqaqtilaaja Atrikusautitigun

34 Jesus-ηум uqaǵiniǵai iluqaisa sut tamatkua iñugayaanun atrikusautitigun. Atrikusautailaǵuni uqatlaiññiqsuq. **35** Tavra immiumaniqsuq uqauttauruaq sivuniksriqirikun itnaqhuni, “Atrikusautitigun uqaǵisiruňa ilinjítňun.

Uqautigisigitka sutigun iriqsimaruatigun nunam aullaǵniiłhaniñaglaan.” *Psalm 78:2*

Jesus-ηум Kanıqsipkaǵaa Atrikusaun Mukkaaksraǵiļatigun

36 Jesus-ηум aullaqtitqaaqļugich iñuich isığniqsuq tupiǵmun. Maliguaqtai utlautiniqsut ilaanun itnaqhutinj, “Kanıqsipkallaktigut atrikusaun mukkaaksraǵiļatigun nautchiivińmi.” **37** Jesus-ηум kiuniǵai, “Iñuk taamna nautchiiruaq mukkaaksraǵiksaanik Iğńiǵigaa Iñuum.

38 Nautchiivik nunauruq. Mukkaaksraǵiksaat tamatkuańjurut qaitchuat iñmiknik Agaayyutmun ańjalatquplutiń, mukkaaksraǵiļatli tamatkuańjurut qaitļutiń iñmiknik pigiitchuamun ańjalatquplutiń.

39 Taamna uumiksri nautchiiruaq tamatkuninja mukkaaksraǵiļanik tuunǵauruq. Kiprivik isugigaa nunam aasiiń kipririt isaǵulguplutinj. **40** Atrilugich mukkaaksraǵiļat katitauruat ikipkaqļugich iknígmun taatnatantuq itkisipmiuq isuklıtpan nuna. **41** Iğńińjan Iñuum tuyuǵigisigai isaǵuligikkani aasiiń katityaǵlugich ukunakňa Agaayyutim

aŋaayuqautmiñiñ killuqsaqusaaǵutipayaat suli iñupayaat pigiiliqiruat. ⁴² Isaǵulgich igitkisigaich ikkaularuamun uunaksautmun. Tavrani iñuich qiaǵisirut suli tiriqulatchilugich kigutitni. ⁴³ Nalaunŋaruatli qaumagisirut siqińqtun aŋaayuqautaani aapagikkaǵmiñ. Kiña siutiqaqtuaq tusaali.

Atrikusaun Iriqsimaruakun Akisuruakun

⁴⁴ “Agaayyutim aŋaayuqautaa sagviqpan itkisiruq akisuruaq iriqsimapmatun nautchiiviñmi. Iñuum paqitnamiuñ iritqiklugu nautchiiviñmun; iñuk taamna quviatchakhuni tunirityaǵniqsuq sulliñaurapayaǵmiñik, aasiiñ tauqsiǵñigaa nautchiivik.

Atrikusaun Akisuruakun Suŋauraqpakun

⁴⁵ “Aasiisuli Agaayyutim aŋaayuqautaa sagviqpan itkisiruq tauqsiǵñiaqtitun pakaktuatun akisuruamik suŋauraqpagiksaamik. ⁴⁶ Paqitnami akisullapiaqtuamik suŋauraqpañmik aipluni tunityaqlugich sulliñaurapayaani tauqsiqlugu taamna akisullapiaqtuaq suŋauraqpagiksaaq.

Atrikusaun Kuvrakun

⁴⁷ “Aasiisuli Agaayyutim aŋaayuqautaa sagviqpan itkisiruq qaaqtuitutun niŋitauruatuŋ tagiumun aasiiñ qaaqhuni qanuspayaanik aqaluñnik. ⁴⁸ Qaałallaanikamni aqaluñniaqtit nuqitlugu siňaanun aquvitlutni avguaqsiplugich aqaluich, nakuuruat iliplugich aqaluqagaǵviñmiknun aasiiñ nakuunjitchuat igitlugich. ⁴⁹ Itna itkisiruq isuklitpan nuna. Isaǵulgich avguityaǵisirut pigiitchuanik iñuñnik akungatniñ nalaunŋaruat iñuich ⁵⁰ igitlugich ikkaularuamun uunaksautmun.

Tavrani iñuich qagisirut suli tiriqulatchiļugich kigutitinj.”

Nuturauallu Utuqqauruallu Sugalğich

⁵¹ Jesus-ŋum apiqsruġniġai malığuaqtini, “Kanjiqsivisigik sut tamatkua iluqaisa?” Kiuniġaat, “Aa, kanjiqsigivut.” ⁵² Aasiiñ Jesus-ŋum uqautiniġai, “Aglaliqipayaaq ilisaqaqtuaq Agaayyutim añaayuqautaanik atriqaqtuq tupqmum iñuanik sagviqsruiruamik suuraġmiñik nutauruanik naagaqaa utuqqauruanik tugvaqsiviñmiñiñ.”

Nazareth-miut Ukpigjinjtitkaat Jesus

⁵³ Jesus-ŋum uqaġiñaiqamigich tamatkua atrikusautit aullaġniqsuq tavrakja. ⁵⁴ Tikitluni iñuguġviñmiñun ilisautiniġai iñuich katraqviatni. Iñuich tusaaruat quviġusukhutinj apiqsruqtanti-aqsiñiqsut avatmun, “Sumiñ una iñuk piññakpa puqiutmik suli sañjimik savaaqaqtasipluni quviqnaqtuanik? ⁵⁵ Uvvauna kaapintam taivruma iġñiġiñitpaun? Aakaña taimña atiqanitpa Mary-mik? Aniqatiginjipagich ipkua James-lu, Joseph-lu, Simon-lu, suli Judas? ⁵⁶ Iluqatinjsuli nukatchianji iñuuniaqataujiññiqpat uvaptikni? Sumiñ una iñuk piññajniqpa tamatkunija supayaanik?” ⁵⁷ Tavra atniummatiqaġniqsut Jesus-mik. Aglaan Jesus-ŋum uqautiniġai, “Agaayyutim sivuniksriqira kamagikkauraqtuq nanipayaaq aglaan kamagikkaujtitluni iñuguġviñmiñilu naagaqaa ilamiñilu.” ⁵⁸ Tavra Jesus savaaqaqanjiññiqsuq iñugiaktuanik quviqnaqtuanik atakkii iñuich tavrani ukpiqsriñjtitlutiñ ilaanik.

14

Tuqqutaułha John Paptaaqtitchirim

¹ Taatnałhatni Herod, atanğa Galileem, tusaaniqsuq uqqamik Jesus-kun, ² uqautinigai savaktini, “Jesus una John Paptaaqtitchirauniqsuq anitqikhuni tuqulığmiñ. Taatnaqhuni savaaqatlaniqsuq quvíqnaqtuanik.” ³ Sivuaniimma Herod-ŋum tigupkağnígaa John qiliqsruqługu isiqtaupkaqługu. Taatnaqtinnígaa pisigiplugu Herodias, aniqatmi Philip-ŋum nuliańja. ⁴ Atakkii John Paptaaqtitchirim akulaiqługu uqautinigaa Herod, “Malığutaksrakuağnanğıtchuq ilaqatiginiağupku aniqatvich nuliańja.” ⁵ Herod-ŋum tuqqutchukkaluağnígaa John, aglaan iqsiniqsuq iñuñnik atakkii ilinjisa isummatigiplugu John sivuniksriqirauplugu. ⁶ Herod-ŋum annivia tikitman, pania Herodias-ŋum sayuğniqsuq sivuğaatni Herod-ŋumlu tuyuğmianjinlu quyalıllapiqaqługu. ⁷ Akiqsruğnígaa nalupqinaiqługu qaitchigisiñiplugu supayaamik injipan. ⁸ Niviaqsiaq pitchuksaakkaupluni aakamigun nipliğniqsuq, “Qaitchinjə niaquanik John Paptaaqtitchirim ililugu alluiyamun.” ⁹ Umialik aliatchañniqsuq, aglaan pisigiplugu akiqsruutni suli tamatkua niğıyatini tiliriñiqsuq qaitquplugu niviaqsiam injiagikkańja. ¹⁰ Herod tiliriñiqsuq isiqsiviñmun niaquığiaqplugu John. ¹¹ Itqutinigaa niaqua iliplugu alluiyamun qaitługuasiiñ niviaqsiamun, aasiili taavruma aakamiñuutiplugu. ¹² John-ŋum malığuaqtaiñ aggıqhutin piñigaa timaa iluviqługuasiiñ. Taatnaanikamin uqautityağnígaat Jesus.

Jesus Niġipkaiñihsuq 5,000 Aġutinik

¹³ Jesus tusaakami qanuqtalajanik John-ħum, aullaġnihsuq umiakun quvgutiplugu iñuilaamun kisimi. Iñugayaat tusaakamij maliutiniġaat nunaaqkipayaaniñ pisukkataqhutiñ. ¹⁴ Jesus tulakami tautuklugini iñugayaaqpaurat iluñjutchajnihsuq. Mamitinniġai atnigħnautiñ. ¹⁵ Unnuksraaġataqman maliguaqtaiñ utlajniġaat uqautiplugu, “Unnuaqquaq. Suviksrai laaq manna. Tuyuġikkich iñuich nunaaqqiuranun tauqsigiaqulugich niqiksramiknik.” ¹⁶ Jesus-ħum uqautiniġai, “Aullanitkumiñ suġitchut. Ilipsi niġipkaqsigik.” ¹⁷ Kiuniġaat, “Piqaqtugut tallimaħiñanik qaqqianiglu malġuñiglu aqalunjiġik.” ¹⁸ Jesus-ħum nipliutiniġai, “Uvujautsigik uvamnun.” ¹⁹ Aasiiñ tiliñiġai iñugayaat aquvitquplugini iviñnun. Tigukamigich taapkua tallimat qaqqiat malġuglu aqaluk aagliuġnihsuq qīlaejmun quyyatiplugich. Tavra Jesus-ħum avguqklugich qaqqiat qaiñniġai maliguaqtimiñun aasiili taapkua autaaqklugich iñugayaanun. ²⁰ Iluqatiñ iñugayaat niġiñihsut niġisuiqhutiñ. Niġiñaiqmata maliguaqtit katitchiñihsut ilakunjiñ. immiġataqklugich qulit malġuk aguupmaich. ²¹ Taapkua niġiruat 5,000-tużuñhaq innihsut aġġutit, kisiqatigisunjaq nagħiġi aġnat ililgaatlu.

Jesus Pisuaqtuq Imġum Qaañagun

²² Jesus-ħum maliguaqtini ikipkaqtigniġai umiaqpauramun ikaaġiaquplugini igluanun narvaqpaum aasiiñ aipkaqklugich iñugayaat. ²³ Taatnaanikami mayuġnihsuq iġġimun

agaayutyaqtuaqhuni kisimi. Anaqaksraaqman Jesus kisiñjuñniqsuq. ²⁴ Tavra umiaqpauraq tikiññiqliqsuq qitqanun narvaqpauq. Umiaqpauraq piyaqniuliñniqsuq qailgutiplugu atakkii anugim paġġaqtuqplugu. ²⁵ Aasiiñ Jesus-ñum utlañniġai malíguaqtini uvluyasipman pisukhuni imġum qaañagun. ²⁶ Malíguaqtañ tautukamitruñ Jesus pisuktuaq imġum qaañagun iqsitchaňniqsuq nipliqhutiñ, “Aliuqtuaq marra!” Kappainħaaqsiñniqsuq tatavrauplutiñ. ²⁷ Aglaan tavrauvaa Jesus nipliutiniġai, “Quviatchauġigitchi. Uvañauruña. Iqsiñasi!” ²⁸ Peter-m kiuniġaa, “Ataniiq, ilviupiaġuvich tiliñja utlaqulutin imġum qaañagun.” ²⁹ Jesus-ñum kiuniġaa, “Uvuñagiñ.” Peter niukami umiaqpauramiñ pisukhuni imġum qaañagun utlautiniqsuq Jesus-mun. ³⁰ Aglaan Peter-m tautukamiuñ qanutun sañjisilaña anugim iqsitchaňniqsuq. Kiviaqsikami kappainħaniqsuq, “Ataniiq, annautiñja.” ³¹ Tavrauvaa Jesus-ñum isautiplugich argañi tiguniġaa Peter nipliutiplugu, “Ukpiqsrilikiññiaqpat! Suvata arguaqtuqpitch?” ³² Ikipmaknik umiaqpauramun anuġaġñiqliqsuq. ³³ Taapkua umiaqpauramiittuat sitquġviginigaat sivuġaanun Jesus uqaqhutiñ, “Iłumun iġñiġiniġaatin Agaayyutim.”

Jesus Mamititchiruq Atniġñautiliñnik

³⁴ Ikaaqaminj igħluunun nunalixxiq suq Gennesaret-mun. ³⁵ Aasiiñ iñuji taavrūma nunam ilitchuġikamij Jesus-mik tuyuġniq suq uqqamik avallipayaamiknun nunaaqqiuranun, tikiutruaqsiplugich aasiiñ atniġñautilipayaat

Jesus-mun. 36 Iniqsrullapiaqlugu ak-sillanqniaqsiñagukluguunniñ akua atnuğaañan, aasiiñ aktuipayaaqtuat ilaanik mamitikkauniq-sut.

15

Ilısauttutinjich Sivulliajnuruat

¹ Pharissee-ñuruat aglaliqiritlu utlañniğaat Jesus Jerusalem-miñ apiqsruqlugu, ² “Suvaata maliguaqtivich kamagitlaitpatigik ilisauttutinjich sivulliağıkkapta? İğğunjtkaich argatiñ niğigaluaqtatiñ.” ³ Jesus-ñum kiuniğai, “Suvaatamipsuuq kamagitlaitpisigik Agaayyutim tillisai? Kamaksritlaitchusi atakkii maliğukkisi ilisauttutinjich sivulliağıkkapta. ⁴ Agaayyun uqaqtuq, ‘Kamagisigik aapanlu aakanlu. Kiñapayaaq uqamaqluutriruaq aapamiñik naagaqaa aakamiñik tuquruksraupiaqtuq.’ ⁵ Ilipsiliasiñ ilisauttrirusi iñuñmun uqautiñhiñauniplugu aapani naagaqaa aakanı, ‘Piqaǵaluaqtuña aatchuutiksramik. Aatchuutigiyumiñaitkiga ilipsiknun, atakkii akiqsruutigianikkiga Agaayyutmun.’ ⁶ Taatnatun ilisautigupsiuñ iñuk kamaksritquñitlugu aapanjanik naagaqaa aakanjanik suungigisi Agaayyutim tillisaa pisigiplugich sivulliapsi ilisauttutinjich. ⁷ Ukpiñjuaqtisi! Qanutun nalauittiginiqpa Isaiah sivuniksriqiri uqaqami ilipsigun,

⁸ Tamatkua iñuich kamaksrulgugaluaǵaatña uqałhiñagmiktigun
aglaan uummatiñich uñasiksut uvamniñ piq-pagillapiangitluña.

⁹ Agaayyuwigiraǵigaatña imailaakun,

atakkii ilisautrirut iñuich ilisauuttutinjitñik
iliplugich maligutaksraigiruatuñ Agaayyutun.”
Isaiah 29:13

Sut Qaayuġnaqsipkairuat Iñuŋnun

10 Jesus-ñum inmiñuquniġai iñugayaat nipliutiplugin, “Naalaġniłłaksiñja kañiqsilusiasiñ. **11** Sum isiqtaqtuam iñuum qangagun qaayuġnaqsipkatlaikaa, aglaan taavruma aniraġaqtuam qaniġmiñ, uqałhum qaayuġnaqsipkaġaġigaa iñuk.” **12** Maliguaqtaiñ utlaklugu apiqsruġniġaat, “Ilisimavigich Pharisee-ñuruat atniummatilaanjat tusaakamitruñ taamna uqautigikkan?” **13** Kiuniġai, “Nautchiapayaaq aapama qilañmiittuam nautchirriutiñaisaŋ amuruaniaqtuq kañituummaan. **14** Inmiktuuglich. Ayaunjaruani sivulliuqtaurut ayaunjaplutin. Ayaunjaruam sivulliuqpagu ayaunjaruaq, iluqatik katakkisiruk itiqsramun.” **15** Tavra Peter-m kiuniġaa, “Uqautitigut qanuutautilaajanik taavruma atrikusautim.” **16** Jesus-ñum nipliutiniġai, “Ilipsipsuuq kañiqsisaitmivisi? **17** Kañiqsinjtipisisuli? Suapayaaq qaniġmuktuaq aqiaġuqmugaqtuq aasiiñ anipluni timimiñ. **18** Aglaan sut tamatkua aniraġaqtuat qanikun aniraġaqtut uummatmiñ, aasiiñ qaayuġnaqsiraġaqlugu iñuk. **19** Atakkii uummatmiñ aniraqtut pigiitchuat isummatit, iñuaqtuliq, ilaqatiqaġaluaqhuni atlataliq, ilaqatailluni sayuňaqliq, tigliyuqliq, tanjigaakun ilisimarauqliq, uqaniqlüktalıgli. **20** Taapkuatavra qaayuġnaqsiraġaġaat iñuk, aglaan niġiruni iġġuġaluaġnagich argaich qaayuġnaqsitlaitchaat iñuk.”

Ağnam Ukpiġutaa

21 Jesus aullaġniqsuq tavrakja nunañanun Tyrem suli Sidon-ħum. **22** Canaanit-aġmiu aġnaq tamaani iñuuniaqtuaq utlautiniqsuq ilaanun kappainapluni, “Ataniiq, kijuviaja David-ħum! Nagligillañnianja! Paniga pigiillapiaqtuq irrusiqluqaqhuni.” **23** Aglaan Jesus kiujiññiġaa. Maliguaqtaïn utlaklugu iniqsrullapiagiäaat itnaqhutij, “Aqpigiuñ una aġnaq. Nipraulapluni malikkatigut.” **24** Jesus-ħum kiuniġai, “Tuyugikkauruja kisiitnun iñuiñun Israel-ħum ittuanun tammaummiruatuñ ipnaisun.” **25** Aġnaq utlautikami sitquġniqsuq sivuġaanun nipliqlihuni, “Ataniiq, ikayullañnianja.” **26** Jesus-ħum kiuniġaa, “Nakuungitchuq pigupsiuñ ililgaat qaqquksrautaat qailluguasiiñ qipmiñun.” **27** Aġnaq nipliġñiqliqsuq, “Aa Ataniiq, aglaan qipmichunniñ niġipmiraqtut kanġakunik kanġaalaruanik iñuñmiñ niġġiviñitniñ.” **28** Jesus-ħum kiuniġaa, “Aġnaaq, kamanallapiaqtuamik ukpiqsriżiqliq aġniqqsutin; iniqsruaġikan savaañugisiruq ilipnun.” Tavra aġnam pania iluaqsikkauniqsuq taavruman i sassaqniġmi.

Jesus Mamititchiruq Iñugiaktuanik Iñuñnik

29 Jesus aullaqami tavrakja iglauniqsuq siñiqliqsaq kluġu narvaqpa ja Galilee-m; aasiiñ mayuqlihuni qimiġaamun aquvinniqliq suq tamañha. **30** Iñugiallapiaqtuat iñuich utlautiniqqsut ilaanun tikiutruiplutij pisutlaitchuanik, ayañaruanik, uqatlaitchuanik, sulguilimaruani, suli iñugiaktuanik atlanik. Iliuqqaqniġaich Jesus-ħum sivuġaanun. Aasiili Jesus-ħum iluaqsiñiġai.

31 Iñuich quvigutchañniqsut qiniqamisigik uqatlailaat uqaaqsipmata, sulguilimaruat iluaqsikkaupmata, pisutlaitchuat pisutlasiplutiñ, suli ayaunjaruat qiniitlasiplutiñ; kamaksruğniñaat Agaayyutaat Israel-ñum.

Jesus Niğipkaiñiqsuq 4,000 Añutinik

32 Jesus-ñum maliqqaqtini iñmiñuquniñgai nipliutiplugich, “Iñunjutchaliqsañ makuniña iñuñnik nayuutituiñaqtuani uvamni piñasuni uvuni, atakkii niqiksraitmiut. Aullaqtinnianitkitka niğisunjañitñik atakkii taaqtukkaqpiaqtut apqutmi.” **33** Maliguaqtaiñ nipliutinigaat, “Sumiñ paqitkisivisa naamayumiñaqtuamik qaqqiamik marrumani iñuiñaami niğipkautiksramik iñugayaanun?” **34** Jesus-ñum apiqsrugniñgai, “Qanutun iñugiaktigiruanik qaqqianik piqaqpisi?” Kiuniñaat, “Tallimat malguñnik suli iñugiakisuranik aqalugauranik.” **35** Jesus-ñum tiliriñigai iñugayaat aquvitquplugich nunamun. **36** Tiguniñgai tallimat malguk qaqqiat aqalugauratlu. Quyaanikamiñ Agaayyun avguqlugich qaiññigai maliguaqtimiñun, aasiili taapkua autaaqlugich iñugayaanun. **37** Iluqatinj iñuich niğiñiqsut niğisuiğataqhutiñ. Aquagun maliguaqtai katitchiñiqsut ilakunik immiğataqlugich tallimat malguktun aguupmañnik. **38** Tamatkua niğiruat 4,000-tun iñugiaktiginiqsut, ağnatlu ililgaatlu kisirrutisunaqnagich. **39** Jesus-ñum aullaqtinnjanikamigich iñugayaat ikiniqsuq umiaçpauramun tikitluni nunajanun Magadan-ñum.

16

Iñuich Qasiliñiqsut Quviqnaqtuamik Savaamik

¹ Pharisee-ηjuruatlu Sadducee-ηjuruatlu utlautiniqsut Jesus-mun uuktuagiaqlugu. Apiqsruġniġaat qīñiqtitquplutin quviqnaqtuamik savaamik nalupqinaigutaulugu Agaayyutim tuyuqtilaanjanik qilañmiñ. ² Kiuniġai, “Unnuksraaqman uqaġuurusi, ‘Silañjuġniaqtuq atakkii qilak kaviqsiruq.’ ³ Suli uvlaami uqaġaqtusi, ‘Silaqluġniaqtuq ugluvak atakkii qilak kaviqsiruq nuviyaqluġuqman.’ Sivuniqsitlagaluaqhusi silamik qilaum qīñiñajagun, aglaan ilitchuġitlaiññiġisi qanuutautilaanjat quviqnaqtuat savaat atuumaruat akunnapsitni. ⁴ Makua iñuich pigiitchuatlu sayuñjatuatl qīñiguktut quviqnaqtuanik savaanik, aglaan qīñigumiñaitlutiñ taatnatchimik. Qiñiħiñaġisigaat quviqnaqtuaq savaaq sivuniksriqirikun Jonah-kun.” Tavra Jesus-ηum uniññiġai taapkua aullaqhuni.

Jesus Suakataġniqsuq Maligħuaqtimiñik

⁵ Jesus maligħuaqtailu ikaaġniqsut igħluanun narvaqpaum. Maligħuaqtai ilitchuġiniqsut piiguisilaġmiknik qaqqianik. ⁶ Jesus-ηum uqautiniġai, “Qaunagħitħi puvlaksautiñatniñ Pharisee-ηjuruatlu Sadducee-ηjuruatlu.” ⁷ Aglaan uqauraġniqsut iñjmkun itnaqħutiñ, “Uqautigigaa taamna qaqqialigaanjiññapta.” ⁸ Jesus-ηum ilisimaplugin qanuq uqaqtilaanjan atapiqsruġniġai, “Suvaata ilipsiguuraq uqauraġpisi qaqquiññiplugu? Ukpiqsrilikiññiäġniqpat ilipsitni. ⁹ Kañiġisitlaitpisisuli? Naagaunniñ itqatlaħtapisigik

avguqapkich tallimat qaqqiat 5,000-nun arjutinun? Qapsiñik aguupmañnun immiqsotpisi? **10** Naagaunniiñ tallimat malguk qaqqiat avguqapkich 4,000 iñuñnun? Qapsiñun aguupmañnun immiqsotpisi? **11** Qanuğimña kañiqsiñiññiqpsi uqautiqanjisilaamnik qaqqianik? Qaunagititchi puvlaksautinatniñ Pharisee-ñjuruatlu Sadducee-ñjuruatlu.” **12** Taatnaanikman maliğuaqtai kanjqiñiqsut ilaanun uqautinjisilaagmiknik puvlaksautinik aglaan qaunagitquplugich ilisauktutinatniñ Pharisee-ñjuruatlu Sadducee-ñjuruatlu.

Peter-m Uqautiginiğaa Kisuuutilaaşa Jesus-ñum

13 Jesus utlautikami nunajanun Caesarea Philippi-m apiqsrugniğai maliğuaqtini, “Iğñiňa Iñuum kisuuniplugu uqağagivat?” **14** Kiuniğaat, “Ilañisa John Paptaaqtitchiraunigaat, atlatli Elijah-ñuniplugu, atlatsuli Jeremiah-ñuniplugu naagaqaa iläginasugiplugu sivuniksriqiraiñun Agaayyutim.” **15** Apiqsrugniğai, “Ilipsili mi kisuunasugivisitňa?” **16** Simon Peter-m nipliutinigaa, “Christ-ñjurutin. Iğñiğigaatin iñuuamu Agaayyutim.” **17** Jesus-ñum kiuniğaa, “Simon, iğñiňa Jonah-m! Quvianamiurutin! Atakkii uqautigikkan iñuum sagviaqtunxitkaa ilipnun aglaan aapaam qilañmiittuam. **18** Uqautillakkikpiñ, Peter-ñjurutin [itnautauruaq Uyağanımik] aasiiñ taavrumuňa uyağanımun nappağniağıga agaayyuviga, suli saññipayaanjiñ tuqułhum akiiliyumiňaitkai. **19** Ilvichuvva, qaITCHIGISIGIKPIÑ itqutiksranik añaayuqautaanun Agaayyutim. Suapayaaq qiliqsruumakkaqsi

maani nunami qilgutiqaqtuiñagisiruq qilañmi, aasiñ suapayaaq qilgutaiyakkaqsi maani nunami qilgutaiyakkaugisiruq qilañmi.” ²⁰ Jesus-ñum maliغاqtini uqaquñiññigai kisumununniiñ iñuñmun Christ-ñuniñuni.

*Jesus-ñum Uqautiginigaa Tuqulıksraniļu
Aŋipkakkaułiksranıļu*

²¹ Tavrakjaniñaglaan Jesus uqautri-aqsiñiqsuq maliغاqtimiñik nalupqinaiqługu, “Jerusalem-muktuksrauruja. Tavraniasiñ naglikssaaqtuksraupluňa sivulliuqtigruaniñ qauklinitñiñlu agaayuliqsit aglaliqiriniñlu, suli tuqqutauruksraupluňa. Aglaan aŋipkakkaugisiruja piñayuatigun uvlut.” ²² Peter-m avuñaqtaağutiplugu Jesus iñiqtiñigaa itnaqługu, “Ataniiq, Agaayyutimtuq taatniitingilliň taamna. Atuumaruksrauñipiaqtuq ilipnun.”

²³ Jesus-ñum qiviaqługu Peter nipliutiniğaa, “Tuungaaq, piiğiñ uvamniñ! Piñailutaurutin uvamni. Isummataiñik, aglaan isummataqqtutin iñwich isummataatun.” ²⁴ Jesus-ñum nipliutiniğai maliغاqtini, “Kisupayaam maligukkumiňa suksraaqtaksraigaa pisułli, iqsroutilugu sanniğutani aasiñ maligluňa. ²⁵ Atakkii kiapayaaq anniğiniağumiň iñuułli tammaigisigaa, aglaan kiapayaaq tammaiymiuň iñuułli piqutigiluňa piñňakkisiruq ilumun iñuułigimik. ²⁶ Iñuum piñňaktaağiļhiñaugaluağaa suurapayaanja marruma nunam, aglaan tammautigisigaa iñuutchii. Sakuuñurağniałha sumun atuğumiňaitchuq! Tarra simmiutiksraitchaa iñuum iñuutchii. ²⁷ Atakkii

Iğñiña Iñuum aggiqsaǵumaruq piqatigilugich isaǵuliŋni quviananajagun aapami, tavraniasiiň akilligisigaa iñupayaaq savaanjigun. ²⁸ Ilumun uqautigipsi, Iñuqaqtuq-samma makitaruanik uvani tuqunianjitchuanik qińigaluaqnagu Iğñiña Iñuum aggicpan umialgulugu.”

17

Jesus-ŋum Atlaŋjuqtı́lha

¹ Itchaksrat uvlut aquatigun Jesus-ŋum aullautiniǵai Peter-lu James-lu John-lu, aniqataa James-ŋum, kisiitník qutchiksuumun iǵǵimun. ² Tavrani qińiqtitlugich Jesus atlaŋjuǵniqsuq sivuǵaatni. Kiińaŋa qaummaǵíksińiqsuq siqińiqtun atnuǵaaŋi qatiqsiplutin kirratchiatun. ³ Taatnaǵmiutlu Moses suli Elijah sagviǵníqsuk uqaqatigiaqsiplugu Jesus. ⁴ Peter-m nipliutiniǵaa Jesus, “Ataniiq, nakuuniqsuq nayuutikapta uvani. Nappaitquguptigut nappaińayaqtuŋa piŋasunik palapkaaksranik, atautchimik ilipnun, suli atautchimik Moses-mun, suli atautchimik Elijah-mun.” ⁵ Uqaqtitlugusuli qaumaruam nuviyam qulaŋjutińiǵai aasiiň nipi nipliqhuni nuviyamiň, “Tavrataamna piqpagikkaga Iğñiǵa quyalimaaqtigillapiakkaga, naalaǵniyumagiksi.” ⁶ Maliguaqtit tusaakamitruŋ nipi punniqsut nunamun iqſitchakhutin. ⁷ Aglaan Jesus-ŋum utlaklugich aksinjníǵai aasiiň nipliutiplugich, “Makititchi, suli iqſinjaiǵitchi.” ⁸ Aaǵluqaminiŋ maliguaqtit qińinjíńiqsut iñuŋnik. Jesus inniqsuq kisimi. ⁹ Atqaaqsikamini iǵǵimiň Jesus-ŋum tilisińiǵai, “Uqaǵniaqası kisumununniň

tamatkuniña qiñikkapsitñik Iğñiña Iñuum anitqiłhanunaglaan tuqulığmiñ.” ¹⁰ Maliğuaqtaiñ apiqsruğniğaat Jesus, “Suvaata aglaliqirit uqaqpət Elijah aggiqqaaqtuksrauniplugu aggiñaiñjaan Christ?” ¹¹ Jesus-ñum kiuniğai, “Taapkua uqaqtut ilumutuuruamik. Elijah aggiqqaağniaqtuq Christ-miñ itqanaiyağıağlugu suapayaqaq. ¹² Aglaan uqautigipsi, Elijah aggianiktuq, aasiñ iñuich nalurut kisuutilaanjanik. Qanupayaqaq anjalatchukamitruñ anjalatkaat. Taatnatuntuuq Iğñiña Iñuum nagliksaaqtinniaqmigaat.” ¹³ Maliğuaqtaiñ kanıqsılığatağniğaat Jesus-ñum uqałha John Paptaaqtitchirimik.

*Jesus İluqsipkaiñiqsuq Nukatpiağruñmik
Irrusiqłulijmik*

¹⁴ Jesus maliğuaqtiniłu tikitmata iñugayaanun iñuum utlañnígaa sitquqhuni sivugaanun ¹⁵ nipliqhuni, “Ataniiq, nagligillañağuj iğñiğä. Qiiqsruğuupluni nagliksaallapiaqtuq. Akulaiqługu puukağaqtuq ikniğmunlu imiğmunlu. ¹⁶ Maliğuaqtipnuutigaluağiga, aglaan iluaqsılıgwiññiğaat.” ¹⁷ Jesus-ñum kiuniğaa, “Ukpiqqutaitchuasii ilipsitñi! Naagasuli killukuaqmiusi! Qanutunaglaan nayuutiniaeqpik ilipsitñi? Qanutunaglaan iglütuqtaksraigivisisuli? Uvuñautisaqsiuñata nukatpiağruk.” ¹⁸ Jesus suamasipluni tilisiñiqsuq irrusiqłulijmik anitquplugu nukatpiağruñmiiñ. Irruqsiqłuk anitman nukatpiağruk iluaqsılığniñiqsuq. ¹⁹ Maliğuaqtaiñ utlañnígaaat Jesus kisipqquqhutinj apiqsruqlugu, “Suvaata irrusiqłuk anitlaitpisigu?” ²⁰ Jesus-ñum uqautiniğai, “Pisigiplugu ukpiqsriñjiliqsi.

Uqautigipsi, Ukpiqsrisiqaqgupsi mikitilaanatun mustard-ŋum nautchiaksrauraŋatun uqau-tihiňaugiksi una iiggíq, Nuuttin iñuŋa uvakŋa, aasiiň nuunniaqtuq. Piłhiňaugisirusi supayaanik. ²¹ [Aglaan kisiagun agaayułikun uisauraalikunlu anitlagai taatnatchich irrusiqluich. Atlam sum anitchumiňaitkai.]”

*Jesus-ŋum Uqautigitqikkaa Tuqułiksranili
Aŋipkakkaułiksranili*

²² Atauthimukaminj Galilee-mi Jesus-ŋum uqautiniğai malığuaqtini, “Iğñiŋa Iñuum aatchuutigikkauniaqtuq iñuŋnun; ²³ ilinisa tuqqutkisigaat. Aglaan piñayuatigun uvlut aŋipkakkauñiaqtuq tuqqutaułhaniň.” Tavra malığuaqtai ipiqtutchallapiağniqsut.

Akiiliļiq Agaayyuvikpaum Tax-siğutiŋiňik

²⁴ Jesus malığuaqtiniļu tikitňamini Capernaum-mun nalautchirut iñuŋnik katitchiraunik aatchuutinik agaayyuvikpaŋmun. Tamatkua Peter apiqsruğniğaat, “Umaa, ilisautriksi akiiliqsuğagiva tax-sinik agaayyuvikpaŋmun?”

²⁵ “Aa, akiiliisuuruq,” Peter-m kiuniğaa. Aasii isiqman tupiğmun Jesus nipliqliqaağniqsuq ilaanun apiqsruqługu, “Simon, sumik isumavich? Kisuniň umialinji nunam katitchiragiwat tax-sinik? Nunaqatmikniň naagaqaa avakŋaqtaniň?”

²⁶ Peter-m kiuniğaa, “Atlaniň.” Jesus nipliutiniğaa Peter, “Tavra, nunaqatit akiiliqsuğniaŋiňniqsut tax-sinik. ²⁷ Aglaan atniummativiąğıvut iñuich. Aullağutin niksigiağiň narvamun. Qanganiň sivullium aqaluum niksaqpich paqitkisirutin

maniñmik. Tigulugu taamna qaitchumagiñ ilinjituñun, aasii akiliutilunuk.”

18

Kiñā Kamanagniqsrauvā?

¹ Maliúuaqtaiñ utlaklugu Jesus apiqsrugniñaat, “Kiñā kamanagniqsrauvā Agaayyutim añaayuqautaani?” ² Jesus-ñum tuqluğniğaa ilılgauraq injmiñuquplugu, aasiñ qikaqtitlugu akungatnun maliúuaqtit ³ nipliqhuniasiiñ, “Uqautigipsi, isummitqiñisuağupsi aasiñ ililusi ilılgauratun isığumiñaitchusī Agaayyutim añaayuqautaanun. ⁴ Kiñapayaaq atchiksiruaq injmiñik atriplugu taamna ilılgauraq kamanagniqsrauruq ukunakña Agaayyutim añaayuqautaani. ⁵ Suli kisum iñuum akuqtuğumiñ ilılgauraq pisigelunaqakuqtuğaaña.

Killuqsaqusaağutit

⁶ “Aglaan kia iñuum killuqsaqtitpagu ilanat makua ukpiqsrisiqaqtuat uvañnun ilılgaatun nakuutlukkayaqtuq taamna qujisigmiutchiğlugu uyağakpanmik ipipkaçpan itiniqsrajanı tağıum. ⁷ Qanutun tatamnaqtigivat nunam iñui killuqsaqusaaqtuat iñuñnik. Taatnatchich killuqsaqusaağutit atuumarut ataramik. Aglaan qanutun tatamnaqtigiva taamna iñuk ukpiğutaiqstitchiruaq iñuñnik killuqsaqusaalığmigun. ⁸ Argapsi naagaqaa isigapsi killuqsaqtitpasi, kipilugich igitchumagisi. Nakuutlukkayaqtuq isiğupsi iñuułığmun argaillusı naagaqaa isigaillusı uumakña igluktun argaliñmiñ naagaqaa isigaliñmiñ igitauluniasiiñ isuitchuamun iñniğmun. ⁹ Suli iripsi killuqsaqtitpasi

piiglugu igitchumagiksi. Nakuutluuniaqtuq isigupsi isuksraitchuamun iñuułigmun atautchimik iriqaqusi uumakja malguñnik iriliñmiñ gitauluniasiiñ anasiñjuqsagvium iknijanun.

Atrikusaun Tammaqtuaqun Ipnaikun

10 “Qaunagititchi suunjillaqiksaqatniñ makua iligaurat. Atakkii isagulinich ataramik aapamnulhiñaurut qilañmi. **11** [Igñiña Iñuum aggiqsuq anniqsugiaqlugu tammaqtuaq]. **12** Qanuq isummatiginayaqñipisiuñ iñuk piqaqtuaq tallimakipianik ipnaiñik aasiñ atausiq tammaguni? Pakkiagumiñaiññiqpañ taamna atausiq tammaqtuaq? Uniññiaqgai taapkua tallimakipiagüutailat ipnaich qimiñaamun. **13** Uqautigipsi, paqitkumiñ taamna atausiq ipnaiq quviatchautigitluuniaqaa ukunakja tallimakipiagüutailaniñ tammanjitchuaniñ. **14** Taatnatuntuuq aapapsi qilañmiittuam pisułigijitkaa atausigunniñ ilanat tamatkua ukpiqsiruat iligauratun iliplutin tammaqulugu.

Aniqan Killuqsaqtuaq

15 “Aniqatin killuqsaqpan akikjaqutin uqauutyagun killuqsautaanik kisijnugusik ilaalu ilvililu. Naalaagnikpatin aniqatigliutitqinqiñiagiñ utitmun. **16** Aglaan naalaagnisunipatin utlatqikkumagiñ piqasigutin atautchimik naagaqaa malguñnik iñnuñnik. Taapkua iñuich ilisimarautlaniaqtut uqaçipayaakkapun aniqatiupnun. Atakkii pasikkutipayaaq inillakkaugisiruq malgukkun naagaqaa piñasutigun ilisimarauruatigun. **17** Naalaagnisunilgitpagich uqaçilugu ukpiqtuanjuruuanun; naalaagnisunitchuiñaqpan aasiñ

ukpiqtuanjuruanikunniñ irrutigisigksi Jew-
 ḥuñitchuatun naagasuli tax-siliqiritun. ¹⁸ Ilumun
 uqautigpsi, Suapayaaq qiliqsruumakkaqsi
 maani nunami qilḡutiqaqtuiñagisiruq qilañmi;
 suli suapayaaq qilḡutaikkaqsi maani nunami
 qilḡutaiyakkaugisiruq qilañmi. ¹⁹ Uqautipsaaġipsi,
 Malġuugupsik maani nunami aasii anjigutilusik
 supayaakun apiqsruġupsik, aapaa qilañmi
 savaaġigisigaa ilipsitñun. ²⁰ Atakkii nani
 malġuk naagaqaa piñasut katikpata pisigeluna
 nayuutigisiruña ilinjitiñi.”

Atrikusaun Natqigutriñitchuakun Savaktigun

²¹ Aasiiñ Peter-m utlaklugu Jesus apiqsruġniġaa,
 “Ataniiq, qapsiñiaglaan natqigutiraksragivigu
 aniqatiga akitñagluña killuqsaqpan? Tallimat
 malġuñiaglaan?” ²² Jesus-ñum kiuniġaa, “Tallimat
 malġułhiñauñielañnik aglaan piñasukipiaq
 qulit tallimat malġuñiaglaan. ²³ Agaayyutim
 añaayuqautaa sagviqpan atriqagisiruq
 umialiñmik apiqsruqtuamik savaktimiñik
 qanutun ilinjitiñun akiqsruutiqaqmagaagmi.
²⁴ Makpiġarriqisaanikman iñuk akiqsruummi-
 rigikkaña manikpauramik tikiutikkauniqsuq
 ilaanun. ²⁵ Akiliyumiñaiññiqman añaayuqañan
 tunirautquniġaa aġnaatlu suli qitunġaurañi suli
 iluqaisa suurapayaanji aasiiñ akiliutigilugich
 niġġiuqsrutaiñun. ²⁶ Savakti sitquqami sivuġaanun
 uqapsaaġniqsuq, ‘Ataniiq, utaqqiurallañja.
 Utıqtitchigisigikpiñ iluqaitñik.’ ²⁷ Añaayuqañan
 ilunħutchaatiplugu aullaqtinniġaa natqigutiplugich
 niġġiuqsrutai. ²⁸ Aglaan savakti anikami
 tavrakha nalaunniġaa iļaňat savaqatmi

niğgiuqsruummirigikkani qapsiuranik maniñnik. Tiguniqlukamien qimitchiqsruaqsiñigaa nipliutiplugu, ‘Niğgiuqsruutin utiqtirruñ uvamnun.’

²⁹ Savaqataan purviginigaa injisruaqługuasiñ, ‘Utaqqiurallañja. Utiqtitchigisigikpiñ iluqaitñik.’

³⁰ Aglaan akiqsruugvigikkana utaqqisunjiññiqsuq. Aullautiñhiñañgiñaa isiqsivijmun aasiñ isiqtaupkaqługu utiqtitchiñiałhanunaglaan niğgiuqsruutaanik.

³¹ Atlat savaktit qiñiqamitruñ taamna atuumaruaq ipiqtutcharmaliqniqst. Utłakługu añaayuqaqtin uqautiniñaat iluqaitñik atuumaruanik.

³² Añaayuqajan savakti isiquniñaa nipliutiplugu, ‘Pigiitchuatiin savaktii! Natqigutigaluägikpiñ niğgiuqsruutipnik uvamnun injisruaqapñja.

³³ Suvaata ilunjuksriñgiññiqpitch savaqatiknik atriluña nagliksriñłaptun ilipnik?’

³⁴ Tavra añaayuqajan qinnautiplugu tuyuginigaa isiqsirinun anasiñjuqsaquplugu akiliññałhanunaglaan niğgiuqsruutipayañiñik.

³⁵ Taatnatuntuuq aapama qilañmi irrutini-aqmigaasi natqigutriñitchupsi aniqatiupsitñik uummatipsitñik.”

19

Jesus Iłisautriuq Aviñlikun

¹ Jesus uqañaiqami tamatkuniña aullağniqsuq Galilee-miñ utlautipluni nunaaqqiurañiñun Judea-m akiani Jordan-ñum.

² Iñugiaktuat iñuich malinjnígaat. Jesus-ñum mamitinniñgai atniğñaqtuat tavrani.

³ Ilañisa Pharisee-ñuruat utlañjnígaat. Tavra uuktuaqsaqługu apiqsrlugiññiñgaat, “Añutim avitpagu nuliani patchitchiğuni supayaanik,

maliğutaksrakuağnaqpa?” ⁴ Jesus-ηum kiuniğai, “Agliqisimasuknağıksi aullağniipman Agaayyutim iñiqsiłha anjutmiglu ağnamiglu. ⁵ Taatnaqhuni anjutim unisaksraqigaa aapani suli aakani aasiiñ piqasiutiluni nuliağmiñun, iluqatik-aasii atautchisun timinigutik. ⁶ Malguunjaqsuk aglaan atausiñjuqtuk. Iñuum avitiñilliun tuvaaqatini Agaayyutim piqasiutipkaqmatik.” ⁷ Pharisee-ηuruuat apiqsruğniğaat, “Suvaatami Moses tillisiqağniqpa anjutmun agliutiqqaağlugu aullaqtilluguasıiñ nuliani?” ⁸ Jesus-ηum kiuniğai, “Moses-ηum avititkaasi nuliapsitñiñ atakkii ilisautitchiitpaitłusi. Aglaan itniingítkaluaqtuq aullağniżħhaniňaglaan. ⁹ Uqautigipsi, Ağnaq tuniqsimauraqnañħaan anjutmiñun naagasuli anjutim avitkumiñ, ilaqatnitqiguniasii atlamic ağnamik. Taamna anjun atlatuqtauruq.” ¹⁰ Maliguaqtaiñ nipliutiniğaat, “Taatna inniaqpan akunğakni nuliağgiq nakuutluñniağniqsuq ilaqatniñitchuni.” ¹¹ Aglaan Jesus kiuniğai, “Iñugiaktuat iñuich akuqtutlaitkisigaat taamna ilisattun. Kisimiňaglaan tamatkua Agaayyutim qaitchikkajı akuqtutlagisigaat. ¹² Atakkii anjutiqaqtuq isuanunaglaan ilaqatnikkummataitchanik; suli anjutiqaqmiq ilaqatnikkumiñaiyakkañitñik iñuich; atlatsuli, ilaqatnikkummataitlutij atakkii savautisutlukkaat Agaayyun. Iñuum akuqtugumiňağumiñ taamna ilisattun akuqtuğliuñ.”

Jesus-ηum Agaayyutiniğai Ilülgaurat

¹³ Iñuich ilülgaurat tikiutruğniğaiç Jesus-mun argańi ililugich ilülgauranun agaayyutitquplugich.

Aglaan maliguaqtit iñiqtignigaich tamatkua iñuich. ¹⁴ Jesus nipligñiqsuq, “Ililgaurat uvamnuktitchigik. Avriaqtaunasi iliñitñun atakkii Agaayyutim añaayuqautaa añmaruq iñuñun atriqaqtuanun ililgaanik.” ¹⁵ Ilikamigich argańi agaayyutiqqaqħugħich aullaġniqsuq.

Nukatpiaq Sulliñaurauqaqtuaq

¹⁶ Añun utlautiniqsuq Jesus-mun apiqsruqhuni, “Iłisautrii, sunik nakuuruuanik savagluja piqat-lasiñayaqpik isuitchuamik iñuułiġmik?” ¹⁷ Jesus-ñum nipliutiniġaa, “Suvaata taiguutiqaqpija nakuuruamik? Kisimi Agaayyun nakuuruuəñuruq. Aglaan iñuułiqaġukkuvich tupigiyumagitin tillisit.” ¹⁸ Nukatpiam apiqsruġniġaa, “Nallinjich?” Jesus nipligñiqsuq, “Iñuağniaqnak, atlatuğniaqnak atlám iļaqataanik, tiglinjaqnak, sagluniaqnak ilisimarauguvich. ¹⁹ Kamagilugik aapan aakanlu, piqpagilugu iñuuniaqatin iliptun ililugu.” ²⁰ Nukatpiaq nipligñiqsuq, “Tamatkua iluqaisa qaunagigitka nutaułlamniñaglaan. Sumik minitchivik?” ²¹ Jesus-ñum uqautiniġaa, “Taنجiġisukkuvich tillisipayaanik tunityakkich suurat pisin aasiiñ qailługħich maniich iļaippauranun. Taatnaġuvich piññakkisirutin akisuruamik qilañmi. Taatnaanikkuvich maliñja.” ²² Nukatpiam tusaakamiuñ taamna ipiqtutchakhuni aullaġniqsuq atakkii sulliñaurauqaqhuni. ²³ Jesus-ñum nipliutiniġai maliguaqtini, “Iłumun uqautigipsi, Sakiqnal-lapiġisiruq umialguruami iñuñmi isigniałiksraja Agaayyutim añaayuqautaanun. ²⁴ Uqautipsaġipsi, qaġanatluktuq pikukturuam isiliksraja ‘Mitqutim

Iraagun' uumaknja umialguruam isiiksrañjaniñ Agaayyutim añaayuqautaanun.” ²⁵ Maliguaqtaiñ tusaakamitruñ taamna quvigutchallapiagñiqsut nipliqhutinj, “Kiñami anniqsugisiñiqpa?” ²⁶ Jesus-ñum takusaqlugich nipliutiniğai, “Sua iñuich savaagiyumiñaisajat Agaayyutim savagitlapiagatağaa.” ²⁷ Peter-m kiuniğaa, “Supayaat unitkivut maligukhutin. Aasiili sumik piññajniaqpisa?” ²⁸ Jesus-ñum nipliutiniğai, “Uqautigipsi, Igñiña Iñuum aquvinjanikpan aquppiutaqpañmiñun quvianağmiñi suli supayaaq nutaaguqpan, tavra ilipsi maliguaqtusii uvamnik, aquppigisipmiusi qulit malğuñun aquppiutaqpañnun atanniqsuğlugich kiñuvianji qulit malğuk iğñiñiñ Israel-ñum. ²⁹ Suli kiñaliqaa unitchiruaq kiñuniğmiñigu aniqatmiñigu aapamiñik aakamiñigu, ililgaağmiñigu naagaqaa nunamiñik pisigelunaqakuqtwigisiruq akiliusianik tallimakipiağuglugu. Piññakkisiruq isuitchuamik iñuułigimik. ³⁰ Aglaan iñugiaktuat sivulliuruat pakma aqulliğugisirut, suli iñugiaktuat aqulliuruat pakma sivulliğugutinj.”

20

Savakit Nautchiivijmi

¹ “Agaayyutim añaayuqautaa sagviqpan itkisiruq iñuktun nautchiiviqaqtuatuun. Anipluni uvlaatchaurami savaktiksraqsiuğniqsuq nautchiivijmiñun. ² Sivunniuqatigiqqaaqlugich savaktiksrat akılığisiñiplugich uvlum akiksrañjanik savakpata nautchiivijmiñi tiliñigai. ³ Qulinjuğutailamun sassaq tikitman

aullalgitñami qiniñigñigai atlat tunisiñiağviññi qikaqtuat ittuaqsiñaqhutinj. ⁴ Nipliutiniğai, ‘Savviağitchili nautchiivimñun. Nalaunnjaruamik akılığisigipsi.’ Savviağniqsut. ⁵ Aullalgiññiqsuq uvluq qitiqquğunjaqman suli piñasunun sassaq ilipman, taatnatunsuli savviaqtitchipluni.

⁶ Suli aullalgiññiqsuq tallimanun sassaq tikitchuñnaqsipman, aasiññ paqilgitñami atlaniq qikağaaqsiñaqtauanik apiqsruğniğai, ‘Suvaata qikaqtuaqsiñaqpisi taatna uvluvakpauraq ittuaqhusi?’ ⁷ Kiuniğaat, ‘Atakkii kia-unniñ iñuum savaktiksraqtaağinjitolta.’ Uqautiniğai, ‘Aullağitchili savviağusi nautchiivimñun.’

⁸ Anaqaksraaqman nautchiiviqaqtuaq uqagñiqsuq savaktit añaayuqanjanun, ‘Tuqluğlugich savaktaut akılıkkich akiññaktaaanitñik, aullağniilugich aqulliuplitinj savviaqtauniñ sivulliğñunaglaan.’ ⁹ Aggiqmataasiiñ taapkua savaktiksraqtaaŋjuruat tallimanun sassaq ilipman, akılıqługich uvolum akiksrajanik.

¹⁰ Taapkuali savaktiksraqtaaqqaanjuruat aggiqaminj, isumaniqsut akiknjalunjaqhutinj. Aglaan atausiullaaplutinj akuqtuipmiñi qsut uvolum akiksrajanik. ¹¹ Taapkua akuqtuikamij akiññaktaağmiknik uqapiluaqsiñaqsut akikjaqlugu nunautilik ¹² uqaqhutinj, ‘Tamatkua aqulliich savviaqtuat savaktut atautchiğhiñami sassagañigmi. Akılığitin atunim uvaptiktun naagauvva iglutanuqługu uunaq savakhuta uvluqtutilaanjanun.’ ¹³ Aglaan kiuniğaa ilaňat, ‘Ilauramaarj, savvaqluutinjtkikpiñ ivayağniağutin. Sivunniuqatiginjipiňa savagukhutin akiksrajanun

uvlum? ¹⁴ Tigulugu akiliusian aŋilaagiñ. Qaitchisukkiga aŋun savviaqtuaq aqulliupluni ilipniktuaq akiliipmatun. ¹⁵ Nalaunŋaiññiqpik isumaptun aŋalatchikama pigikkamnik? Naagaqaa killuqsraqpich anniqsraitñama?" ¹⁶ Taatnatuntuuq aqulliich sivulliguutigisirut, suli sivulliich aqulliutilutin. [Iñugiaktuat iñuich tuqlirakkaugaluaqtut, aglaan ikituurat pilksraqtaajurut.]"

Jesus-ŋum Piŋatchiġñiġai Uqaqallı Tuqqutauliksraġmiñiglu Aŋipakkaułiksraġmiñiglu

¹⁷ Jesus Jerusalem-mukhuni saniq-paktaağutiniġai qulit malġuk maliguaqtini uqautiplugich, ¹⁸ "Naalağnisitchi, Jerusalem-muŋniaqtugut Iğniha Iñuum aatchuutigikkauviksrajanun qaukliniġun agaayuliqsit suli aglaliqirinun. Ilinisa tuqqutaksraġuġniňiġaat. ¹⁹ Qaitkisigaat Jew-ŋuŋitchuanun mitautigitqulugu ipiġaqtuġlugulu, suli kikiaktuutipkaġlugu sannigutamun; aglaan aŋitqiksikauniaqtuq piŋayuatigun uvlut."

Aakauruam Injqsruaħa

²⁰ Aasiiñ Zebedee-m iğñakkiñ aakanjak utlautiniqsuq Jesus-mun piqatigiplugik iğñaġni. Sitquġviginigaa sivuġaanun injiqlugu pisitquplutin. ²¹ Jesus-ŋum apiqsrugniġaa aġnaq, "Sumik pisukpich?" Aġnam kiuniġaa, "Tilikkik ukuak iğñakka aquppitħasilugik ilipni, iļaqataa taliqpiqñun suli iļaqataa saumipñun atanniqsuiguvich aŋaayuqautipni." ²² Jesus-aasiiñ nipliġñiġsuq, "Nalurus i sumik injqsruqtilaapsitñik. Imiħhiñauvitku qallun imiċsaġumakkaġa

[naagaqaa apqusaalhiñauvitku nañinnaqtuaq apqusaagaksrautigikkaǵa?]" Taapkuak iǵñakkiñ kiuniǵaak, "Imihiñaugikpuk." ²³ Jesus-ŋum nipliutiniǵik, "Iłumun imiǵniąǵalaqtusik qallutmiñ imiǵniakkamniñ. Aglaan piksraqtuksrauńitchuja aquppiruksrańnik taliqpimni saumimniłu. Taapkuak innak iñuqąǵniaqtuk aapaa itqanaiyautikkajknun." ²⁴ Qulit tusaakamiń taavrumińa iluagińiñiǵaich taapkuak malǵuk aniqatigiik. ²⁵ Jesus-ŋum tuqlugniǵai maliguaqtini uqautiplugich, "Ilısimarusi ańjalatinjich Jew-ńuńitchuat ańjalanniǵlugaqtillańatnik iñuńitńik suli kamanaǵniqsrańisa nańititchuuplugich. ²⁶ Aglaan taatnaittuksraungińitchuq ilipsitńi. Kińapayaaq kamanaǵuktuaq akunnapsitńi ilipsitńun savaktiruksrauruq. ²⁷ Suli kisupayaaq quakliusukkumi savaktaǵruguqtuksrauruq iluqapsitńun. ²⁸ Taatnatun Iğńińa Ińuum agińitchuq savautipkaǵiaǵuni, aglaan savautrityaqhuni suli qaitchaqtuqlugu iñuułli tasuǵuklugini iñugiaktuat iñuich."

Jesus Mamititchiruq Malǵuńnik Ayańjaruańnik Ańjutijnik

²⁹ Jesus maliguaqtiniļu aullaacsipmata Jerichomun, iñugiallapiaqtuat malinjnigaat. ³⁰ Malǵuk ańutik ayańjarauak aquppińiqsuk sanigaatni tumitchiat. Tusaakamik Jesus apqusaagńiplugu kappainjaniqsuk, "Ataniiq, kińuviańa David-ŋum! Nagligillanıńiaqtiguk." ³¹ Iñugayaat ińiqtigńiǵaich nipaisaaquplugik, aglaan nipitutluuraqhutik kappainjaniqsuk, "Ataniiq, kińuviańa David-ŋum! Nagligillanıńiaqtiguk." ³² Jesus

nutqaqhuni tuqlugniġik, aasiiñ apiqsruqlugik, “Sutquvisik uvamnun?” ³³ Kiuniġaak, “Ataniiq, qiniitlasisuktuguk.” ³⁴ Jesus iļunħutchañniqsuq taapkuñnija. Aksinjñiġik iriñik. Tavrauvaa qiniitlasiñijsuk, aasiiñ maliklugu Jesus.

21

Jesus-ηum Tikisaalha Jerusalem-mun Ataniqtun

¹ Aasiiñ qallikamiñ Jerusalem-mun tikiñnijsut Bethphage-mun, iġġiġnun atiqaqtuamun Olives-mik. Tavrakna Jesus-ηum tiliñiġik malġuk maliġuaqtijni, ² uqautiplugik, “Aullaġutik nunaaqqiuramun sivunnaptikniittuamun. Amaniajan paqitkisigiksik pituqaqtuaq natmaksiġvik nuġġaŋalu. Pituigħuglik uvuňautiyumagistik uvamnun. ³ Kia iñuum qanuqpatik uqautiyumagiktik atanġuruamun inuġiniługik. Taavruma tavrauvaa aullaqtinniagik.” ⁴ Iluqaan atuumanijsuq taŋiṣaqlugu sivuniksriqirim uqautigikkha itnaqħuni,

⁵ “Uqautisigik iñuji Zion-ηum, Ataŋji, umialiksi aggijsuq ilipsitñun. Piisaanjičchuq usiaqsijsuq natmaksiġviñmi, nuġġaŋaniunniñ natmaksiġvium.” *Zechariah 9:9*

⁶ Malīguaqtik aullaġnijsuk tuvraqlugu Jesus-ηum uqauttutaa iñmiknun. ⁷ Taapkuak aggiutiniġaak natmaksiġvik nuġġaŋalu Jesus-mun. Iliñiġaich atnuġaatik natmaksiġviñmu aasii Jesus aquvitluni taapkuñnuha. ⁸ Iñugiallapiaqtuat iñuich siaminniġaich atnuġaatin tumitchianun. Atlatli kipriñijsut akiqqunik napaaqtuniñ

siapsiutipluginich tumitchianun. ⁹ Iñugayaat pisuktuat sivuagun Jesus-ηum suli tamatkualu maliktuat niprualaniqsut,

“Hosanna. Nanğaglakput iğniña David-ηum.

Uvvatuq Agaayyutim pilutiqaagliuñ tikitchuaq piqusiqhuni Ataniğmik. *Psalm 118:26*

Nanğakkauli Agaayyun qutchinjñiqsrami qilañmi.”

¹⁰ Tavra Jesus isiqman Jerusalem-mun iñupayaanji nunaaqqim ağayaullañniqsut, aasiññ iñuiçh apiqsruqtuğniqsut, “Kiña una?” ¹¹ Tamatkua iñugayaat kiuniğaiçh, “Taamna tavra Jesus-ηuruq, sivuniksriqiri Nazareth-miñ Galilee-mi.”

Jesus-ηum Suaqluiyaiñha Agaayyuvikpauramik

¹² Jesus-ηum isiqami agaayyuvikpañmun anittağniğai iluqaisa tauqsiqsuktuat suli tunisiullaqtuat tavrani, suli ulgutaqlugich tiivilut maniñnik simmiqsuğvíñich aquppiutanitlu tamatkua tunisiullaqtuat tiñmiagruuranik.

¹³ Jesus-ηum uqautiniğai tamatkua, “Aglausi-maruq Agaayyutim makpiğaañiñi, Tupığa taggisiqağniaqtuq agaayutyagvíñmik, aglaan iriqtuğvigliutipkağıksi tigliñniaqtinun.” ¹⁴ Tavrani agaayyuvikpañmi ayaunjaruat suli pisutlaitchuat Jesus-muñniqsut, aasiññ Jesus mamitluginch.

¹⁵ Qauklinich agaayuliqsit aglaliqiritlu uumitchajniqsut qiniqamitruñ Jesus savaaqaqtuaq quviqnaqtuanik suli ililgaat niprualaruat agaayyuvikpañmi niplihutin, “Nanğaglakput iğniña David-ηum.” ¹⁶ Tamatkuali nipliutiniğaat Jesus, “Tusaavigich makua sumik uqaqtalaanjat?” Jesus-ηum kiuniğai, “Ii, agliqisimasuknağıksi uqaqliq uqaqsimaruuaq,

‘Aniqammiurat ililgauratlu nanġaipkaġniġitin quyy-
atillaġtamik?’” *Psalm
8:2*

17 Jesus-ņum uniññigai. Aullaġniqsuq nunaaqqiqa-
pañmiñ siñiktaqhuni Bethany-mi.

Jesus-ņum Pannaqtitkaa Fig Napaaqtua

18 Uvlaaġuqman Jesus utillaġmi nunaaqqiqa-
pañmun niġisuligñiqliq. **19** Qiñiqamiuŋ fig napaaqtua
apqutmi utlañniġaa aglaan paqitchinjiteluni
fig-nik, tamarra milukataigaluaq. Jesus-ņum
nipliutiniġaa napaaqtuq, “Tavrakħaniñagħlaan
asianik nauritqinjiñaqnak.” Taamna napaaqtuq
pannaqluktiġniġaa. **20** Malīgħaqtaiñ qiñiqamitru
taamna quvigħutħakhutiż uqaġniqsu, “Qanuqhuni
manna fig napaaqtua paniqticpaun?” **21** Jesus-
ņum kiuniġai, “Uqautigipsi, Ukpiqsrisiqaġupsi
arguaqtusunjaqasi pitħanayaqtusi savaaġikkaptun
taavrumiha fig napaaqtuanik, aglaantuq
nipliġupsiunniñ uumuna iġġimun, ‘Nuutittin
igitaulutin taġiūm’ taatnallapiaq atumanayaq-
tuq. **22** Ukpiqsrilikun apiqsrugħupsi supayaamik
akuqtuġisirusi agaayulikun.”

Kimik Jesus Tuyuġiriqaġniqa?

23 Jesus Jerusalem-mun tikiñħanikman isiġniqliq
agaayyuvikpañmun. Qauklinja agaayuliqsit
sivulliuqtigruatlu utlañniġaat Jesus ilisautripkaqħlu
aasii nipliutiplugu, “Kisum ajalatchiħagħun
savaaġivigħi tamatkua? Kia sajnixsritpatin
taatnatun?” **24** Jesus-ņum kiuniġai, “Uvaňaptuuq
apiqsrugħniġiġipsi atautchiħiħiñamik. Kiugupsitja
uqautigisipmigipsi nakiñ ajalatchiħiġiqaqħlu
savaaġitilaq-taħbi tamatkua. **25** Kia sajnixsritpaun

John paptaaqtitchiquplugu, Agaayyutim naagaqaa iñuich?” Uqaqtuyaagñiqsut iñmiknun, “Uqaqta agaayyutmiqsauniługu Jesus-ñum uqautiniągaatigut, ‘Suvaatami ukpiġinjitsipisut John?’ ²⁶ Aglaan uqaqta iñukmiqnsauniługu, iluiğutchaktinniağıvut iñuich atakkii iñupayaat nalupqiginjitsaat John sivuniksriqirautilaanja.” ²⁷ Aasiili kiuniąaat Jesus, “Nalurugut.” Tavra nipliutiniągai, “Uqautiyumiňaitmigipsi sumiň aŋalatchisiqaqluńa savaaqaqtillaamnik tamatkunięa.

Atrikusaun Malġukkun Iğñikkun

²⁸ “Qanuq isummatigiviunli aŋun iğñiqaqtuaq malġuñnik? Utlaŋnięaa aŋayukliq nipliutiplugu, Iğñių savviağıň nautchiivimňun ugluvak.” ²⁹ Taavruma kiuniąaa, ‘Savviaağumiňaitchuńa,’ aglaan aquagun nunuuraniqsuq aullaqhuniasii. ³⁰ Aapaňak utlautilgiňniqsuq ilaqataanun iğñiġmi uqautiplugu sivuanisun. Taavruma kiuniąaa, ‘Savviaağisiruńa,’ aglaan aullajiňniqsuq. ³¹ Nalliak taapkuak iğñakkii tupiginiqpatku aaparik?” Kiuniąaat, “Taavruma sivullium.” Jesus-ñum nipliutiniągai, “Nipliutigipsi, tax-siliqirit suli akiisut iñugiliutiniągai Agaayyutim aŋaayuqautmiňi sivupsitňiň. ³² John aggigaluaqtuq ilipsitňun ilisautityaqhusi nalaunŋaruakun iñuuniągviksarakun, aglaan ukpiġinjitsiksi John. Aglaan tax-siliqirit akiisutlu ukpiġigaat. Aasiili qiñiqapsigik nunuuranjitchusi aquvatigun ukpiġilugu.

Atrikusaun Nautchirriqiritigun

³³ “Naalaġnillagħitchi atlamic atrikusaut-mik, Iñuqagħniqsuq nunaqaqtuaamik.

Nautchirrigviliugniqsuq, sapukutchiqługu avataagun, nivakhuni misuğuliugviksramik, nappaipluni nasiqsrugviñmik, tavraasiiñ atukkirutigiplugu nautchirriqirinun. Taatnaanikami aullağniqsuq uñasiksuanun nunamun. ³⁴ Tavra qallipman pukugviksraq asianik tuyuğiniğai savaktini nautchirriqirinun aitquplugin piññaktaaksrautni ilinjitiñ. ³⁵ Aglaan nautchirriqirit tiguniğaiç savaktai, aasiiñ anaumikługu atausiq, suli tuqqutlugu ilaŋat, atlasuli miļuqtuqługu uyağajnik. ³⁶ Tuyuqalgiññiqsuq atlanik savaktinik, iñugiatluktuanik sivullığiñ. Aglaan savvağlulgıññiğaiç taatnatun. ³⁷ Aqulliqpiaŋuplugu tuyuğniqsuq iğniğmiñik ilinjitiñun uqaqhuni, ‘Taluğiniağaat iğniğä.’ ³⁸ Aglaan nautchirriqirit qiniqamitruŋ iğniq uqağniqsut iñmiknun, ‘Tamarra paitchaktaaksralik, ki tuqullakput piññaktaaqgiluguasıi paitchaktaaksrautaa.’ ³⁹ Tiguplugu aninniğaat asialiviñmiñ tuqqutluguasıiñ. ⁴⁰ Taatnamik, iñua asirrivium aggigumi qanuğniaqpagich tamatkua nautchirriqirit? ⁴¹ Kiuniğaat, “Taapkua iñukluich nañitillugich tuquunniağai, aasiiñ atukkirutigilugu asialivik atlanun nautchirriqirinun aatchuğumiñaqtuanun iñmiñun asianik pivik tikitpan.” ⁴² Jesus-ñum nipliutiniğai, “Agliqisimasuknağıksi Agaayyutim uqałha,

‘Uyağak tuppirlit ayakkaŋat,
taamna uyağak piitchuiłłapiağaqtuq
tuppirauni.

Taamna atanğum savaağigaa
suli quviqnaqtuaŋunasugigikput.’

Psalm

118:22, 23

43 Taatnamik uqautigipsi, Iñugingiğisigai Agaayyutim añaayuqautaa, uvakjaniñaglaan Agaayyun aŋalatchiñiaqtuq iñuŋnik tupiksiruanik pisułigmiñik. **44** Aasiiñ kisupayaaq puukaqtuaq taavrumuja uyaǵaŋmun siqumitauniaqtuq, aglaansuli taavruma uyaǵaum kattaqitñikkumi iñuŋmik kanuǵiñiaǵaa.”

45 Qauklıjich agaayuliqsit suli Pharisee-ŋuruat tusaakamisigik Jesus atrikusautinji ilisimaniqsut Jesus-mun uqautigitilaagmiknik. **46** Tiguksukkaluaǵnigaat, aglaan iqsiniqqsut iñugayaanik atakkii iñuich ukpiqhutinj Jesus sivuniksriqirauniplugu.

22*Atrikusaun Niǵiqpagvikun Ilaqatnigviksrautni*

1 Taimma uqaaqtuagaqsilgiññiqsuq atrikusautitigun uqaqhuni, **2** “Agaayyutim añaayuqautaa sagviqpan atriqaqgisiruq umialinjmic itqanaiyairuamik niǵiqpagviksramik iǵñi ilaqatnigviksrautaani. **3** Tiliñigai savaktini tuqluǵiaquplugich tamatkua aiyugaaqtauruat niǵiqpagviksramun, aglaan aggigunjiññiqsut. **4** Umialik tiliritqilgiññiqsuq atlanik savaktimiñik uqaqhuni, ‘Uqautiyumagisi tamatkua aiyugaaqtauruat, Itqanaijanikkiga nullautchiǵviksraǵa. Tuqqutchaniktuja uqsraqsaŋitñik tuttuq-pałuŋma nuǵǵaǵmalu. Suapayaaq itqanaiqsuq. Aggigusi niǵiqpagiǵitchi katchuutiniaqtuaŋnun.’ **5** Tamatkua aiyugaaqtauruat suliqutiginjiññiǵaich aglaan aullaḥhiňaǵniqsut, ilanjet savviaqhuni

nautchiiviñmiñun suli atla tauqsigñiağviñmiñun.

6 Ilañisa tiguniqluñniğaiç savaktit anaumiklugich suli tuqqutqataqlugich. **7** Umialgum tusaakamiñ taamna uumitchaňniqsuq. Tuyuginiğai anuyyiqtini tuqqutchaqtuaquplugich tamatkua iňuaqtuqtuat suli ikipkağlugu nunaaqqiňat. **8** Tavra nipliutiniğai savaktini, ‘Ilaqatnigviksraun itqanaitkaluaqtuq aglaan taipkua aiyugaaqtaugaluaqtuat nalliummatinjitchut. **9** Aullağusi tumitchiat kaňigalunjiňnun aiyugaaqlığıagitchi kisupayaanik qiniňkapsitňik aggiqulugich katchuutiniaqtuak niňipkaiviksrautaaknun.’ **10** Savaktit aullağniqsut tumitchianun aasiiň katitchiaqsiplütin iňuňnik atisiplugich nakuuruatlu pigiitchuatlu. Ilaqatnigviksraunaasiiň immiňniqsuq paqitapayaağmiknik. **11** Aglaan umialik isiqami qiniňgiaqlugich tuyuğmiaksraqtaaňjuruat, qiniňgniňaa iňuk tavrani atnuğaaqtummaaňitchuaq piqutigilugu ilaqatniňniaqtuaq. **12** Umialgum nipliutinigaa taamna iňuk, ‘Iauraamaaň, qanuqhutin isicpich niňiqpagvianun atnuğaaqtusuňaqnak nalaunňaruanik?’ Taamna iňuk nipiksraiňňiňqsuq.

13 Umialgum uqautiniğai savaktini, ‘Qiliqsigik argaillus isigaillus igillugu aasii taagniňsrallapiamun. Tavrani itkisiruq qiaľiq suli tiraalatchiňiq kigutinik.’ **14** Tavrani Jesus niplipsaağniqsuq, “Iňugiaktuat iňuich aiyugaakkaugaluaqtut, aglaan ikituurat piksraqtaaňjurut.”

Akiňiaksrapiatigun Tax-sinik

15 Pharisee-ňjuruat sivunniugaqsiňiňqsut pitchağuklugu Jesus uqałhigun. **16** Tuyuqağniqsut

maliğuaqtimiknik ilaanun, piqasiqługich Herod-kuaqtuanik uqaqhutiŋ, “İlisautrii, ilisimarugut nalaunŋaruaŋutilaaqnik. İlisautrirutin Agaayyutim iňuniagvigitqukkajanik ilumutuuruakun sugisunjaqnuq qanuq iňuich isummatiqaqtilaaŋat, aasiiň suginjitmigiň iňuum suurautilaaŋa.

17 Uqautitigut sumik isummatilaaqnik taavrumuuna, Maliğutaksrakuağnaqpa akiliiruni tax-sinik Caesar-mun naaga nalaunŋaitpa?”

18 Aglaan Jesus ilisimaplugu sivunniuğutaat pigiliqiłlikun nipliğňiqsuq, “Ükpiŋŋuaqtisii! Suvaata uuktuaqphisitňa? **19** Qiňiqtilaksitňa maniŋmik akiliqsuutauruamik tax-sinun!” Qaitchiňiqsut maniŋmik.

20 Jesus-ŋum apiqsruğniğai, “Kia-una agliutraňa maniŋmi? Kiasuli aglaňa?”

21 Kiunigaat, “Caesar-m.” Aasiiň Jesus-ŋum uqautiniğai, “Akilliutigilugu Caesar-mun Caesar-m pigikkaňa, suli Agaayyutmun pigikkaňa Agaayyutim.” **22** Tusaakamitruň Jesus-ŋum uqaġikkaňa quviġusuŋniqsut unitļuguasiiň.

Apiqsruun Aŋipkakkaułikun Tuqulığmiň

23 Taavrumanı uvłumi Sadducee-ŋuruat, tamatkua uqağuuruat tuquruat aŋitqitlaiňniplugich, utlautiniqsut Jesus-mun apiqsruğukługu, **24** “İlisautrii, Moses-ŋum uqautigaatigut itnaqhuni, Aŋun ilaqtatıqaqtaq tuqukpan qitungigaluaqani, taavruma aŋutim aniqataan ilaqtatnikağıräksräginigaa uilgağnaaq qitungisilugu aŋutmik ilisimanaguniasiň tuquruam qitungaġitilaanjanik. **25** Samma maani ittut tallimat malġuktun aniqatigiich akunnaptikni: aŋayukliq nuliaqtuaq tuqopluni qitungaġitluni, unitļugu

nuliani aniqatmiñun. ²⁶ Tugliasuli aniqataa taatnatun tuqupluni piñayuaglu, kiisaimma iluqatinj aniqatigiich tuquvut. ²⁷ Aqulliupluniasiñ ağnaq tuqupmiñiqsuq. ²⁸ Taapkua tallimat malguuruuat anjutit nuliaqtuat iluqatinj taavruminja ağnamik, nalliyata nuliağıgisiñiipauñ taamna anjitzigviñmi?” ²⁹ Jesus-ñum kiuniğai, “Qanutun killukuaqtigivisi! Nalugisi Agaayyutim uqalhich ilaanolu sañja. ³⁰ Iñuich anjitziguminj tuqumiñ ilaqatniktuğumiñaitchut naagaqaa ilaqatniktitakkauyumiñaitchut. Aglaan itkisirut isağuliktitun qilañmiittuatun. ³¹ Agliqisimasuknağıksi Agaayyutim uqauttuaa ilipsitñun anjitziliçun tuqulığmiñ. ³² ‘Agaayyutigigaatña Abraham-lu Isaac-ñumlu Jacob-ñumlu.’ Agaayyutiginjikaat tuquñaruat aglaan iñuuruat.” ³³ Iñugayaat tusaakamitruñ Jesus-ñum ilisauttutaa quvíğusuñniqsut.

Kamanagliqsrakun Tillisigun

³⁴ Pharisee-ñuruat katimaniqsut tusaakaminj Jesus-mun nipaiqsiñiplugich Sadducee-ñuruat. ³⁵ İlañata ilisautriñuruam maligutaksranik apiqsrugnígaa Jesus uuktuağuklugu, ³⁶ “Ilisautrii, nalliat tillisit kamanagliqsravva maligutaksrani?” ³⁷ Jesus-ñum kiuniğaa, “Piçpagiyumagiñ ataniq agaayyutigikkan iluqaaniñ uummatipniñ, iluqaaniñ iñuutchipñiñ, suli iluqaaniñ isummatipniñ.” ³⁸ Taamna tavra sivulliq suli kamanagliqsräq tilliñ. ³⁹ Suli tuglia taatnatun itmiuq, ‘Piçpagilugu iñuuniaqtin ililugu iliqtun.’ ⁴⁰ Maliğutaksrapayaaq suli sivuniksriqirit

ilisauuttutigikkañich tunñaviqaqtut taapkuñunuja malguñun tillisiñun.”

Apiqsruun Anniqsuqtikun Akiqsruutauruakun

⁴¹ Pharisee-ñuruat katimapkaqlugich Jesus-ñum apiqsruñniñgai, ⁴² “Qanuq isummatigivisiun Christ, anniqsuqtí akiqsruutauruaq? Kia kiñuniagivañ?” Kiuniñaat, “David-ñum.” ⁴³ Jesus-ñum nipliutiniñgai, “Qanuqhunimi David-ñum, uqaqhuni Irrutchikun, taiguutiqaagniqpañ ataniñmik? Atakkii uqaagniñguguuq,

⁴⁴ ‘Ataniq uqaqtuq Atanimnun:

Aquvittin kamagitchiuviksrapnun uvañun akiiliñiałhatnunaglaan uumigiritin.’

Psalm 110:1

⁴⁵ David-ñum iñmiñik taiguutiqaqpagu Ataniñmik, qanuğmi Anniqsuqtí David-ñum kiñuviağıtlaniqpañ?” ⁴⁶ Nalliatunniiñ Pharisee-ñuruat kiulguiññigach Jesus-ñum apiqsruutai. Tavrakñaniñaglaan uvulumiñ kiaunniiñ apiqsruqtağuñaiñigaat Jesus.

23

Jesus-ñum Kiliktuitigigai Ukpíññuaqtit

¹ Taatnaanikman Jesus uqañiqsuq iñugayaanun maliguaqtimiñunlu, itnaqhuni, ² “Aglaliqirit Pharisee-ñuruatlu maligutaksriuqtut Moses-tun injigaanimma. ³ Taatnamik tupigiraksraigisi atuglugillu supayaanik uqautikpasi tuvrasuñaqnagich qanuq pisuutilaanat. Atakkii atuummitlaitchaat sumik uqaqqaaqhutinj. ⁴ Natmiqsuiraqtut iñuñun uqumailanik.

Aasiisuli ikayugummataitkaich akiyautisuglugich. ⁵ Savaapayaaqtiñ iñiqtagirağıgaat qiniqquasaalhiñagutin iñuñnun. Aglilaqaqtagnigaich puukataurat qauğmikniļu taliğmikniļu imaqaqtuat uqalığnik suli atnuğaağmiň niviñalukkatanjich taklılaaqlugich. ⁶ Iniqlallatuniqsut qaukliñich aquppiutañitník niğipakmata, suli Jew-ŋuruat katragvinjtñi aquppillatuplutin qaukliuruam inaanı, ⁷ suli tumitchiani paglatqtuplutin suli iñuñnun tuqliraqusuuplutin ilisautriñik. ⁸ Aglaan taiguutiqağumiñaitchusi ilisautriñik, atakkii atautchiłhiñamik ilisautriqahusı aasiñ iluqasi aniqatigiiksusi. ⁹ Taiguğniaqasiuñsuli kiñapayaaq maani nunami aapapsitñik, atakkii atautchiłhiñamik aapaqaqtusi qilañmiittuamik. ¹⁰ Naagaqaa taiguqasiuñ kiñapayaaq sivulliuqtinik atakkii atautchiłhiñamik sivulliuqtıqaqtusri, taamna Christ-ŋuruq, anniqsuqtı akiqsruutauruaq. ¹¹ Iñuk kamanağniqsrauruaq akunnapsitñi savaktigiyumagiksi. ¹² Suli kiñapayaaq kamanağasugiruaq iñmiñik atchiksipkakkaugisiruq. Kiñapayaaq atchiksiruaq iñmiñik kamanaqsipkakkaugisiruq.

Jesus-ŋum Suakatağai Ukpiñjuwałhatigun

¹³ “Naklıuñ, aglaliqirisiļu Pharisee-ŋuruasiļu, ukpiñjuqaqtisi! Kanjqisitłaitkiksi Agaayyutim uqałha uqqiraqtaalu suli ilisautriñitługich. Atriqaqtusi iñuñnik anjmautıqaqtuanik Agaayyutim añaayuqautaanun aglaan anjmañitługu. Isiñitchusi sulipsuuq isiqtailigisi tamatkua isığniuraqtuat. ¹⁴ [Naklıuñ, aglaliqirisiļu Pharisee-ŋuruasiļu, ukpiñjuqaqtisi!

Ivayaqtuiplusi tupiñitñik sulliñaurañitñiglu uilgaǵnaat, aasiin taimma qiniqtinniagaqsiplusi takiruamik agaayuplusi, taamna pisigilugu anasiñjuqsaqsiułiksraqsipigiluñniaqtuq.]

15 Nakliun, aglaliqirisiiļu Pharisee-ñuruasiili, ukpiñjuaqtisii! Kukiluktusi taǵiukunlu nunakunlu atautchimikunniň maliguaqtinigukhusi.

Aasiin maliguaqtiksraqtaǵianikapsiuŋ anasiñjuqsaǵviñmutlasiraǵigiksi pigiilitluklugu ilipsitñiň. **16** Nakliun, ayaunjaplusi sivulliuqtauruasii! Uqaqtusi, ‘Kińapayaaq akiqsruqami agaayyuvikpakun taamna suuñitchuq, aglaan kińapayaaq akiqsruqami kaviqsaakun manikun agaayyuvikpakun, tavra akiqsruutiniktuq!’

17 Ayaunjaplusi isumalguitchuasii! Nalliaak ukuak pitluktuańjuva—kaviqsaaq manik naaga agaayyuvikpak ipqiqsitchipkairuaq kaviqsaamik maniñmik? **18** Uqaqtusisuli kiňa iňuk akiqsruqami tunillaqtugvikun taamna suuñitñiplugu, aglaan akiqsruqami aatchuutauruakun tunillaqtugviñmi akiqsruutiniktuq. **19** Ayaunjaruasii! Nalliaak ukuak pitluktuańjuva aatchuun naaga tunillaqtugvik ipqiqsitchipkairuaq aatchuutmik? **20** Taatnamik iňuum tunillaqtugvikun akiqsruqami taputiragigai aatchuutit tunillaqtugviñmiittuat. **21** Iňuk akiqsruqami agaayyuvikpakun, taputipmiraǵigaa Agaayyun ittuaq tavrani. **22** Iňuk pakivrumuuna akiqsruqtaqami taputipmiraǵigaa Agaayyutim aquppiutańja taamnalu aquppiruaq tavrani.

23 Nakliun, aglaliqirisiiļu Pharisee-ñuruasiili, ukpiñjuaqtisii! Qulikuraqtusi avuuǵutipsitñik—mint, dill suli cummin-nik; aglaan minitlugich

qulliupiaqtuat ilisauittutit maligutaksrani:
 nalaunñaruuałiq, nagliktaq suli ukpiqsriłiq
 —taapkua atuumaraksraǵaluasi minitchi-
 raǵasunaqasiaglaan sivulligñik. ²⁴ Ayaunjasplusi
 sivulliuqtisii, milugiatchiat piigñiaǵagigisi
 qallutipsitñiń salummautituqlugich, aglaan
 iilgataqtigaǵigaksi pikukturuaq natmaksiǵvik.
²⁵ Naklıuŋ, aglaliqirisiili Pharisee-ηuruasiili,
 ukpińjuaqtisii! Salumapkairusi qaałhińanitñik
 qallutipsi suli puggutapsi, aglaan iluńich
 immaukkaqhutin ivayaqtuǵigmik suli killiqiǵigmik.
²⁶ Pharisee-ηuruasii, qanutun qiniitlaisigivisi!
 Salummaqqaaqsigik iluałnik qallutimlu
 puggutamlu, qaanjigli salumayumauk. ²⁷ Naklıuŋ,
 aglaliqirisiili Pharisee-ηuruasiili, ukpińjuaqtisii!
 Ittusi qiniyunaqtuatun iluvgich silataatitun,
 aglaan iluńich immaukkaqhutin tuquńaruat
 iňuich saunińitñik suli qaayuǵnapayaqtuanik.
²⁸ Taatnallapiaq qaałhińapsigun sagviaqtuǵaqtusi
 iňuńnun nalaunñaruatun ilipłusi, aglaan ilupsitñi
 immaukkaqtusi ukpińjuagutinik pigiiliqiǵigniglu.

Jesus Sivuniksriqiruq Anasińjuqsaǵviksraǵatnik

²⁹ “Naklıuŋ, aglaliqirisiili Pharisee-
 ηuruasiili, ukpińjuaqtisii! Qińiyunaqsaǵisi
 iluvinjich sivuniksriqirit suli nalaunñaruat
 iňuich. ³⁰ Uqaqtusisuli, ‘Iňuuniaqsimagupta
 inilǵaan taimani aapaavut iňuuniaqmata,
 piqasiqsuutinayaitchugut ilinjtñi iňuaqtuqmata
 sivuniksriqirinik.’ ³¹ Taatna uqaqapsi
 ilipsitñik ilisimarauniqsusi kinjuviagítitalapsitñik
 tuqqutchiruanun sivuniksriqirinik. ³² Ki
 naatchiuŋ sivulliapsi aullaǵniikkajat. ³³ Ilipsi

qitunġaŋich tuqunaqaqtuat nimigiat! Qanuġlugu naŋaqniaqpisiuŋ anasiñjuqsaġviŋmuktitauviksraqsi?

³⁴ Taatnamik tuyugisiruŋa sivuniksriqirinik ilipsitňun puqiksaaniglu iñuŋnik aglaliqiriniglu —iļaŋich tuqqutkisigisi, suli iļaŋich kikiaktuu-tilugich, atlatsuli ipiġaqtuġlugich katraġvipsitňi suli qimaaratchilugich nunaaqqimiň atlanun nunaaqqiňun.

³⁵ Taamna pisigiplugu anasiñjuqsaqsiuļiksraqsi tikiññaqtaq ilipsitňun maqitchipkaiļlapsigun auŋatnik nalaunħaruat iñuich mauja nunamun, aullaġniilugu iñuaqtuħhaniň Abel-ħum iñuaqtuħhanunaglaan Zechariah-m iġñiħan Barachiah-m, iñuaqtapsi akunġakni agaayyuvikpaumlu tunillaqtuġviumlu.

³⁶ Uqautigipsi ilumutuuruamik, iluqani tamanna anasiñjuqsautiksraq tikiumagisiruq makunuja iñuŋnun pakmapak iñuuruuanun.

Jesus-ħum Piqaksriħha Jerusalem-miunik

³⁷ “Annaatuk, Jerusalem-miusii! Tuqutchuurusii sivuniksriqirinik miluqtuiruasiili uyaġaŋnik tamatkuni ja tuyuura uruanik ilipsitňun! Akulaiqługu katitchummiugaluagaraġgitka iñugikkasi, atrilugu aqargiqpak piyaqquq-tailitňiktuatun piaġġiġġi miňnik ataaknun isaqqunejmi.

³⁸ Atanji, tupiqli suksraakaullapiaġġiaqtuq suujiġġiġiġi. ³⁹ Taatnaqlu ja uqautigipsi, qinñitqikkumiňaitkipsitja nipliġġiaħlapsitňunaglaan, ‘Uvvatuq Agaayyutim pilijutigiliu ja taamna tikitchuaq atqagħun atanġum.’ ”

24

Jesus Sivuniksriqiruq Piyaqquġniaħhanik

Agaayyuvikpaum

¹ Jesus unitkaqsipmagu agaayyuvikpak maliġuaqtaiñ upyaugnigaat iniñitñik agaayyuvikpaum. ² Jesus-ηum apiqsruġniġai, “Iluqaisa makua tupqich qiñiñitpisigich? Uqautigipsi, Kisijnejtaqaġumiñaitchuququnniñ uyaġaġmik qalliani atlām ulġusimaitchuamik.”

Jesus Sivuniksriqiruq Piyuaqsiuliksramiglu

³ Jesus aquppiqkaqtitlugu iġġimi taggisiqaqtu-amik Olives-mik maliġuaqtaiñ utlaejnigaat kisip-kuqhutinj apiqsruqħlugu, “Uqautitigut uumiña. Qakugun tamanna atuummiñiaqpa? Sukun ilitchuqqutigun ilitchuġiġisivisa aggiyasiguvich suli nuna isukliyasakiġpan?” ⁴ Jesus-ηum kiuniġai, “Qaunatqiagħiġitchi iñu illi kinniñitchumagaasi. ⁵ Atakkii iñugiaktuat iñuich aggħiġisirut uqagħuti, ‘Christ-ηuruja,’ aasiiñ kinnitniguti iñugiaktuanik iñużżejk. ⁶ Tusaagħisirusi aنجuyaktuanik qanittuamiñ uñasikuamiñlu. Iqsiñiaqasi atakkii iluqati tamatkua atuumaruksraurut aglaan isukliñġitchuqsuli. ⁷ Nunaaqqich aنجuyiūġisirut akilliġiiksilluti avatmun suli atangħoviħ akilliġiiksilluti avatmun, niġi suksiuli qmiluti, suli nuna aulapmi l-uni nanipayaaq nunani. ⁸ Iluqaitñik tamatkua aullaġniisaġġigai auliyautiħum.

⁹ “Qaisaugħisirusi nagliksaaqsiuviksrap sitnun, suli tuqqutau liksrap sitnun, uumigitchi-ulusi nunaqqipayaaniñ piqutigilu ja. ¹⁰ Taimaniġuqpan iñugiaktuat iñuich

ukpiġutaiġñiaqtut, aatchuutigiraġautilutiñ avatmun suli uumikkutilutiñ avatmun. ¹¹ Iñugiaktuat sivuniksriqirinjuaqtuat aggigisipmiñiqsut kin-nitñigutiñ iñugiaktuanik iñuñnik. ¹² Suli pisigelugu iñuičh pigiiliqilhat iñugiaksitmukhutiñ piċċakkutaat niglaqsiñiaġaa. ¹³ Aglaan iñuk makitaruaq payaġaġuni isuanun anniqsukkaugisiruq. ¹⁴ Quliaqtuagiġisigaat taamna tusaayugaallautaq Agaayyutim ajaayuqautaagun, uqautigilugu nunaaqkipayaanun. Aquagun isuklītkisiruq.

Tatamnapiägataqtuaksraq

¹⁵ “Iñuk agliqiruaq ukunija kañiqsili. Qiñigniagiksi naġġunallapiägataqtuaq qikaġlugu ipqitchuami inimi iniksraġinjisamiñi, Daniel-ñum Agaayyutim sivuniksriqiraa uqautigikkajha. ¹⁶ Taipkunani uvluni iñuuniaqtuat nunaġani Judea-m qimakkumaut iġġiñun. ¹⁷ Iñuksuli itkumi tupiġmi qaaġani atqaġniaqani aikliġuni sumik tupiġmi iluaniñ. ¹⁸ Kiñasuli iñuk nautchiiviñmi itkumi utiġniaqani aikliġuni quppiġaġmiñik. ¹⁹ Taipkua uvlut tikitpata, nakliuñ aġnat siñaiyauniġumiñ suli aakat miluktitchigumiñ ililgauraġmiknik. ²⁰ Agaayutitchi qimaliksraqsit atuumatquqillugu ukiumi naagaqaa minguiqsiägvium uvluani. ²¹ Atakkii taivrumani naglikssaaqpaurałiksraq atuumagisiruq atriginisana atuumaruam aullagħnijħaniñ nunam uvujanunagħlaan. Taatnasiq naglikssaaqpaurałiq atuummitqiñiñiajitchuq taavruma aquagun. ²² Aasii Atangum makua uvlut il-aqtaaqas isuaqpagich, kiña iñuk anniqsukkauyumiñaitchuq. Aglaan

pisigiplugich piksraqtaani Agaayyutim taapkua uvlut iļaŋhaqtaaġisigai. ²³ Taimaniġuqpan kia iñuum uqautikpasi, ‘Qiñiqsiuŋ, uvva Christ,’ naagaqaa itnaqpasi, ‘Ikaniittuq,’ ukpiġiniaqasigik. ²⁴ Atakkii anniqsuqtinjuat suli sivuniksriqirinjuat iligisirut savaaqaqutin kamanaqtuanik savaanik suli quviqnaqtuanik. Taapkunuuna kinniñaġniġaich Agaayyutim piksraqtaani pisaġiyumiňağumisigik. ²⁵ Atanjii, uqautigipsi taavrumiņa atummigaluaqnagu.

²⁶ “Aasiili kisupayaam uqautikpasi Christ iñuiлаami innilugu tatpavuňaqaſi naagaqaa iriqsimaniługu uvani tupqum iļuani ukpiġiniaqasiuŋ. ²⁷ Atakkii Iğnija Iñuum aggigisiruq atrilugu ikniqpalanjuun qaummaġiksipmatun qilak kivaknamiň kanaknamun. ²⁸ Sumipayaqaqsuli tuquňaruaq itpan, tavruňa tiňmiaqpaich tuquňaraqtuġuuruat katisuurut.

Aggiiksraja Iğnijan Iñuum

²⁹ “Aquraŋagunaasiiň uvluiň nagliksaaq-siułhum, siqiňiq taaqsigisiruq
suli tatqiq qaumaġingiġuni,
uvlugiat katagaqmilutiň qilaŋmiň
suli qaummatipayaanji silam nuktitaulutiň in-imikniň. *Isaiah 13:10;*
34:4

³⁰ Taivrumani uvluni iļitchuqqutaa Iğnijan Iñuum sagvígisiruq qilaŋmi. Iñupayaşa nunam qialuni qiniġisigaat Iğnija Iñuum aggisuaq nuviyakun qilaŋmiň saňjimigun suli kamanallapiaqtuakun kamanautmigun. ³¹ Qalguqtautiqtapaktuġlugich

nipituruuat tuyugigisigai isaǵuligikkani katitchityaqtilugich piksraqtaağmiňik iñuňnik nakitňapayaq nunami.

Ilısaaksraja Asirritlaitchuam Napaaqtum

32 “Ilısaqaǵitchi fig napaaqtumiň, itnaqhuni, akiǵuiň milukatańich naugaqsipmata suli sunjaaqsiplutıň qituglipmata ilisimaraǵigiksi upingaam qallıḥha. 33 Taatnatuntuuq qińigupsigik tamatkua atuummiruat ilisimaniaqmigiksi Iğníja Iñuum qallıllapiaqlilańa qakma. 34 Iłumun uqautigipsi, Iñuich iñuuniaqtuat pakma tuquaniňniajitchut tamanna suapayaqaq atuumaanikkaluaqnagu. 35 Iluqani nuna suli qılak piyaqqukkaugisiruk, aglaan uqalhich uqautigikkatka piińgiǵumiňaitchut.

Pivia Aggiiksrajan Ilısimaraitchuq

36 “Kia-unniň iñuum nalugaa uvluq naagaqaa sassaq sumi tikisilaaksraja. Isaǵulgich qılajmiittuat unniikii iğníguruam nalugaat. Kisimi aapam ilisimaga. 37 Iğníja Iñuum aggicpan taimanisun itkisiruq atrilugich iñuich iñuuniaqmatun uvliuiň Noah-m. 38 Atakkii taipkunani uvlni sivuani uliqpałhum iñuich niǵimaqtut imiqsimaaqhutiňlu, ilaqtaniktuqhutiň suli qitungatiň ilaqtaniktuqtitlugich Noah-m isığniałhanunaglaan umiamun. 39 Iñuich ilitchuǵinjıñniqsut atuumaniaqtuamik uliqpańmun pisaǵilǵataqtitlutıň. Taatnatun itkisipmiuq Iğníja Iñuum aggicpan. 40 Malǵuk anjutik savaktuak nautchiivijmi, ilaqataa tigurauliǵisiruq aasiiň ilaqataa uniktauliǵuni. 41 Malǵuk ağnak

mukkaaksriuqtuak mukkaaksriuġviñmi, ilaqtataa tigurauliġisiruq aasiiñ ilaqtataa uniktauliġuni.

42 “Taatnaġusi ataramik itqanaitchuksraurusi, atakkii nalugiksi sumi uvumi atannapsi aggigñiaqtilaajanik. **43** Aglaan ilisimayumagiksi una, tupqum iñuan ilisimayumiñ napmun ilikpan unnuaq tiglinniaqtim aggigñiaqtilaanja qaunaginayaqtuq tiglinniaqti siqumġutitqujillugu tupiġmiñun. **44** Taatnatuntuuq itqanaitchuk-sraupmiusi atakkii Iġñiña Iñuum aggigñiaqtuq sassaġniġmi niġiugviginisapsitñi.

Tuniqsimaruuaq Naaga Tuniqsimaitchuaq Savakti

45 “Kiñha tuniqsimaruuañupluni isumatupluniñu savaktauva? Ilaanjuruq anjaayuqam qaukliiutikkajha atlanun savaktimiñun tupiġmiñi ittuanun niqiksritniktaqtuamun piviksraq nallaullapi-aqlugu. **46** Qanutun quviasuktigigisiva taamna savakti anjaayuqam utiġumi paqitaña savaaġiglugu. **47** Ilumun uqautigipsi, atanġum piksraqtaaġigisigaa taamna savakti qaunaksritqulugu iluqaitñik suuraġmiñik. **48** Aglaan qanuq savaktauniqpan pigiitluni? Isomapiaġniqsuq iñjmiñun, ‘Anjaayuqaġa maunauraq utiġniajitchuq,’ **49** aasiiñ anaumiaqsilugich atlat savaqatini suli niġiqatigiplugillu imiqatigiplugillu imiqtuqtit. **50** Anjaayuqaġa taavrūma savaktim utiġniaqtuq ilanjetigun uvlut niġiuginjisillugu ilaanik sassaġniġmiñu qaunaginjisillugu. **51** Atanġata aggigumi tatapsallapiagiġisigaa piqasutipkaġlugu ukpiñħuqatqinun. Tavrani iñuich qiagisirut tiriquulatchiluġillu kiggutitinj.”

25

Atrikusaun Qulitigun Niviaqsiatigun

¹ “Agaayyutim aŋaayuqautaa sagviqpan itkisiruq qulitun aŋutituqsimaitchuatun tigummiaqqaqtuanik nanniuramiknik paagiaqlugu ilaqtiniŋniaqtuaq.

² Tallimat taapkunani isumaturuaŋuniqsut, suli tallimat isumatuilutliŋ. ³ Taapkua isumatuitchuat saagaqmienigaich nanniuratin, aglaan uqsrqitqiutiksraŋitniŋ saagangiňniqsut.

⁴ Isumaturuataasiň uqsrqitqiutiksraligaagniqsut nanniuramiknun. ⁵ Ilaqtiniŋniaqtuaq tuiliuŋapkaqqlugu taapkua iluqatiŋ siňiŋnialiŋqamiň siňiksägniqsut. ⁶ Tavra unnuaq qitiqquqman iňuk nipliqsuq, ‘Marra, ilaqtiniŋniaqtuaq aggiqsuq. Anilusi paagiaqsiun.’ ⁷ Iluqatiŋ aŋutituqsimaitchuat makitnamiň ikummaktaagniagaich nanniuratin.

⁸ Isumatuitchuat uqautiniňaich isumaturuat, ‘Qaitchisigut ilajanik uqsrupsi atakkii nanniuravut qamiaqsiňniqsut.’ ⁹ Aglaan isumaturuat kiuniňaich, ‘Naaga, naamayumiňaitpaluŋmiugut uvaptiknunlu ilipsitňunlu pigupta, aglaan aullağusi taipkunuŋa tunisiullaqtuanun uqsrunik tauqsiňigitchi piksrapstniň.’

¹⁰ Tavrali isumatuitchuat aullağniqsut, aasiiň tauqsiňigatchitlugich ilaqtiniŋniaqtuaq aggiigniqsuq. Taapkua itqanaitchuat isiqatigigaat katchuutivinymun niqipagiaqhutin, tavraasiň taluplugu. ¹¹ Aquvatigunli aggiqmiňniqsut algianich niviaqsiat. Uqaaqsigaluaqtut, ‘Ataniq, aŋmautillaŋniaqtigut.’ ¹² Aglaan kiuniňai, ‘Naluniňipsi. Kisuuvisi?’ ¹³ Taatnaağusi

qaunatqiagigitchi. Atakkii nalugiksi uvluq unniñ sassañiq Iññiña Iñuum aggiliksraña.

Atrikusaun Piñasutigun Savaktitigun

14 “Suliuvva Agaayyutim anjaayuqautaa sagviqpan atriqaqtuq aŋutmik iglausuktuamik unjasiksuanun nunamun. Iñmiñuquplugich savaktigikkani qaunaksriliutiniñgai suurağmiñun. **15** Atausiq iñuk qaitchiñigaa 5,000-tun maniññik, atla iñuk 2,000-tun, atlasuli 1,000-tun, iñnullaa akuqtuipluni pitlakkağmigun. Aasiñ aullağniqsuq iglauviksrağmiñun. **16** Taamna iñuk akuqtuiruaq 5,000-tun maniññik aullaqhuni piñatchiasuŋaqani tauqsigñiutiginigai maniksriusriani, aasiñ piññautigiplugich 5,000-sipsaanik. **17** Taatnatunsuli taamna iñuk akuqtuiruaq 2,000-tun piññapsaaqmiuq atlilik 2,000-nik. **18** Aglaali iñuk akuqtuiruaq 1,000-tun aullaqhuni paksrautiplugu nunamun iriğniñaa anjaayuqağmi maniña. **19** Akuni piilgatağaluaqamai anjaayuqaŋat taapkua savaktit utiğniqsuq, aasiñ makpiğarriqutiaqsiplugich maniksriusriyanatigun. **20** Tavra taamna iñuk akuqtuiruaq 5,000-tun tikiutriruq atlilik 5,000-naktaağmiñik uqaqhuni, ‘Ataniiq, qaitchikapña 5,000-tun maniññik, uvva piññapsaaqtuña 5,000-nik.’ **21** Aŋaayuqaŋan taavruma uqautigaa, ‘Savaaqallautağniqsutin, nakuuplutin tuniqsimmaruaŋuniqsutin savakti! Tuniqsimmatriniqqsutin iñugiakitchaluaqtuatigun suuratigun; inillaŋniağıkpiñ aŋalatiğugutin iñugiaktuanun suuranun. Quviasuqatautyagiñ anjaayuqağikkapni.’ **22** Taamnaptuuq iñuk akuqtuiruaq 2,000-tun maniññik aggiqhuni uqağmiuq,

‘Ataniiq, qaitchikapŋa 2,000-tun maniŋñik, uvva piññapsaaqtuŋa 2,000-nik.’ ²³ Aŋaayuqaŋantuuq uqautipmigaa, ‘Savaaqallautaŋniqsutin, nakuuplutin tuniqsimaruaŋuniqsutin savakti. Tuniqsimmatriŋniqsutin iñugiakitchaluaqtuatigun suuratigun. Inillakkisigikpiň iñugiaktuanun suuranun. Quviasuqatautyagiň aŋaayuqaŋikkapni.’ ²⁴ Tavrali iñuk akuqtuiruaq 1,000-tun maniŋñik aggighuni uqaqtuq, ‘Ataniiq, ilisimagikpiň. Anayaktuaqttauŋungitchutin aŋun. Pukuireqtutin nautchiivigiňgisapniň katitchisuuplutinlu kan̄aqsruivigingisaqniň nautchiaksranik. ²⁵ Sivuuŋapluŋa taatnaqluŋa irigitka maniksin nunamun. Uvva, pisin pigigitin.’ ²⁶ Aŋaayuqaŋan uqautigaa, ‘Pigiitchuatin iqiasruuplutinlu savaktii! Ilisimagaluaqtutin kiprisuutilaamnik nautchiigvigingisamniň katitchipluŋalu kan̄aqsruivigingisamniň nautchiaksranik. ²⁷ Iliňayagŋiitin manitka manniqiriňun, aasiiň utiġuma akuqtuitlanayaqtuŋa pimñik naggutinjitiňik.’ ²⁸ Aasiiň uqautinigai atlat savaktit, ‘Pisigin taapkua maniich ilaaniň qaityaġiaġlugichaasii taavrumuŋa 10,000-tun maniqaqtuamun.’ ²⁹ Tavraasiiň kiňapayaaq anjalatchillautaqtuaq aatchuuſriaġmiňik piññapsaaġisiruq sippakuuqtualiguni. Aglaan taamna piññanġitchuaq, mikiruamikunniiň piginasugikkaġmiňik piikkaugisiruq ilaaniň. ³⁰ Siňitchiuŋ piññaŋniurangitħtuaq savakti taaqtuam taagniqsraŋjanun. Tavrani qiagisirut tiriquullaisa kiggutitin.

Aviktuiġiksraq Nunam Iñupayaauraŋi

31 “Iğñiña Iñuum aggitqikpan kamanaqtuakun qaumamigun iluqaisa ipqitchuat isaquligikkani piqatigilugich, aquvinniaqtuq aquppiutaqpañmiñun kamanaqtuamun. **32** Aasiñ iñupayauraŋi nunam katitaugisirut sivuغاانun. Tavrani aviktugisigai atausiuttaağlugich, atrılıgu munaqsri aviktuipmatun ipnaiñik tuttułuuraniñ. **33** Suli inillakkisigai ipnaich taliqpiñmi tujaanun, aglaali tuttułuurat saumium tujaanun. **34** Umialgum uqautigisigai taliqpiñmiñi ittuat, ‘Maunjağıtchi, aatchuuſriaqaqtuasii piliusiamik Aapamniñ, paitchaktaağisiñ Agaayyutim aŋjaayuqautaa itqanaiyaanjuruaq ilipsitñun iñiqtaułhaniñaglaan nunam.

35 Atakkii niğisuktauqama niqiksritchagigikma. Imiğukamalu imiksritchagigikma. Iglaaŋukama aiyugaaqluña isiqittaağigikma. **36** Atnuğaanitñama atraksritchagigikma atnuğaamik. Atniğñaqama takuraağigikma. Isiqtaukama tikitlüña isiqattaağigikma.’ **37** Tavrallı iñuich nalaunŋaruat kiuniağaat, ‘Ataniiq, qañaaglaan qiñiqpisigiñ niğisukavich aasiñ niğipkaqhutin naagaqaa imiğukavich imiqittaağivisiñ? **38** Qañasuli qiñiqpisigiñ iglaaŋuplutin aasiñ isiqtitlutin naagaqaa atnuğaanitñavich atnuğaaqtitpisigiñ?

39 Suli qañaaglaan qiñiqpisigiñ atniğñaqhatin naagaqaa isiqsiviñmiitnavich takuniqpisigiñ?’ **40** Umialgum kiugisigai tamatkua itnaağlugich, İlumun uqautigipsi. Qanutunaglaan savautrikapsi nagliŋnaqniqsraŋatnun aniqatiuma savaağigiksi uvaŋnun.’ **41** Aasiili uqautiniaqmigai tamatkua saumium tujaani, ‘Piığitchi uvaŋniñ!

Anasiñjuqsakkauniaqtusi isuitchuami iknigmi itqanaiyaanjuamuñ tuunġaġmuñ isaġuliñiñunlu. **42** Atakkii niġisukama niqiksritlaitchipsitja. Imiġuliqama imiksritlaitchipsitja. **43** Iglaanjukama aiyugaatlaitchipsitja. Atnuġaitñama atnuġaaqtitlaitchipsitja. Atniġħiqaqamalu isiqsivijñmiitnamalu isiqattaatlaitchipsitja.’ **44** Tavraptuuq kiuniagaat itnaġutiñ, ‘Ataniiq, qanġaqħalaan qiñiqpisigiñ niġisukavich imiġukavillu naagaqaa iglaanjukavich atnuġaitñavillu, naagaunniñ atniġħiqaqavich isiqtaukavillu aasiiñ savautingitħlutin?’ **45** Aasiiñ kiuniagħi, ‘Uqautigipsi, qanuspipayaamik savautrisunġitħapsi atautchimun nunniiñ nagliżnaqniqsraqtuamun savautriñgħitchusi uvañjik.’ **46** Tamatkuali aullaqtitkisigai isuitchuamun anasiñjuqsaqsiuvijñmuñ, agħali nalaunjaruat isuitchuamun iñnuu kliġmuñ.’

26

Sivunniuġun Tuqutchuklugu Jesus

1 Jesus uqaġuiqami tamatkunija, uqautigai maliġuqaqtini, **2** “Iłi simarusi, malġuk uvluq aquagun atuumagisiruq Jew-ħajnejha niġi qpagħvika an jaqstat il-lik Apqusaakkau kliġmik, aasiiñ Iġnjiha Iñu um aatchuutigik kauniaqtuq kikiaktuutraksrauluni.” **3** Qauklinjich agaayuliqsit [suli agħaliq ħiġi] suli sivulliu qiegħi kien katinni qiegħi iglu qpañjanun qaukliat agaayuliqsit atilgum Caiaphas-mik. **4** Sivunniugaqsiñi qsut tigusraquklugu Jesus nalu nautchilutin tuqu llugu assiñ. **5** Agħlaan uqaġniqsut, “Niġi qpagħvika am uvluani taatna qnian għiċċi kipu. Iñu uqbi aqjal anni qiegħi kien.”

Jesus Tipraqsakkauruq Bethany-mi

⁶ Uvvaasriiñ Jesus Bethany-miitlugu tupqani Simon-ŋum auyugaqtualgum ⁷ tikiññigaa ağnam saagaqhuni nakasruñjuañuramik tipraqsautmik akisuruamik nanuutiksramik, aasiññ kuvipługu Jesus-ŋum niaquanun niğinñaqtitlugu. ⁸ Malığuaqtaiñ qiniqamitruñ iluaginjîññigaat nipliqhutin avatmun, “Supman asiñun tipraqsaun atuqpaun? ⁹ Una tipraqsaun tunikpan atqunautaunayaqtuq qaisauluniasiñ nagliñnaqtuanun.” ¹⁰ Jesus-ŋum ilitchuğiplugu nipliutigikkanat uqautiniğai, “Suvaata una isumaaluksaaqpisiñ ağnaq? Savautigaanja savaallautamik. ¹¹ Nagliñnaqtuat nayuqtigisi ataramik, aglaan nayuqtiginiangitchipsitña ataramik. ¹² Uvvauna ağnam kuvikamiññ tipraqsaun timimnun itqanaiyautigaa iluvikkaułiksraǵa. ¹³ Ilumun uqautigpsi, nanipayaaq tusaaayugaallautaq quliaqtuañukpan nunapayaani, taavrumaptuuq ağnam savaanja uqautaugisipmiuq itqakkutauluni ilaanun.”

Judas Añiqtuq Aatchuutigisukługu Jesus

¹⁴ Taimmali ilaqata qulit malğuk malığuaqtit, atıqaqtuaq Judas Iscariot-mik, utlautiniqsuq qauklinjıtñun agaayuliqsit ¹⁵ uqautiplugich, “Sumik qaitchiññaqpisiñña Jesus aatchuutigigupku ilipsitñun?” Akiliññigaat iñuiññaq qulitun maniññik. ¹⁶ Tavrakñaniñaglaan Judas qaunaksruaqsiyuq piviksramik aatchuutigisrukługu Jesus.

*Jesus Niğıqatauniqsuq Malığuaqtimiñi Niğıqpagviani
Atılıñmi Apqusaakkaułığmik*

17 Sivulliqpiami uvluani niġiqlaqvikaam puvlaksiġniġilaanik qaqqunik maliguaqtit tikiññiġaat Jesus uqautipluguasiiñ, “Nani itqanaiyaquvisigut niġiqlaqrapnik atiliñmik Apqusaakkauļigmik?” **18** Kiuniġai, “Nunaaqqimugitchi aejutmun ilisimakkumnun uqautilugu, ‘Ilisautri uqaqtuq, piviksraġa qalliuraqtuq. Niġiqlaqvia atilik Apqusaakkauļigmik niġġivigisukkiga tupipni piqatigilugich maliguaqtitka.’” **19** Maliguaqtit piñiqsut Jesus-ñum piraksrirlutaatun iliñitñun, aasiiñ itqanaiyaqhutin niġiqlaqviksramun atiliñmun Apqusaakkauļigmik. **20** Unnuksraaqman Jesus aquvinnihsuq niġisukhuni piqatigiplugich qulit malġuk [maliguaqtini]. **21** Niġiñiallaġmiñ Jesus-ñum uqautigai, “Uqautigipsi, ilapsisamma aatchuutiginiaġa ja uumiksriñun.” **22** Iluqatiñ isumaalutchallapiaġataqtut. Atausiuttaaqhutin apiqsullaagaqsigaat, “Ataniiq, uvaħaungħitchuq, amii?” **23** Uqautigai, “Ilaa ġuruq misuqatauruaq argaġmiñik uvapkun puggutauramun. Taavruma aatchuutiginiaġa ja uumiksriñun. **24** Iġñi ja Iñuum aullaġisiruq uqałhum aglaksimalhatun pisigiplugu ilaa, aglaan qanutun tatamnaqtigigisiva taamna aejun Iġñijanik Iñuum aatchuutigitniktuaq uumiksriñun. Nakuutlukkayaqtuq taamna iñuk taimani aniġgiññiġumi.” **25** Tavrali Judas-ñum aatchuutigitniktuajan apiqsruġniġaa, “Ilisautrii, uvaħaungħitchuq, amii?” Jesus-ñum uqautinigaa, “Ii, ilviuruq.”

Atanġum Nullautchiġvia

26 Niġillaġmiñ Jesus-ñum tigugaa qaqqiaq quyaplugu Agaayyun siqumitkaa qaitluguasiiñ

maliǵuaqtimiñun uqaqhuni, “Tigulugu niǵǵisiuŋ, tavrataamna timiga.” ²⁷ Tigupluquasiñ qallun quyaanikami qaitkaa iliŋitñun uqaqhuni, “Imiǵvigesiuj! ²⁸ Taamna auga maqipkakkauruaq iñugiaktuanun aullaǵníiruq nutaamik sivunniuǵutmik Agaayyutmiļu iñuŋniļu. Taavrumuuna aukun Agaayyutim nalupqinaıǵníagaa sivunniuǵutni iñuŋnun natqigutiksraupluni killuqsaıtinijtñun. ²⁹ Imitqinjñianǵitchuňa taavruma asiam misuǵuaniñ uvakjaniñaglaan tikilǵataqtillugu taimña uvluq imitqikkuma piqatigilusi Aapaa aŋaayuqautaani.” ³⁰ Atuanikaminj atuutmik aullaqtut iǵgimun taggisiqaqtuamun Olives-mik.

Jesus Sivuniksrıqırıuq Peter-m Piilaalıksraja

³¹ Pisullaǵminj Jesus-ŋum uqautinigai maliǵuaqtini, “Iluqasi uniññiaǵipsitňa uumani unnuami. Atakkii aglausimaruq uqalıǵni itna, ‘Tuqutkisigiga munaqsri,

aasiiñ ipnaich siamillapiağutinj.’ *Zechariah*

13:7

³² Aglaan anipkakkaunjanikkuma tuqulıǵmiñ, aullaǵisiruňa sivupsitňi Galilee-mun.” ³³ Peter-m uqautigaa Jesus, “Iluqatinj atlat suksraaǵaluqaqtin sumiunniiñ taatnaǵumiňaitchikpiň.” ³⁴ Jesus-ŋum uqautigaa Peter, “Uqautigikpiň, anaqavak piilaagutiginiaǵikma piňasuniaglaan aqargiqpak qalǵuqtaǵaluqaqnagu.” ³⁵ Peter-m uqautigaa, “Tuquqatigiraksraǵigupkiňunniiñ piilaagiyumiňaipiağikpiň.” Taatnatuntuuq uqaqtaǵmiut iluqatinj maliǵuaqtit.

Jesus Agaayuruq Gethsemane-mi

36 Jesus-ŋum aullautigai maliŋuaqtini inimun atiliŋmun Gethsemane-mik uqautiplugich, “Aquppiuraallagitchi uvani, agaayutyaqtaaqtiluŋa iňuŋa.” **37** Aullautiplugich Peter malġuglu iġñanik Zebedee-m alianniuliqsuq iluilliuliłłapiaqhuniļu. **38** Uqautigai, “Arrii, uvva uqumailiļlapiagħniqsuŋa. Alianam pisagiħħiňa aqguqtägaña. Tavraniittuallagitchi qaunaksruqasillagluňa.” **39** Taiňuňaqtaallakhuni pullapiaqħugu kliňani agaayuruq, “Aapaan, pisułiġigupku piġuň qallutaa nagliksaħħum uvaňniň. Uvanya pisulgiňillaaptun aglaan ilvich pisułiptun.” **40** Jesus utiqami maliŋuaqtimiňun paqinniġai siňktuat. Apiqsruġniġaa Peter, “Qau-nagiuraallakkumiňaitpisitħa atautchimiunniň sassaġniġmi? **41** Siňiňniasuňaqasi agaayulusiļu. Ukpiqsrisainjitchumausili uuktuaqsiugupsi. Ilumun irrusiq piyummatiqaġaluaqtuq aglaan timi sayaitchuq.” **42** Jesus aullatqilgitchuq ilaqataani agaayupluni uqaqhuni, “Aapaan, una qallugauraq piġumiňaitpan uvaňniň imiqtaksraġiġipu pilagu pisułiġikkan.” **43** Utilgitňami paqilgitchai siňktuat atakkii iriňich siqupsağulilłłapiaqħutiň. **44** Uvvaasiiň aullalgitchuq agaayutyaqħuni pinjatchiqħugich, uqaqhuni taapkuninjasuli uqautigikkagħiġi niskru. **45** Jesus utiqami maliŋuaqtimiňun uqautigai, “Siňiktuaqpisisuli iňiqtuiqsiaqħusi? Uvva, sassaq tikitchuq aatchuutigikkauvixsraja Iġñiżjan Iňwum arganjiči killuliqirit. **46** Makillusi aullaqta! Aatchuutigitniktuaġa imma tikitchuq.”

Jesus Tigukkauruq

47 Jesus uqaǵugaaqtitlugu Judas aggiǵñiqsuq, ilanat qulit malǵuk maliǵuaqtit. Piqatiqaǵniqsuq ińugiallapiaqtuanik ińuňnik savikpiraqtuanik anautchiraqtuaniglu, tuyuumaruanik qauklińitńiń agaayuliqsit sivulliuqtıgruańitńińlu.

48 Taavruma aatchuutigitniktuam piqatiní ilitchuqqutiksrińńigai uqaqhuni, “Kińataimma kunikkupku tavra taamnaugisiruq. Tiguyumagaksi.” **49** Taavrumatavra nalinjińaaqługu utlakkaa Jesus paǵlaplugu, “Paǵlagikpiń, ilisautrii!” aasiiń kunikługu. **50** Jesus-ńum kiuniǵaa, “Iłauraamaań, tavra taatnagiąǵuguutinkii.” Tamatkua ińuich tiguniqłukługu Jesus tigugaat.

51 Tavrali ilanata taapkua piqatinjiń Jesus-ńum amuniǵaa savikpani uugiraqtıqluguasii savaktinja qaukliata agaayuliqsit. Uugiraqamiuń tavra siutaiqsińiǵaa. **52** Tavrani Jesus-ńum uqautigaa taamna, “Utiqtirruń savikpaiń puuńanun atakkii iluqatiń ańuyaktuat savikpakun piyaqquǵisirut savikpakun. **53** Isumańitpitch iniqsruǵupku Aapaga ikayuqtailiqiluńa, akkuvaurapiaq tuyuǵayaǵaańa qulit malǵuktun kavluutinik isaǵulińnik. **54** Taatnagiupku qanuǵuni Agaayyutim uqaĺha immiumagisiva uqaǵiruaq taatna ittuksraupluni?” **55** Taavrumani Jesus-ńum uqautigai ińugiallapiaqtuat ińuich, “Savvaqłuktauvik, atakkii aggiqhusi tigutyaqlıńa savikpańnik anautaniglu. Uvluǵaǵipman aquppigaluagaraqtuńa piqatigiplusi agaayyuvikpańmi ilisautripluńa, aglaan tigusratlaitchipsitńa. **56** Aglaan iluqatiń tamatkua atuumarut atakkii Agaayyutim uqaĺhich uqaǵikkańich sivuniksriqirit

immiumaruchsraupmata.” Tavrali iluqatinj maliquaqtit unitchaat pigruqhutinj.

Jesus Apiqsruqtuġaat Uqaqsittaagviñmi

57 Taapkua tiguriruat Jesus-mik aullautiniġaat Caiaphas-mun qaukliat agaayuliqsit katim-mavigikkanatnun aglaliqirit sivulliuqtigruatlu. **58** Aasiiñ Peter-m maliñniġaa uŋasiuraaqhuni qaukliata agaayuliqsit igluqpanjan silataanunaglaa. Isiqhuni aquppiqatauniqsuq qaunaksrini qinīġuklugu qanuġisitilaanja. **59** Qauklinjich agaayuliqsit suli iluqatinj uqaqsittaqtitchirit pakaaqqaġniqsut tanjigañaanik ilisimarauruaniq sagluutigilugu Jesus tuqqutchuklugu. **60** Aglaan paqitchinjieniñniqsurum sumikunniiñ, iñugiakkaluaqhutinj tikiaruat tanjigañaakun ilisimarauniaqtuat. Naagatai paqitchinjitchut. Kiisaimmalu malġuk tanjigañaakun ilisimarauruak saavitruk **61** uqaqhutik, “Uvvauna iñuk uqaqtuaq, ‘Piyaqqulhiñnaugiga agaayyuvikpaña Agaayyutim aasiiñ nappatqiglugu piñasuni uvluni.’” **62** Uvvaasiiñ qaukliata agaayuliqsit makitluni uqautigaa Jesus, “Kiggutiksraitpitch sumik ukuak iññuk uqautaakkun ilipkun?” **63** Aglaan Jesus nipaisaaqtuq. Qaukliata agaayuliqsit uqautiniġaa Jesus, “Itqaġun una, Pakma nayuutirugut sivuġaani iññuruam Agaayyutim. Taatnamik uqautitigut, Christ-ħujovich, Iğñiņja Agaayyutim?” **64** Jesus-ħum kiuniġaa, “Uvva ilvich uqaaniktutin taatna. Aglaan uqautigipsi, qakugun taimma qinīġisigksi Iğñiņja Iñnum aquppiruaq taliqpien tunjaani sanġipayaqaqtuam, aggiġuni nuviyatigun.” **65** Tavrani qaukliata agaayuliqsit aligaażniġai

atnuġaani uqaqhuni, “Inġmiñik uqaġniqķuktaġniqsuq! Suvaatami piqagupsaaqpisa ilisimarinik? Pakma tusaagisi uqaġniqķuutai. ⁶⁶ Qanuq isumavisi?” Kiuniġaat, “Tuquruksraġuqtuq.” ⁶⁷ Aasiiñ tivvuaqtaqsiñġāat kiiñanġagun qakiqtaqsimmaan pattaklugu arganġmiknik. ⁶⁸ Uqaġniqsut, “Christ-juruatiin! Nalautchaġutin uqautitigut, kia qakiqpatin?”

Peter-m Piċċaġġigaa Jesus

⁶⁹ Taatnaħħatni Peter aquppiñihsuq silataani igluqpaum. Niviaqsiġaam tikitlugu nipliutiniġaa, “Ilvichtuuq piqatigipmikkan Jesus Galilee-ġmien.” ⁷⁰ Aglaan Peter piċċaġġaqtuq iluqanġisa takkuatni uqaqhuni, “Naluruuja sumik uqautiqaqtalaapnik.” ⁷¹ Aasiiñ anipman qanitchaġruamun, atlam qin̄iqķugu uqautiniġai tamatkua tavraniittuat, “Uvvauna iñuk piqatauruaq Jesus-mi Nazareth-miumi.” ⁷² Tavrani Peter piċċaġġaqtuq suamasiplugu, “Nalugiga taamna aejun.” ⁷³ Suli akkunilitchiallaklugu qikaqtuat tamaani utlakkaat uqautilgitlugu Peter, “Ilumun ilagigaatin taapkua, atakkii uqausipkun ilisimanaqtutin.” ⁷⁴ Tavra Peter suviagaqsiñihsuq itnaqhuni, “Agaayyutim anasiñjuqsaġlija uqanggiññiġuma ilumutuuruamik. Nalugiga kisuutilaa ja taavrūma aejutim.” Uqaqtitlugu tavraknejtchiaq aqargiqpkal qalguqtaġnihsuq. ⁷⁵ Peter-m itqaqtigai uqautai Jesus-ņum inġmiñun itna, “Aqargiqpkal qalguqtaġaluaqnagu piċċaġġutiginiagħikma piżasuniagħlaan.” Tavra anipluni qianihsuq iluilliullapiaqħuni.

27

Jesus Pilate-muutiniġaat

¹ Uvlaatchaurami qauklinich agaayuliqsit suli sivulliuqtigruajich Jew-ŋuruat sivunniġñiqsut tuqqutchuklugu Jesus. ² Qiliqługu aullautiniġaat Pilate-mun kavanauruamun.

Judas Tuqruuq

³ Tavrali Judas, Jesus-ŋum aatchuutigirinjä, ilitchugikami Jesus-ŋum tuqqutaksrağuqtilaanjanik nunuuratchallapiaġniqsuq utiqtitlugich taapkua iñuiññaq qulit maniurat qauklinijitñun agaayuliqsitlu sivulliuqtigruajitñunlu Jew-ŋuruat ⁴ nipliqhuni, “Killuqsaqtuña atakkii aatchuutigitnikluña patchisailaamik iñuñmik.” Kiuniġaat, “Suutauniaqpami taamna uvaptiknun? Tavra savaağigiñ.” ⁵ Judas-ŋum miļuqsautiniġai maniich agaayyuvikpañmun. Aullaqami qimiññiqsuq iñmiñik. ⁶ Qauklinich agaayuliqsit tiguplugich taapkua maniich nipligñijsut, “Maligutaksrakuagħnanġitchuq tugvaigupta maniñmik ilirakuvianun agaayyuvikpaum, atakkii taamna manik akigigaa tuqqutauruam.” ⁷ Sivunniġñiqsut tauqsiutigisuklugu utkutchirim nunajanik iluviqagħviegħisuklugu iglaanjuruanun. ⁸ Taatnaqługu taamna nuna taiguutiqaġġaat nunajanik augum ugluvajnunagħlaan. ⁹ Taamna immiūmanijsuq uqauttutauruaq tumigiplugu Jeremiah sivuniksriqiri uqautigikka ja, “Tigu-niġaich iñuiññaq qulit maniich. (Taapkua maniich iñugiaktalañat Israel-aagħiut sivunniutigikkānjiċċ akiliutigisukluginiċċi ilaanun.)” ¹⁰ Tauqsiutiginiġaat

utkutchirim nunaja, maligutlugu atanǵum tillisaa uvamnun.”

Jesus Apiqsruqtuǵaa Pilate-ŋum

¹¹ Jesus qikaqtitlugu sivuǵaanun Pilate kavanau-ruam taavruma apiqsruğniǵaa Jesus, “Umialigi-vatin Jew-ŋuruuat?” Jesus kiuniǵaa, “Uqaaniktutin taatna.” ¹² Aasiiň Jesus pasiikkaukami qauklinjitińiń agaayuliqsit sivulliuqtıǵruanińlu kiuŋińńiǵai. ¹³ Kiisaimma Pilate nipliqpuq ilaanun, “Tusaqsaǵinjipigich ilisimarriqsutińich akikŋaqhutin?” ¹⁴ Aglaan Jesus-ŋum kiuŋińńiǵaa atautchimikunniń uqaqsaǵniǵmik. Kavanauruuaq quvígutchallapiagńiqsuq.

Jesus Tuqruksraǵuǵaat

¹⁵ Uvvaasiiň ukiugapman niǵippagvikaami kavanauruuaq anipkairaǵniqsuq atautchimik isiqtamik iňuich pisukkanjañnik. ¹⁶ Taatnałhatni iňuk isiqtawuniqsuq ilisimallautakkañat atiqaqtuaq Barabbas-mik. ¹⁷ Iňugayaat katipmata Pilate-ŋum apiqsruğniǵai, “Nalliaknik anipkaitquvisitja—Barabbas-mik naagaqaa Jesus-mik taiguutiqaqtuamik Christ-mik?” ¹⁸ Ilaan ilitchugińiǵaa tamatkua qaisilaanjat Jesus iňmiňun siqńataqaǵıǵmiktigun. ¹⁹ Aasiiň Pilate aquppiqkaqlugu atanǵum aquppiutañani, aǵnaata tuyuǵniǵaa uqqamik itnaqlugu, “Iłaksianagu taamna nalaunŋaruaq iňuk, atakkii iłuilliuǵutigillakkiga ugluvak siňńaktuǵiplugu.” ²⁰ Aglaan qauklinjisa agaayuliqsit sivulliuqtıǵruatlu maliksunjińiǵaich iňugayaat apiqsruǵlugu anipkaquplugu Barabbas aasiiň tuqqutillugu Jesus. ²¹ Kavanauruam apiqsruğniǵai,

“Nalliaknik ukuak iññuk anipkaitquvisitña?” Iñuich kiuligñigaat, “Barabbas.” ²² Pilate-ñum apiqsruğniğai, “Suniaqpiguasiñ Jesus taiguutiqaqtaq Christ-mik?” Iluqatinj kiuniigaat, “Kikiaktuutili sannigutamun.” ²³ Pilate-ñum nipliutiniğai, “Sumik savamaqluqaqpa?” Aglaan nipaalapsaaqsiñägniqsut nipitusillapiaqhutinj, “Kikiaktuutili sannigutamun!” ²⁴ Pilate ilitchuginiqsuq qanugunniiñ piyumiñaiłhanik suliasiñ apai niparaqhutinj iñuich. Imiksraqhuni igğuğniğai argajni sivugaatni iñugayaat. Aasiñ nipliqlihuni, “Uvva, patchisaunjitchuna uuma iñuum tuqqutauniałhagun. Taamna savaağigaksi.” ²⁵ Iluqatinj iñuich nipaalaniqsut, “Anasiñjuqsausiaksraq tuqqutaułhagun illi uvaptiknun qitungaptiknunlu.” ²⁶ Tavrani Pilate-ñum anipkağniğaa Barabbas, aasiñ ipiğaqtuqtitqaaqlugu qaiññiğaa Jesus aŋuyyiqtinun kikiaktuutityaquplugu sannigutamun.

Aŋuyyiqtit Mitautiginiğaat Jesus

²⁷ Aasiñ Pilate-ñum aŋuyyiqtinijin Jesus aullautiniğaat kavanauruam igluqpanjanunaasii, katipkaqlugich aŋuyyiqtipayaat avatañiqlugu Jesus. ²⁸ Atnuğaiyaqlugu atipkağniğaat kaviqsaamik atnuğaaamik. ²⁹ Niaquğusuığniqsut kakitlağnanik iliplugu niaquanun tigummi-aliqlugulu ayauppiamik taliqpiagun. Aasiñ sitquqhutinj sivugaanun mitautigiaqsiñiğaat nipliqlihutinj, “Pağlagiptigin, umialgat Jew-ñuruat.” ³⁰ Taatnaanikmata tivvuactuğniğaat Jesus piplugu taamna ayauppiaq anaumiaqsipluguasiñ niaquagun. ³¹ Mitautigisuiqamitruñ Jesus

aŋuyyiqtit mattaqługu atnuqaaq atukkaŋa atnuqaatqiksinnigaat atnuqaaŋiñik. Aasiñ aullautiniŋaat kikiaktuutikkauviksraŋjanun.

Jesus Kikiaktuutiniŋaat Sanniġutamun

³² Aŋuyyiqtit anillaġmiŋ nalaunniŋaat aŋun Cyrene-naġmiu atilik Simon-mik. Nunuriplugu taamna aŋun iqsruktinniŋaat Jesus-ŋum sanniġutaŋjanik. ³³ Tikitñamiŋ inimun atiliŋmun Golgatha, itna mumiutiqaqtuaq “Saunġa niaqum,” ³⁴ aŋuyyiqtit qaitchiñiŋaat misuqqumik avuuqtamik suŋamik. Aglaan Jesus-ŋum uuktuallakkaluaqamiuŋ imiġuŋiñiŋħaa. ³⁵ Kikiaktuutianikamitruŋ Jesus aŋuyyiqtit autaagniŋaich atnuqaaŋi iñmiknun saaptaqtuutigiplugin. ³⁶ Aquvinniqsut qaunagiaqsiplugu tavrani. ³⁷ Qulaanun niaquan iļiñiŋaat pasikkun ilaagun, aglausimaruaq itna, “Uvvauna Jesus, umialgat Jew-ħuruat.” ³⁸ Malġuk tigliňniaqtik kikiaktuutiqatigipmiñiġik Jesus-ŋum, ilaqataa taliqpianun aasiñ ilaqataa saumianun. ³⁹ Iñuich apqusaaqtuat niaqulaniqsut nipliaplutin pisaanġatnik Jesus-mun, ⁴⁰ “Uqaġġuuruatin piyaqqulhiňauniplugu agaayyuvikpak nap-patqigługu pinjasuni uvluni, anniqsuġiñ ilipnik. Iġniġikpatin Agaayyutim, atqaġiñ sanniġutamiñ.” ⁴¹ Taatnatun qaukliŋisa agaayuliqsit aglaliqiritlu sivulliuqtigruatlu pisaanġapmiñiġaat Jesus. ⁴² Uqaġġihsut, “Ikayutlagaluağai atlat iñuich, aglaan iñmiñun ikayulguiňniqsuq! Umialgikpaun Israel-ŋum, ki atqaġli kikiaktuutrivíñiñ. Aasiñ ukpiġiġisigikput. ⁴³ Tunjaniqsuq Agaayyutmun. Ki, Agaayyutim pigisullapiagumiuŋ anniqsuġliuŋ

Jesus pakma, atakkii uqaġniqsuq iġñiġinipluni Agaayyutmun.”⁴⁴ Taapkuak tiglinniaqtik kikiaktuutiqatauruak ilaani pisaanapmiñigaat Jesus.

Jesus Tuqruuq

⁴⁵ Uvluq qitiqquqman taaqsiñihsuq nuna-payaami piňasuni sassaġniġñi. ⁴⁶ Iliyuñnaqsipli man quliñjuġutailam sassaġnijanun Jesus nipliġñihsuq nipitusillapiaqħuni, “Eli, Eli, lama sabachthani?” (Taamna itnautauruaq, Agaayyutmaaŋ, Agaayyutmaaŋ, suvaata suksraaqpia?) ⁴⁷ Ilañisa iñuich tamaani qikaqtuat tusaakamitruŋ taamna uqaġnihsut, “Uvva uuma aŋutim tuqliraġaa Elijah.” ⁴⁸ Tavrauvaa ilañat iñuich tigusiñihsuq misuktaqtuamik. Immiqsinniġaa misuġuqħluñmik ilipplugu qiruum nuvukkaħjanun. Aasiiñ qaiññiġaa ilaanun imiquplugu. ⁴⁹ Aglaan ilañich iñuich nipliġñihsut, “Iłaksianasiuŋ. Naipiqtuġlakput Elijah aggħiġisipmagaan annauti tyagħlu.” ⁵⁰ Aasiiñ Jesus nipliatqikami nipitusipluni aniġġiñiġñihsuq. ⁵¹ Tavraguuq talukuyaaq nivijaruaq agaayyuvikpañmi siiksiġnihsuq tatpichaknej takanu jaagħlaan. Nuna aulapmiñihsuq suli uyaġħaich quplu qħutiż. ⁵² Iluvġillu aنجmaġnihsut aasiiñ iñugiaktuat Agaayyutim iñuji tuqgħaluaqtuat aنجtqikhutiż. ⁵³ Anejtqianikam iñ uniññiġaich iluviqtiż, agħlaan aquagħun aنجtqilhan Jesus-ħum nuna aqqimu iñihsuq ipqitchu amun sagħiġħu iñiġi aktuanun iñuji. ⁵⁴ Anejju iuqtit aنجalatiż illu qaunaks riru at Jesus-mik qiñiqam iñ aularu amik nunamik suli supayaanik atuumaruanik, iqsitchallapi aġnihsut

nipliqhutinj, “Iłumun iğñiġiniġaa Agaayyutim.”
55 Iñugiaktuat ağnat qiniqtuağniqsut uŋavaniñ. Tamatkua ağnat maliktuat Jesus-mik Galilee-miñ savaustryaqhutinj ilaanik. **56** Ilaupmiñihsut Mary Magdalene, Mary aakanjak James-ŋumlu Joseph-ŋumlu, suli aakanjak iğñanisa Zebedee-m.

Jesus Iłuviġniġaat

57 Unnuksraaqman umialik aggiġñihsuq atilik Joseph-mik Arimathea-ġmumik maliġuaqtapmiñihsuamik Jesus-mi. **58** Utlautipluni Pilate-mun apiqsruutiginiġaa timaa Jesus-ŋum. Pilate tiliriñihsuq qaitquplugu timi Joseph-mun. **59** Tavra Joseph-ŋum atqaqamiuŋ timi aasii nimiqsrugniġaa salumaruamik ukilħaamik. **60** Aasiiñ inillaŋniġaa Jesus-ŋum timaa nutaamun iluviliuqtamun uyaġaŋmi, iluviksraqġmiñun iŋmiñik. Aksraanikamitruŋ uyaġakpak umiŋniġaa talua iluvġum aullaqhuniasiiñ. **61** Mary Magdalene-lu atlalu Mary aquppiñihsuk akiani iluvġum.

Munaqsrit Iłuviġmi

62 Uvvaasiiñ uvlutqikman, itqanaiyaġviūm uvluan aquagun, qauklijič agaayulihsit suli Pharisee-ŋuruat utlautinihsut Pilate-mun **63** nipliqhutinj, “Ajuun, itqaġikput taavrura kin-nirim uqaġikkajha iñusuňhaġmi makitqikkisiñipluni aquatigun piñasut uvlut. **64** Taamna pisigilugu tilsiiñ iluviq qaunagillapiaqulugu taapkunani piñasuni uvluni. Maliguaqtai aggiqpiaqtut tigliglugu timaa Jesus-ŋum aasii uqautilugich iñuich aŋitqiňiļugu tuqumiñ. Taatnasiq sagluļiġ pigiitlukkisiruq sivulliġmiñ sagluutimiñ.” **65** Pilate-ŋum uqautiniġai, “Piksraqusi aŋuyyiqtinik

qaunaksriksrapsitñik qaunagityaqsiuŋ iluviq pisuqtilaapsitñi.”⁶⁶ Tavrali utlautiniqsut iluvigmun aŋmagumiňaiyagiaqlugu uyağak, suli qaunaksriliqługu aŋuyyiqtinik.

28

Jesus Aŋitqisksuq Tuqulıgmiň

¹ Aquagun minguiqsiagvium, qauniuraağataqtuami sivulliğmi uvluani akunniqsaam, Mary Magdalene-ŋumlu atlamlu Mary-m qiniğiägnigaak iluviq.² Tavratavrani suamaruamik nuna iliqsraqtuq, atakkii isağulgın Atanğum atqaqhuni qilaŋmiň aksraktinnigaa uyağagrueq paanjanıň aasii aquvirvigiplugu.³ Qiňňaŋa atriqağniqsuq ikniqpalajmik, suli atnuğaŋi qatığniqsut aputitun.⁴ Iqsigiplugu qaunaksrit uuliksiňiqsut. Iliňiqsut tuquňaruatun iňuktitun.⁵ Isağulgum uqautiniğik aŋnak, “Iqsiňatik. Ilisimagiga ivaqlıqtik Jesus-mik kikiaktuuutrauruamik.⁶ Uvaniingıtchuq. Aŋitqisksuq nipliğimisun. Maunjağıtchik. Qiňgiyatku Atanğuruam nallavia.⁷ Aullağıtchik qilamik uqautilugich malığuaqtai, ‘Aŋitqiňniqsuq tuqulıgmiň aullaanikhuni sivupsitñi Galilee-mun. Taamani qiniğisigiksi.’ Tavrungaaglaan.”⁸ Aullaqtıqtuk qilamiksruaqhutik iluvigmiň iqsillağmik quviasullapiağataqhutiglu. Aqpaqsruaqhutik uqautrityaqtuk malığuaqtaiňik.⁹ Uqautrityaqtuaqtıtlugik malığuaqtaiňik taimmaiňaŋ Jesus-ŋum nalaunniğik nipliutigaluni, “Paqlagiptik.” Taapkuak utlakługu tiguniğaaq isiganjigun, aasiiň agaayyuvigiplugu.¹⁰ Uvvaasiiň Jesus-ŋum uqautiniğik, “Iqsiňatik. Aullağutik

uqautityatkik aniqatiutka Galilee-muqulugich. Taamani qiñigisigaatña.”

Munaqsrit Quliaqtuałhat

11 Tavraguuq, igliqtitlugik ilaqich qaunaksrit nunaaqqimuñniqsut uqautiaqsiplugich qauklıñich agaayuliqsit iluqanitñik atuumaruanik.

12 Uvvaasiiñ taapkua katimaanikmata sivulliuqtigruatlu sivunniuqhutin aŋuyyuqtitlu qaitchiñigaich manigayaanik **13** uqautiplugich, “Uqautiyumagisi iñuich, maliguaqtaiñ tikitługu unnuami timaa tiglinigaat siñiktitluta aullautipluguasiñ. **14** Taamnaasii uqautauruaq kavanauruam tusaaniqpaun quyaliniqsaqisikput qanuutaisitchagusi.” **15** Aŋuyyuqtit akuqtugniigaich maniich tupigiplugu urriqsuusiaqtin. Taamna quliaqtuaq siaminjasugaaqtuq akungatni Jew-ñuruat uvluvañnunaglaan.

Jesus Sagviqsuq Maliguaqtimiñun

16 Tavraasiiñ qulit atautchimik maliguaqtit Galilee-muñniqsut iiggimun Jesus aullaġvigitqukkajanun. **17** Uvvaasiiñ qin̄iqamitrun agaayyuviginigaat, aglaan ilaqisa nalupqisuutigiplugu. **18** Jesus-ñum tikitłuni uqautiniğai, “Agaayyutim sañiksriññigaana ja anjalataġitlasiplugich qilañmiittuat nunamiittuatlu.

19 Taatnamik aullaġusi iñuñun nanipayaaq nunami maliguaqtiguqtititchi, paptaağlugich atqagun Aapauruamlu Iğñiġuruamlu Ipqitchuam Irrutchimlu, **20** Ilisautilugich kamaksritqulugich iluqanitñik tillisigikkamnik ilipsitñun. Nalupqigiyumiñaitkiksi nayuutilığa ilipsitñi ataramik isuklitchaġataħhanunaglaan nunam.”

Ipqitchuat Makpiġaat - Agaayyutim Uqałhi

Inupiatun

The New Testament in Northwest Alaska Eskimo

copyright © 2010 Wycliffe Bible Translators, Inc.

Language: Inupiatun, Northwest Alaska (Northwest Alaska Eskimo)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files
dated 9 Oct 2020

46cece15-9127-50b3-bf07-88a1082e7ab6